



अय्युब नु आ वारच सां

## अय्युब

**ब्रेक्ब मुर:** साइ डा टाल्मुत माइश्शो किताबम मोसा एको किताब ब्रेक्ब मुर बाक्ब, दे ब्रेक्शो बाक्ब। तन्न अर्को जोक्ब तुइक्ब मोसा आ बाक्ची ना क्येडा नोले डा मुर ब्रेक्ब बाक्नीम देनीम।

**गेना बाक्शो:** अय्युब ठेयब मुर दुम्शा, मोसा आ क्येडा डोंइती, अब्राहाम, इसहाक नु याकूब आन बाक्ची ना ब्रोंइशो बाक्त। एको काथा ला ममाइ, थमा पा अय्युब मुर का बाक्त, दे उत्पत्ती रे यो तुंडसीब। अय्युब किताबम ब्रेक्शो नें उत्पत्तीमी यो बाक्नीम।

ऊज	अय्युब १:१	उत्पत्ती १०:२३
साबा	अय्युब १:१५	उत्पत्ती १०:२८
कल्दी रागी	अय्युब १:१७	उत्पत्ती ११:३१
एलीफाज	अय्युब २:११	उत्पत्ती ३६:१५
शुआह	अय्युब २:११	उत्पत्ती २५:२ नु अर्को।

**मार ब्रेक्शो:**

१. अय्युब शुश शोंप पाइश्शो नु श्येत जाइब दुम्शो *अय्युब १:-३:-*
२. अय्युब आ वारच नु लोत्र पशो *अय्युब ४:-३७:-*
३. अय्युब परमप्रभु नु लोत्र पशो *अय्युब ३८:-४२:६*
४. अय्युब श्येत जवा नोले *अय्युब ४२:७-१७*

### अय्युब कली नाकशो

१ साइ नेसी ऊज रागीमी अय्युब नें पाइश्शो मुर का बाक्माक्त। मेको ब्रोंडम सम्म दोस मतथु नु रिम्शो थुं पाइश्शो दुम्शा बाक्चा माल्ब मुर बाक्माक्त। मेको परमप्रभु कली मान पा हिंशा मरिम्शो पतीक रे डोन बाक्ब मुर बाक्माक्त। *येरमीया २५:२०; बिलाप ४:२१; इजीकीएल १४:२४,२०; याकूब ५:११* २मेको के ७ जना तौ नु तमी सां बाक्मा बाक्त। ३मेको के ७ हजार भेडा, हजार सां दलओंठ, ५ सहे हाल ब्यफ नु ५ सहे गधा बाक्मा बाक्त। मिनु शुश वाइलीम वाइल यो बाक्मा बाक्त। मोपा अय्युब पूर्व डा नेल्ल क्येडा शोंप पाइश्शो नु ठेयब मुर बाक्माक्त। ४मेको आ तौपुकीम पाल्पालो पा आन आन खिंमी भोज पतीक पाइबाक्मा बाक्त। मिनु मेकोपुकीम जचा तूचा कली आन समी सांफा आन कली यो ब्रेप्बाक्मा बाक्त। ५मिनु अय्युबम मेको आन भोज पतीक नाक्त नेल्ल नुम नोले, आ तमी तौ आन कली “परमप्रभु आ डोंइती ठीक सेल्सीन” देंथ, मुर सोइक्बाक्माक्त। मिनु अय्युबमी सुनी कना बोक्शा, मेको आन पर्बम चोशा चढ़ेतीक का का चढ़ेशा, मेको आन पाप क्याम्तीक गेय पाइबाक्माक्त। मारदे हना मेकोमी “आं आलपुकीम मारेइ पा परमप्रभु आ पर्बम पाप पामे को” दे मिम्शा, गेना हना यो मो पाइबाक्माक्त।

### डोंइती डा खेयप नाकशो

६मिनु काबु स्वर्गम बाक्ब परमप्रभु आ मुरपुकी परमप्रभु यावे आ डोंइती जाक्मानु, सैतान यो मेकोपुकी नु

जाक्माक्त। *अय्युब २:१; उत्पत्ती ६:२; १इतिहास २१:१* ७मिनु परमप्रभु यावेमी सैतान कली “गे ते रे जाक्डे?” दे हिल्लो पवा बाक्त। मिनु सैतानमी परमप्रभु यावे कली “रागी डा एर ओंथ नेल्ल हिरशा जाक्ती” देंमाक्त। ८मिनु परमप्रभु यावेमी सैतान कली “गे आं गेय पाइब अय्युब कली तवी? परमप्रभु कली मान पा हिंब, मरिम्शो पतीक रे डोन बाक्ब, रागीम मेको खोदेशो पा पाप मपाइब नु ब्रेम्शो मुर अरु सुइ मबाक्नीम” दे मदा बाक्त। ९मिनु सैतानमी परमप्रभु यावे कली “मार, अय्युब परमप्रभु कली मो मान पा हिंशो बाक्बा डा? *भजन संग्रह ७३:१३* १०गे मेको कली मेको आ खिं, आ शोंप नु आ मारेइ मारेइ नेल्ल एर ओंथ तेइ तेइ रे थरपु हिरशा, मवोइश्शो बाक्नीनी डा? मेको आ गेय नेल्लेमे गे आसीक गेशा वोइश्शो बाक्नीनी। मेको आ क्यारश भेडा नु बी ब्यफ शुश दुम्शो बाक्नीम। ११तन्न गे इन गुइ दिशा, मेको आ मारेइ मारेइ थिने। मिनु मेकोमी इन कली इन डोंइतीन सराप चीले पाइब” देंमाक्त। १२मिनु परमप्रभु यावेम सैतान कली “दुम्ब मोदेशोन दुम्ल। मेको के मार मार बाक्मे, मेको नेल्ल इ मिम्शो पावो। तन्न अय्युब कली चहिं मारेइ मपतो” दे मदा बाक्त। मिनु सैतान परमप्रभु यावे आ डोंइती रे गाक्माक्त। *ब्यक्स्था ८:२*

### अय्युब आ मारेइ मारेइ खतम दुम्शो

१३मिनु काबु अय्युब आ तमी तौ आन ठेयब लोकब आ खिंम, जन जन, तून तून बाक्मा बाक्त। १४मेको नाक्ती लोव्र कुरब मुर का दोरशा जाक्शा अय्युब कली “ब्यफपुकी वाक्ना वाक्न बाक्मानु नु गधापुकी मेको आन नेक्था

जोना जोन बाक्मानु, १५साबा रागी डा मुरपुकी जाक्शा, गोठला आन कली लडाइ तोशा साइक्तेक्म। मिनु मेको मारेइ मारेइ योल्ताक्म। इन कली एको लोव्र शोव्रचा कली गो का ला ब्रोंइती” देमाक्त। १६मेकोमी मेको लोव्र पन पना अर्को लोव्र कुरब मुर का जाक्शा, मेकोमी “परमप्रभु आ मी सरीड रे दोक्शा, भेडा नु गोठला नेल्ल आन कली नेक्तु। इन कली एको लोव्र शोव्रचा कली गो का ला ब्रोंइती” देमाक्त। *भजन संग्रह ७८:४८* १७मिनु मेकोम लोव्र पन पना, अर्को लोव्र कुरब मुर का जाक्शा “हुल सां कल्दी रागी डा मुर जाक्शा, गोठला आन कली तरवारम क्योरशा दलओठ नेल्ल योल्ताक्म। इन कली एको लोव्र शोव्रचा कली गो का ला ब्रोंइती” देमाक्त। *येरमीया ५१:२४* १८मेकोम लोव्र पन पना अर्को यो दोरशा जाक्शा “इन तमी तौ आन ठेयब लोकब आ खिंम जना जन तूना तून बाक्तेक्म। १९मेना गोरशो रागी रे फश गिवार जाक्शा, खिं आ एर ओंथ नेल्ल रे थोक्ताक्व। मिनु मेको खिं मेको आन तार ब्रेशशा, मेको नेल्ल आन कली चिप्शा साइक्तु। इन कली एको लोव्र शोव्रचा कली गो का ला ब्रोंइती” देमाक्त।

२०मिनु अय्युब बोक्शा आ वा खाक्गा बाक्त। आ चां प्रेक्गा बाक्त। मिनु खुम्की पा बाप्शा, २१“गो आं ममा आ कोव्रज रे शिशा यिती। शिशा लेशशा लाइनुड। गो ते रे श्येत्थी जाक्डा, मेकेन श्येत्थी लेशशा, लाइनुड। मेको नेल्ल परमप्रभु यावेमी गेती। मिनु मेकोमी नेल्ल लेशशा लाइक्तु। परमप्रभु यावे आ नें ठेयब बाक्ल” देमाक्त। *उपदेसक ५:१४; १तिमोथी ६:७; याक्ब ५:११*

२२मेको नेल्लेमी अय्युबमी पाप मपवा बाक्त। परमप्रभु कली दोस मगेवा बाक्त।

### निकशी खेयप नाक्शो

२ मिनु काबु स्वर्गम बाक्ब परमप्रभु आ मुरपुकी परमप्रभु यावे आ डोंइती जाक्मानु, सैतान यो मेकोपुकी नु परमप्रभु यावे आ डोंइती जाक्माक्त। *अय्युब १:६* ३मिनु परमप्रभु यावेम सैतान कली “गे ते रे जाक्डे?” दे हिल्लो पवा बाक्त। मिनु मेकोमी परमप्रभु यावे कली “रागी डा एर ओंथ नेल्ल हिरशा जाक्ती” देमाक्त। ३मिनु परमप्रभु यावेम सैतान कली “गे आं गेय पाइब अय्युब कली तवी? रागीमी मेको खोदेशो अरु सुइ मबाक्नीम। मेको दोस मताइब, गेना हना यो ठीक पाइब नु आं कली मान पा हिंब बाक्ब। मेकोम मरिम्शो मपाइब। गे मेको कली श्येत गेचा कली आं कली क्युक्ती, हना यो मुल सम्म मेको आ थमा सुइक्तीके ग्येत्थ लुकच मदुम्शो बाक्ब” दे मदा बाक्त। ४मिनु सैतानम परमप्रभु यावे कली “कुशुल आ पा डा कुशुल। मुरुम ब्रोंइचा कली आ मारेइ मारेइ मगेबा डा? ५इन गुइ दिंशा, मेको आ रुश नु श्ये थिने। मिनु मेकोम इन डोंइतीन इन कली सराप चीले पाइब” दे लोव्र लेत्ता बाक्त। ६मिनु परमप्रभु यावेम सैतान कली “लो मो हना, मेको कली इ मिम्शो पावो। तन्न मेको कली मसतो” देमाक्त। ७मिनु सैतान परमप्रभु यावे आ डोंइती रे गाक्माक्त। मेकोमी अय्युब आ पिया रे खोइल सम्म गार मुपदा बाक्त। *ब्यवस्था २८:२७* ८मिनु अय्युबम ब्वाम्सीचा कली गर आ गम्टे का शेशा पुलु तार निस्से बाक्त।

६मिनु मेको आ मीशेमी मेको कली  
“मार, गे मुल सम्म थमा सुइक्चा  
मप्रोंइनीनी? परमप्रभु कली सराप चीले  
पा बेक्कीन” दे मदा बाक्त। १०तन्न  
अय्युबमी “गे मूर्ख मीश मुर खोदेशो पा  
लोत्र पाप्तीवी। परमप्रभु आ गेशो रिम्शो  
चहिं ताक्शा, मरिम्शो चहिं मताक्चा  
डा?” दे मदा बाक्त। मेको लोत्र नेल्लेम  
अय्युबमी मारेइ पाप मपवा बाक्त।

अय्युब १:२२

### अय्युब आ वारच सां जाक्शो

११मिनु अय्युब आ वारच सांम मेको  
कली मोदेशो श्येत दुम्शो लोत्र नेन्मे बाक्त।  
मेको आन नें तेमान डा एलीफाज, शुआह  
डा बिल्दाद नु नामा डा सोफार बाक्मा  
बाक्त। मिनु मेकोपुकीम मेको कली  
लेम्चा कली नु मेको आ थुं नाइक्पाइक्चा  
कली गारशा आन खिं प्रॉइशा अय्युब  
आ खिंम जाक्मा बाक्त। उत्पत्ती ३६:१५;  
येरमीया ४६:७; उत्पत्ती २५:२; यहोसु १५:४१ १२मिनु  
मेकोपुकीम अय्युब कली डोन रे तशा,  
अय्युब कली मतुइक्तमे बाक्त। मिनु  
मेकोपुकीम अय्युब कली तुइक्तमे नोले  
वाइ ब्रेशशा डाक्शा, श्येत लाक्शा आन  
वा खाक्शा, आन पियाम फुरक फुंडसमा  
बाक्त। १३मिनु मेकोपुकी ७ नाक्ती नु  
७ नाक्दो मारेइ लोत्र मपथु, मेको आ  
नेक्था खपीम निस्समा बाक्त। मारदे हना  
मेकोपुकीम अय्युब कली शुश श्येत दुम्शो  
तामे बाक्त।

### अय्युबम लोत्र पशो

३ मिनु नोले अय्युबम आ जरमेशो  
नाक्ती कली सराप चीले पवा  
बाक्त। येरमीया २०:१४-१८ २मिनु अय्युबम

३“आं जरमेशो नाक्त खतम दुम्ल।  
‘वोंइश आल का जोल्शो बाक्ब’ देशो  
नाक्दो खतम दुम्ल। ४मेको नाक्त  
छिडछिड दुम्ल। परमप्रभुम मेको कली  
ममिम्तल। मेको नाक्ती हाम्सो मदुम्ल।  
५मेको नाक्ती कली क्येर छिडछिडम  
सुमल। मेको गोस्सुम सुमल। मेको आ  
छिडछिड हिंचा डा दुम्ल। ६मेको नाक्दो  
कली थम छिडछिडम सुमल। बर्स डा  
नाक्त आन दातेम मेको ग्येरचा मतवल।  
महिना डा हिकतीकेम मेको नाक्ती  
हिक्चा मपुंडसेक्ल। ७मेको नाक्दो आल  
मथीब दुम्ल। मेको नाक्दोमी ग्येरशो सेंदा  
मनेंसेक्ल। ८नाक्त कली सराप चीले  
पाइब मुरुम, मेको नाक्ती कली सराप  
चीले पवल। मेकोम लेव्याथन कली  
पोक्चा कली ठीक दुम्शो बाक्ब। ९मेको  
आ सुनी डा सोरुल आ हाम्सो मतांइसेल।  
मेकोम नां सोत्रचा कली रिम्शो मोशा  
दुम्ल। नां दाप्शो गेनायो तचा मतवल।  
१०मारदे हना मेकोम आं कली जरमेब  
ममा कली मतेक्गा। मिनु आं कली श्येत  
मजचा डा पा मखुइक्ती।

११गो मारदे जरमेसी डा चोटीन  
मबेक्डा? गो मारदे कोत्रज रे गूडानु  
मबेक्डा? १२मारदे आं कली वोइक्चा  
कली थुकु बाक्मे? मारदे आं कली तुंडचा  
कली दूध बाक्मे? १३मो दुम्शो हना, गो  
सिक्सी पा गोल्लो बाक्ड वा। गो इप्शा  
नाइश्शा बाक्ड वा। २सामुएल १८:१८ १४गो  
रागी डा पिपपुकी नु मेको आन कली  
अर्ती गेबपुकी नु बाक्ड वा। मेकोपुकीम  
आंम आन कली ब्रेशो दरवारपुकी लेंशा  
सेल्नीम। १५शुश सुन पाइश्शो तौ नु  
बाक्ड वा। मेकोपुकीम आन खिं चांदीम  
प्रिंनीम। १६मारदे गो शाम्शो आल खोदेशो

पा थिम्चा मपुंडसीडा? मो दुम्शो हना गो हाम्सो गेनायो मतशो आल खोदेशो पा बाकड वा। १७मेकेर परमप्रभु यावे आ अरेशो मटीबपुकीम ग्रांग्ये माग्ये पने मचाप्नीम। मेकेर दशो मुरपुकी नाइक्चा ताइनीम। १८मेकेर चोकशा वोइशोपुकी नाइक्चा ताइनीम। गेय पपाइक्ब आ सेंदा मनेंसीब। १९मेकेर ठेयब नु आइक्च नेल्ल बाक्नीम। वाइलीम वाइल यो आन होव्रप रे ब्रोंइशो बाक्नीम।

२०श्येत जाइब कली मारदे हाम्सो तचा गेशो बाक्बा? आन थुं लुकच लशो कली मारदे ब्रोंइचा गेशो बाक्बा? २१मेकोमी बेक्चा कली रिम्शो बाक्ब। तन्न मेको मबेक्ब। मेकोमी थिम्शा वोइशो शोंप दोशा माल्लशो क्येडा यो शुश माल्लब। प्रकाश ६:६ २२मेकोपुकी तुरसुम जाक्दीम्मानु आन थुं नाइशशा, शुश ग्येरसीनीम। २३परमप्रभुम लां मताइब आन कली मारदे हाम्सो गेशो बाक्बा? मेको आन एर ओंथ नेल्ल रे थरपु हिरशो बाक्ब। अय्युब १६:८ २४आं जचा थोव्रक आ पा डा हुकयी पतीके दुम्शो बाक्ब। आं हुकयी पशो ब्वाक्कु खोदेशो पा यीब। २५गो मार मिम्शा हिंडा, मेकोमीन थित्ती। गो मार तशा शुश हिंडा, मेको आं तार जाक्त। २६आं थुं मनांडसीब। गो सिकसी पा मबाक्नुड। नाइक्चा मताइनुड। श्येत ला जाक्ब” देंमाक्त।

### एलीफाजम लोव्र पशो

४ मिनु तेमान डा एलीफाजमी अय्युब कली २“मार, सुइमी गे नु लोव्र पचा माल्तु हना, इन थुं खाइक्पाइक्नीनी? तन्न सु मब्वाक्थु बाक्ने चाप्नीमी डा? ३गे शुश मुर आन कली शेंताक्नी। गे मचाप्ब

मुर आन कली बोल्यो सेलतीनी। ४दाइल पा गोल्शो आन कली इन लोव्रमी आन थुं बारपाइक्तीनी। मिनु गे खोइल मथेक्ब आन कली खोइल थेक्ब सेलतीनी। ५तन्न मुल इन तार मोदेशो श्येत जाक्मेनु, गे फाल्ने मचाप्ब दुम्शो बाक्नीनी। मेको श्येतमी इन कली थिवानु, इन थुं लुकच लशो बाक्ब। ६मार इन परमप्रभु कली मान पा हिंतीकेम थमा मसुइक्नीनी? इन ठीक पतीकेमी आस मगेबा?

७मारेइ दोस मताइब मुर खतम दुम्शो बाक्नीमी? मेको मिम्तीन। गेना हना यो रिम्शो पाइब मुर साइक्चा पुंडसीनीमी? ८मरिम्शो पाइब नु ग्रांग्ये माग्ये पोक्ब आंम आन पशो ताइनीम। हितोपदेस २२:८ ९परमप्रभु आ मुइशोम मेकोपुकी खतम दुम्नीम। मिनु मेको आ गाइशो आ मीम नेक्चा पुंडसीनीम। १०गुप्स ग्रीमल, बोल्यो गुप्स डरर डरर पामेक्ल। मो हना यो ठिटा गुप्स आन खुइ जिकचा पुंडसाक्म। ११बोल्यो गुप्सपुकी सिखार ब्वचा मतथु नुप्नीम। मिनु छाउरी गुप्स आन चाइक्ब एर ओंथ ब्राइनीम।

१२आइक्च लोव्र का आं नोफाम नेंता। मिनु गो शिप शिप पा लोव्र पशो नेंता। १३नाक्दो डोमु ततीके बाक्ब। मुर ठेयब निन्द्रा पशो बाक्नीम। अय्युब ३३:१५; उत्पत्ती १५:१२ १४मोदुम्तीके गो शुश हिंशा खिंखि पाता। मिनु मेकोम आं पोक्च कली शुश खिंखि पपाइक्तु। १५फश का आं डोंइती रे पा लत। मिनु आं रां डा चां बोक्तेक्म। १६मेको दिक्शा बाक्त। तन्न मेको मार बाक्मे, गो मारेइ मतुइक्तु। आं डोंइती मार कका राप्त। नोले सिकसी दुम्शा, सेंदा का गूत। १७मेको सेंदामी ‘मार बेक्शा लाइब मुर परमप्रभु

आ डोंइती नेल्लेम ठीक पाइब दुम्ने चाप्बा डा? मुर आ कली सेल्ब क्येडा रिम्शो दुम्ने चाप्बा डा?’ देंत। *१राजा ८:४६; भजन संग्रह १४:३; हितोपदेश २०:६* **१८**परमप्रभुम आ गेय पाइब आन कली थमा मसुइक्ब। मिनु आ स्वर्ग डा गेय पाइब आन कली दोस गेब। *अय्युब १५:१५* **१९**मिनु खप के खिंम बाक्ब मुर मेको आन क्येडा शुश दोस मताइनीमी डा? मुर आन जग फुरक बाक्ब। मेको तुम्ब खोदेशो पा दिप्शा साइक्चा पुंडसीनीम। **२०**मेकोपुकी नाक्त काम साइक्चा पुंडसीनीम। सुइम मतुइक्थु बेक्नीम। **२१**मेको आन ताम्बु डा डोरी गुंडशो बाक्ब। मेकोपुकी जोक्ब तुइक्ब मदुम्थु बेक्नीमी” देंमाक्त।

### एलीफाज आ लोत्र

**५** मिनु एलीफाजमी “मुल ब्रेशशा कोव्रडीन। इन कली सुम लोत्र लेप्बाक्मा? गे सु कली ‘वारच पाइय्यीनी’ दे ब्रेत्नीनी? **२**गाइक्तीकेम मूर्ख आन कली साइक्ब। मिनु गेहे पतीकेम मारेइ मजोक्ब आन कली साइक्ब। **३**गो मूर्ख आन शाक्श थोक्शो तशो बाक्नुड। तन्न गो कालेमीन मेको आन खिं कली सराप चीले पाइक्ता। *भजन संग्रह ३७:३५-३६* **४**मेको आन आल कोव्रब मुर मबाक्नीम। मेकोपुकी ठेयब लाप्चोम साइक्चा पुंडसीनीम। मेको आन कली प्रोंइब सुइ मबाक्ब। **५**शोत्रलु बेक्शोपुकीम मेको आन खुप्शो मारेइ मारेइ नेक्नीम। आन जचा थोत्रक चू आन दाते रे यो खुप्शा योल्नीम। तूतू दाक्शोपुकी मेको आन शोंप तशा वाल्नीम। **६**मारदे हना श्येत जतीके फुरक रे मजाक्ब। खप रे श्येत मगूब। **७**मुरपुकी श्येत जचा कली जरमेसीनीम।

मेकोपुकी मी आ फिलीडगो खोदेशो पा जाम्नीम।

**८**गो मेको नड हना, गो परमप्रभु कली मलु वा। आं पुंडशो लोत्र परमप्रभु कली देंड वा। **९**मेकोमी ठेयब, रुप्ने मचाप्चा डा नु छक लाक्चा डा गेय हिक्ने मचाप्चा डा पा पाइब। *अय्युब ६:१०* **१०**मेकोम खप कली रेउ यिपाइक्ब। मिनु रू कली ब्वाक्कु सोइक्ब। **११**मेकोम महिक्सीशो मुर आन कली ठेयब सेल्ब। मिनु रोंका पाइब आन कली लेंशा ग्येरपाइक्ब।

*भजन संग्रह ७५:८; लूका १:५२* **१२**मेकोम मरिम्शो मिम्शा पाइब आन कली आन मिम्शो मदुम्पाइक्ब। मिनु मेकोपुकीम आन मिम्शो पने मचाप्नीम। **१३**मेकोमी आंम कली जोक्ब तुइक्ब मिम्शा गेय पाइब कली आंम गेयमी मेको कली ग्याइक्पाइक्ब। मिनु आन मरिम्शो मिम्शो रीब पा खतम दुम्ब। *१कोरिन्थी ३:१६* **१४**मेको आन कली नाक्तीन छिडछिड दुम्ब। मिनु नाक्ती उइक्थ दुम्नेनु, मेकोपुकी नाक्दो खोदेशो पा सुल्शा गाक्नीम। *यसैया ५६:६-१०* **१५**तन्न मेकोम मारेइ मथीब आन कली आन मरिम्शो लोत्र रे प्रोंइब। मिनु सक्ति पाइश्शो आन गुइ रे प्रोंइब। **१६**मोपतीके पुडग आन आस बाक्ब। मिनु ठीक मपाइबपुकीमी आन शोत्र खेप्चा माल्नीम।

**१७**परमप्रभुमी ठीक सेल्चा पुंडसीशो मुर ग्येरसीशो बाक्नीम। मोपतीके नेल्ल क्येडा ठेयब सक्ति पाइश्शो आ शेंशो आइक्च ममिम्तीन। *भजन संग्रह ६४:१२; हितोपदेश ३:११* **१८**मारदे हना मेकोमी गार सेल्ब। मिनु मेकोमीन फ्रेंब। मेकोमी तुप्ब। मिनु मेकोमीन सापाइक्ब। *ब्यवस्था ३२:३६; होसे ६:१* **१९**मेकोमी इन कली ६ खेयप

श्येत दुम्त हना यो, प्रोंइब। ७ खेयप डा श्येतमी इन कली मथीब। *भजन संग्रह ३७:२४; हितोपदेश २४:१६* २० मेकोमी अन्काल दुम्मेनु, इन कली बेक्चा रे प्रोंइब। मिनु लडाइ दुम्मेनु, तरवार रे प्रोंइब। २१ मेकोम इन कली शुक्शी पाइब रे प्रोंइब। मिनु खतम दुम्तीक नाक्त जाक्मेनु गे हिंचा ममाल्नीनी। २२ खतम दुम्तीके नु अन्काल जाक्मेनु, गे रिश्शा बाक्नीनी। मिनु गे ब्वाकी डा जन्तु आन क्येडा हिंचा ममाल्नीनी। २३ इन रूमी फुल्लु मबाक्नीम। मिनु ब्वाकी डा जन्तुपुकीम इन कली श्येत मगेनीम। *यसैया ११:६-९; होसे २:२०* २४ गे इन ताम्बु मारेड मदुम्शो बाक्ब दे तुइश्शो बाक्नीनी। मिनु गे इन क्यारश भेडा कली हिक्शा कोवनीनु, का यो मजाम्शो बाक्नीम। २५ इन चच युइ शुश दुम्शो बाक्नीम। इन आल घांस खोदेशो पा शुश दुम्शो बाक्नीम। २६ गे खूशो दुम्शा बेक्नीनी। बाली नाली ओइची ना खोदेशो पा, इन नाक्त जाक्ब। २७ गोपुकीम एको आन पर्वम हिल्लो हिक्सी पाइतक। मिनु नेल्ल थमा बाक्ब। मोपतीके एको नेनीन। मिनु तुइक्तीन” दे एलीफाजमी अय्युब कली मदा बाक्त।

### अय्युबमी लोव्र लेशशो

६ मिनु अय्युबमी २“आं सुर्ता नाक्ने चाप्शो हना नु आ शुश हिंचा डा श्येत नाक्शो हना, ३ मेको समुन्द्र डा बाल्वा आन क्येडा यो शुश हेल्लो दुम वा। मोपतीके आं लोव्र रिम्शो मबाक्म कों। ४ नेल्ल क्येडा ठेयब सक्ति पाइश्शो आ ब्राम आं कली गुक्शो बाक्नीम। आं सोक्तीम मेको आन बीख तूचा माल्ब। परमप्रभुमी आं कली हिंपाइश्शो बाक्ब।

*भजन संग्रह ३८:३* ५ ब्वाकी डा गधा घांस ब्ववानु, ग्रीबा डा? ब्यफ आ खोले जवानु, ग्रीबा डा? ६ मब्रोव्रशो जचा थोव्रक हिक्सी मसुप्थु जने चाम्सीबा? मार ब्वोफु आ बुश ब्रोव्रशो बाक्बा डा? ७ गो मेको जचा मदाक्नुड। आं कली काइ मब्रोव्रब।

८ गो आं पुंइशो तड हना, परमप्रभुम आं माल्शो गेशो हना, ९ आं कली खतम सेल वा। परमप्रभुमी आं कली साइय्नी वा। १० मेको मोदेशो दुम्शो हना, आं थुं नाइस वा। मिनु शुश खाइश्शा यो ग्येरसीड वा। मारदे हना गो का ला परमप्रभु आ लोव्र मलाक्शो बाक्नुड। ११ गो आं रिम्शा बाक्तीक सक्ति बाक्बा डा? गो दोपा बेक्नुड। गो रिम्शा बाक्ने चाप्नुड डा? १२ आं सक्ति फुल्लु खोदेशो बाक्बा डा? आं श्ये कांसा के बाक्बा डा? १३ थमा पा, गो आंम कली तिव्का वोइक्ने मचाप्नुड। आं सक्ति नेल्ल लत।

१४ सुमी आन वारच कली शिशी मपाइनीमी, मेकोम नेल्ल क्येडा सक्ति पाइश्शो कली मान पा हिंचा थुम्शो बाक्नीम। १५ आं लोकबपुकी बारशा यीब खोला खोदेशो बाक्नीम। सोव्रशो खोला खोदेशो बाक्नीम। *भजन संग्रह ३८:१२* १६ आन ब्वाक्कु मरिम्शो दुम्शा, फुं यशो खोदेशो पा जाम्ब। १७ मिनु नाप्शोमी मेको आ शाइक्तीक रे जाम्ब। १८ मिनु लां गाक्ब आन लां रे हिरना हिरन गाक्नीम। मिनु मेकोपुकी मुर मबाक्तीकेम गाक्शा, बेक्नीम। १९ तेमा डा लां गाक्बपुकीम तूचा कली मेको खोला डा ब्वाक्कु माल्लेक्म। साबा डा ग्याप्ब लेयबपुकीम मेको ब्वाक्कु तूचा कली आस पाम्नेक्म। *अय्युब १:१५* २० मेको आन आस सोव्रशो

खोला तशा बेक्त। मेकेर जाकदीशशा आन थुं बेक्त। २१ मुल गे आं कली मोदेशो दुम्तीनी। गे आं खतम दुम्तीके तशा हिनीनी। २२ गो इन कली 'आं कली कोसेली चाककीन' देंडा डा? गो इन कली 'इन शोप गेयीनी' देंडा डा? २३ मिनु 'आं कली आं जोरी सत्रु आन गुइ रे प्रोंडयीनी' देंडा डा? 'आं कली दिण्व आन गुइ रे प्रोंडयीनी' दे गो इन कली गेनायो मदेँडा।

२४ आं कली शेंदीनी। मिनु गो सिक्सी पा नेंनुड। गो मार दूली पडा, आं कली रूप्पतीन। २५ थमा लोव्र बोल्यो बाक्नीमी। तन्न इन देशो लोव्र मार रिम्शो बाक्बा डा? २६ गे आं लोव्र रिम्शो सेल्चा माल्नीनी? गे थुं लुकच लशो मुर आ लोव्र फश बाक्ब, दे मिम्नीनी? २७ गेपुकीमी रोम रोइक्च आन पर्वम फेन्टे आप्नीनी। मिनु इन वारच आन पर्वम मार मार फाइक्नीनी।

२८ मुल आं कली कोव्रडीन। गो इन कली जोल मपाइनुड। २९ गे खिं लेतीन। मिनु आं पर्वम अरु मरिम्शो मपने। लेतीन। मारदे हना गो ठीक पाइब बाक्नुड। ३० मार, आं लोव्रम मारेइ जोल बाक्बा? मार, आं लोव्रम रिम्शो नु मरिम्शो तिल्ले मचाप्बा डा?" दे अय्युबमी आ वारच कली लोव्र लेत्ता बाक्त।

### अय्युबमी परमप्रभु नु लोव्र पशो

७ मिनु अय्युबमी "मुर रागीम बाक्मानु, शुश गेय पचा माल्नीम। मेको आन नाक्ती गेय पाइब आन नाक्त खोदेशो बाक्नीम। अय्युब १४:६ २ मेको नाक्दो डा वांकु रिम्शो वाइलीम वाइल खोदेशो पा बाक्नीम। आ गेय पशो डा गाल्च ताक्चा कली रिम्शा बाक्शो

खोदेशो बाक्नीम। ३ गो महिना नेल्ल मोशीन सोइक्ताक्डमी। नाक्दो कुस कुस श्येत जतीके आं भाग बाक्ब। ४ गो नाक्दो इप्चा कली गोल्डानु, गेना नां सोव्रबा, दे मिम्नुड। तन्न नाक्दो शुश लाइशशो दुम्ब। मिनु गो नां मसोव्रम सम्म एर ओंथ लोक्सीशा बाक्नुड। ५ आं रां लुस्पुम ब्रीशा, फुरक लुम्सीशो बाक्ब। मिनु आं कुशुल जेशशा नेंने गूशो बाक्ब। ६ आं नाक्त वा प्रोव्रब आन थूरी क्येडा यो रीब पा लाइनीम। मेको नेल्ल आस मपाइशशो दुम्नीम। यसेया ३८:१२

७ आं ब्रोंडतीक नाक्ती का ले कीशो सोक्त खोदेशो बाक्नीम, दे मिम्तीन। गो लेंशा रिम्शो नाक्त तचा मताइनुड। ८ आं कली ताइबमी लेंशा गेनायो मताइब। गे आं कली कोव्रनीनु, गो लने थुम्शो बाक्नुड। ९ गोस्स ब्रशा जाम्शो खोदेशो पा बेक्शो मुर आन बाक्तीक उइ लाइबपुकी गेनायो लेशशा मजाक्नीम। १० मेको आन खिंम लेशशा मजाक्नीम। मिनु मेको आन बाक्तीकेमी मेको आन कली मतुइक्नीम।

अय्युब १०:२१; अय्युब १४:१२; भजन संग्रह १०३:१६

११ मोपतीके गो सिक्सी पा मबाक्नुड। गो आं थुं डा श्येतम लोव्र पाइनुड। गो आं लुकच लशो थुंम लोव्र पाइनुड। १२ मार, गो समुन्द्र नडा? गो समुन्द्र डा ठेयब जन्तु नडा? गे मारदे आं कली खाल पाइब वोइक्नीनी? १३ गो आं ब्राख्येम गोल्शा, आं थुं नाइक्ब, दे मिम्नुड। इण्डानु आं श्येत प्रेंनुड, दे मिम्नुड। १४ तन्न मेना गे आं कली आं डोमुम हिंपाइक्नीनी। मिनु कोंडतीक कोंडशा आं कली हिंच कोंडनीनी। १५ मोपतीके गो मेको रांम ब्रोंडचा क्येडा सोक्त मकीथु बेक्चा दाक्नुड। १६ गो ब्रोंडशा बाक्चा

मदाक्नुड। गो गेना हना यो ब्रोंइशा बाक्चा मदाक्नुड। गे आं कली प्रोंइयीनी। मारदे हना आं ब्रोंइशो का ले कीशो सोक्त खोदेशो बाक्ब। ११राजा १६:४ १७मुर मार नमी डा? गे मेको आन पर्वम शुश मिम्नीनी? मारदे गे मेको आन कली शुश दाक्नीनी। भजन संग्रह ८:४; भजन संग्रह १४४:३ १८गे मेको आन कली सुनी कुस कुस कोवनीनी। गे मेको आन कली गेना हना यो नाक्शा कोवनीनी १९गिश सम्म आं रे इन मिक्च हिरनीनी? शेप्युक मदाक्नु सम्म आं कली प्रोंइयीनी। २०गो पाप पाता हना यो, इन कली मार दुम्बा डा, गे मुर आ थुं नाक्शा कोवनीनी? गे मारदे आं कली खेदा पस डा पस बाक्नीनी। गे मारदे आं कली तशा ब्रीनीनी? २१गे मारदे आं हेंथे पशो माफ मगेयीनी? मारदे आं मरिम्शो पशो मक्याम्नीनी? मुल गो बेक्नुड। मिनु गे आं कली माल्तीनी हना यो, मथित्नीनी” दे अव्युबमी परमप्रभु यावे कली देंमाक्त।

### बिल्दाद आ डोंइती डा लोव

८ मिनु शुआह डा बिल्दादमी लोव लेशशा २“गे गेना सम्म ओदेशो लोव पस डा पस बाक्नीनी। इन लोव ठेयब फश ला बाक्नीम। ३मार, परमप्रभुम दूली निसाफ पाइबा डा? मार, नेल्ल क्येडा सक्ति पाइशो परमप्रभुम मार ठीक बाक्बा, मेको मतुइक्बा डा? अव्युब ३४:१० ४इन तमी तौपुकीम मेको आ पर्वम पाप पाम्तेक्म। मोपतीके मेकोम मेको आन कली आन हेंथे पशो मोइक्ताक्व। अव्युब १:४-५ ५गे नेल्ल क्येडा सक्ति पाइशो परमप्रभु कली माल्तीनी नु मेको कली पुंडतीनी हना, ६गे ग्रांग्रा

मदिचा डा नु गेना हना यो रिम्शो पाइब बाक्तीनी हना, मेको थमा पा इन पोन बोक्ब। मिनु मेकोम इन खिं लेंशा, डोंइती डा खोदेशो पा गेब। भजन संग्रह ३५:२३ ७मिनु इन डोंइती डा बाक्शो क्येडा, इन नोले डा बाक्शो शोंप शुश दुम्ब। अव्युब ४२:१०

८डोंइती डा पाला डा मुर आन कली हिल्लो पने। मिनु मेको आन किकी पिपी आन मिम्शा पशो, मिम्तीन। ९मारदे हना गोपुकी सिनाक्त ला जरमेशो बाक्नीकी। मिनु गो मारेइ मतुइक्ब बाक्नीकी। रागीम आंइ नाक्ती वांकु खोदेशो ला बाक्ब। १०मेको किकी पिपीम इन कली मशेंनीमी? इन कली लोव मपाइनीमी? इन कली आन रुम्शो लोव मशेंनीमी?

११ब्वाक्कु मबाक्तीकेम कागज सेल्टीक बोट मवानीम। ब्वाक्कु मबाक्तीकेम बुदी मीलु लाइशो मदुम्नीम। १२मेको कोल्ना कोल्ल बाक्मानु, रिक्ची मजाक्थु, घांस क्येडा यो रीब पा सोल सुल बेक्नीमी। १३परमप्रभु कली प्रेंबपुकी यो मोदेशोन दुम्नीम। परमप्रभु कली मटीब मुर आन आस यो मोपा जाम्शा लाइब।

अव्युब ११:२०; हितोपदेस १०:२८ १४मेको आन आंमा कली थमा सुइक्तीक थम आइक्च श्येले खोदेशो बाक्ब। मेको आन आस माखा आ जाल खोदेशो बाक्ब। १५मेको आ जालम रक एशशा बाक्त हना, मेको कली मतिक्ब। मेको कली ग्याइक्ताक्व हना यो, मेको ब्रेण्ब। १६परमप्रभु यावे आ अरेशो मटीबपुकी नां तशो घांस सुवा खोदेशो पा वानीम। मिनु मेको आन शाक्श तेइ तेइ ब्रशा लाइनीम। १७मेको आन शाक्शम फुल्लु आन कली रुक्नीम। मिनु मेको फुल्लु आन दातेम बाक्नीम। १८मेको आन बाक्तीक रे खतम दुम्मानु,

आन बाक्तीकेम मेको आन कली 'गो इन कली गेनायो मतशो नड' देंब। १६मेको आन ग्येरशा ब्रोंडतीक नाक्ती मोदेंशो बाक्नीम। मिनु अर्को तेइ तेइ खप रे वाशा गूनीम।

२०नेनीन, परमप्रभुमी दोस मताइब मुर कली मतिलब। मेकोम मरिम्शो गेय पाइब मुर आन कली वारच मपाइब। २१मो हना यो, मेकोमी इन कली रिप्पाइक्ब। ग्येरशा ठेयब सेंदाम लोव्र पपाइक्ब। २२मिनु परमप्रभुमी इन कली काइ मदाक्ब आन मुने दोक्पाइक्ब। मिनु परमप्रभु यावे आ अरेशो मटीब आन ताम्बु जाम्शा लाइनीम" दे बिल्दादमी अय्युब कली देंमाक्त।

### अय्युबमी लोव्र लेशशो

६ मिनु अय्युबम लोव्र लेशशा २"गो एको थमा बाक्ब, दे तुइक्नुड। तन्न परमप्रभु आ डोंडती बेक्शा लाइब मुर दोपा ठीक बाक्ने चाप्बा डा? अय्युब ४०:३-५; भजन संग्रह १४३:२ ३सुइमी मेको नु लोव्र जिपाइक्चा मिम्ताक्ब हना, मेकोम हजार का लोव्रम लोव्र का यो लेन्ने मचाप्ब। भजन संग्रह १६:१३ ४मेको जोक्ब तुइक्ब नु सक्ति पाइशो बाक्ब। मेको कली मटिथु, सु ग्येत्थ लने चाप्बा डा? ५मेकोम डांडा आन कली आन मतुइक्थुन याक्ब। मिनु गाइशशा, मेको आन कली लोकब। ६मेकोम रागी कली आ बाक्तीक रे हिक्ब। मिनु मेको आ थाम नेल्ल खिंखि पाइनीम। ७मेकोम नां कली 'मदपो' दे अरेब। मिनु सोरुल आन छेडछेड साम्ब। ८मेको आ कामीन सरीड प्राक्शो बाक्ब। मेको समुन्द्र आ छाल तार गाक्ब। ९मेकोमी सप्तबर्सी,

मिर्गसीरा नु किरकिटी सोरुल नु दक्खिन डा सोरुल आन हुल सेल्लु। अय्युब ३८:३१; आमोस ५:८ १०मेकोम ठेयब नु मरुप्चा डा गेय पाइब। मिनु हिक्ने मचाप्चा डा छक लाक्चा डा गेय पाइब। अय्युब ५:६ ११मेको आं बाक्तीक रे पा लाइब। गो मेको कली मताइनुड। मेको आ लां खोइशशा गाक्मेनु, गो मतुइक्नुड। १२मेकोम रोइक्ताक्ब हना, मेको कली सुम तेक्ने चाप्बा डा? सुमी मेको कली 'गे मार पनी' दे हिल्लो पने चाप्बा डा?

१३परमप्रभुम आ गाइक्चा मलेप्ब। राहाब माइशो समुन्द्र डा ठेयब जन्तु कली वारच पाइबपुकी मेको आ खोइलीम बाप्नीम। अय्युब २६:१२; भजन संग्रह ८६:११ १४मोदेंशो बाक्त हना, गो मेको कली दोपा लोव्र लेन्ने चाप्नुडा डा? गो मार लोव्र देंनुडा डा? १५गो दोस मतशो बाक्ती हना यो, मेको कली लोव्र लेन्ने मचाप्नुड। आं कली दोस गेब कली गो 'शिशी पाइय्यीनी' दे पुंइने ला चाप्नुड। १६गो मेको कली ब्रेत्तुनु, लोव्र लेत्ताक्यी हना यो, मेकोम आं लोव्र नेंतु, दे थमा मसुइक्नुड। १७मारदे हना मेकोमी आं कली फश गिवारम खतम सेल्लब। मोशान आं गार शुश सेल्लब। १८मेकोम आं कली लेंशा सोक्त कीचा यो मगेब। श्येत जपाइशशा आं थुं लुकच लपाइक्ब। १९एको सक्ति पाइशो लोव्र बाक्त हना, मेको आं क्येडा बोल्यो बाक्ब। एको ठीक पतीके लोव्र बाक्त हना, मेको कली सुम सेन्ने चाप्बा डा? अय्युब ६:३३ २०गो दोस मताइब बाक्ती हना यो, आं लोव्रमीन आं कली दोस ताइब सेल्लब। गो दोस मपाइशशा बाक्ती हना यो, मेकोमी 'गे दोस ताइब बाक्नेवे' दे चिन्ड कौंइब।

२१ गो दोस मताइब बाक्नुड। मो हना यो गो आं पर्वम मारेइ मतुइक्नुड। गो ब्रोंइचा मदाक्नुड। २२ लोव्र नेल्ल कान बाक्ब। मोपतीके गो मेकोम दोस मताइब नु आ अरेशो मटीब निम्फा आस कली खतम सेल्ब, देंनुड। अय्युब ८:२०; उपदेसक ६:२-३

२३ हिंचा डा श्येतमी कालेमीन मुर कली साइक्ब। मेकोम दोस मताइब आन हिंचा डा श्येत जशो आ पर्वम शुक्शी पाइब। २४ रागी परमप्रभु यावे आ अरेशो मटीब आन गुइमी गेशो बाक्ब। मेकोम निसाफ पाइब आन मिक्च सिल्ब। मेकोम मो मपाप्तु हना, सुम पाइबा डा?

२५ आं ब्रोंइतीक नाक्त दोरब आन क्येडा यो शुश दोरशो बाक्ब। मारेइ ग्येरतीक मतथु, मेको नुम्ना नुम्न लाइनीम। २६ मेको बुदी मीलु के सेल्शो डोंगा खोदेशो पा, रीब पा शाइशशा लाइनीम। ब्वारदे आन सिखार तार जुक्शो खोदेशो पा लाइनीम। २७ गो आं श्येत प्रेंनुड। गो ग्येरशो कुल कोंइशा रिन्नुड, देंती हना यो, २८ गो आं श्येत जचा माल्शो तशा हिंनुड। मारदे हना गे आं कली दोस मताइब मदेनीनी, दे तुइक्नुड। २९ गो दोस ताइब दुम्ने थुम्शो बाक्ती हना, मोशान मारदे श्येत पाइनुडा? ३० गो साबुनम चिक्साक्यी हना यो, आं गुइ थम सफा पा चिक्साक्यी हना यो, येरमीया २:२२ ३१ गे आं कली हिलोमीन ब्वारनीनी। मिनु आं वाम यो आं कली ग्रान्रा दिप्ब। ३२ मेको आं खोदेशो बेक्शा लाइब मुर ममाइ। मिनु गो मेको कली लोव्र लेन्ने मचाप्नुड। मोदेशो दुम हना, निसाफ पाइब आन डोंइती लोव्र पने चबु वा। उपदेसक ६:१०

३३ आंस दातेम गारपाइक्ब सुइ मबाक्म। आंस दातेम गुइ वोइक्ब सुइ मबाक्म।

३४ परमप्रभुम आ कोक्के आं ची रे याक्त हना, आं कली महिंपद हना, ३५ गो मेको नु महिंथु लोव्र पड वा। तन्न आ मिम्शो दुम्नेनु, गो तुइक्नुड” दे अय्युबमी शुआह डा बिल्दाद कली देंमाक्त।

### अय्युब आ थुं लुक्च लशो

१० मिनु अय्युबम “गो ब्रोंइचा मदाक्नुड। गो आं श्येत आ पर्वम लोव्र पस डा पस बाक्नुड। गो आं कशो थुंमी लोव्र पाइनुड। २ गो परमप्रभु कली ‘आं कली सजाइ मगेयीनी’ देंनुड। आं कली मारदे निसाफ पाइनीनी, मेको शेंदीनी। ३ गे मुर आन कली दिप्शा, ग्येरनीनी? इन सेल्शो आन कली ममिम्चा रिम्शो लाक्नीनी? इन अरेशो लोव्र मटीबमी मरिम्शो पशो दाक्नीनी? ४ इन मिक्च मुर आन मिक्च खोदेशो बाक्बा? गे मुर आन कोव्रशो खोदेशो पा कोव्रनीनी? १ सामुएल १६:७ ५ इन नाक्ती बेक्शा लाइब मुर आन नाक्त खोदेशो बाक्नीमी? इन ब्रोंइतीक बर्स मुर आन बर्स खोदेशो बाक्नीमी? ६ गे आं मरिम्शो पशो माल्शा, आं पाप थिश्शा गुंडनीनी? ७ गो दोस मताइब बाक्नुड, दे गे तुइक्ताक्नी हना यो, इन गुइ रे आं कली सुइम प्रोंइने मचाप्ब, दे यो तुइक्नीनी। ८ डोंइती गे आं कली सेल्तीनी। मुल आं कली खतम पोक्नीनी? भजन संग्रह १३६:१४ ९ गे आं कली खप के सेल्तीनी। मेको मिम्तीन। मिनु मुल फुरक सेल्तीनी? अय्युब ३३:६; उत्पत्ती २:७; उत्पत्ती ३:१६ १० गे आं कली दूध मोइश्शो खोदेशो पा आं ममा आ कोव्रजीम वोइक्तीनी। मोदेशो पा आं रां सेल्तीनी? ११ गे आं कली श्ये नु कुशुलम ग्योम्शा, रुश नु नाडीम बोइक्ताक्यीनी। १२ गे

आं कली ब्रोंइतीक सोक्त गेतीनी। मिनु  
गेना हना यो दाक्ताक्नी। मिनु आं कली  
ब्रोंइचा गेचा कली कोव्रशा वोइक्तीनी।  
१३ आं कली श्येत गेचा कली डोंइती  
रे इन थुंम खुइश्शा वोइक्तीनी। मेको  
इन थुंम बाक्त, दे तुइक्ताक्ड। १४ गो  
पाप पाता हना, गे आं कली कोव्रना  
कोव्रन बाक्नीनी। मिनु आं मरिम्शो पशो  
मक्याम्नीनी। १५ गो थमान इन अरेशो  
मटीब बाक्ती हना, आं कली हिंचा डा  
दुम्ल। गो ठीक पाइब बाक्ती हना यो, आं  
पिया पोक्ने मचाप्नुड। मारदे हना गो आं  
मुनेम ब्रीशा, आं श्येत तना तन बाक्नुड।  
१६ गो ठेयब लेशशो बाक्ती हना, गे गुप्स  
कली सिखार ग्यारशो खोदेशो पा आं  
कली माल्यीनी वा। मिनु लेंशा इन ठेयब  
सक्तिम श्येत गेयीनी वा। यवैया ३८:१३ १७ गो  
आं मरिम्शो पशो आ पबर्म नक सांकछी  
चाक्नीनी। मिनु आं पबर्म इन गाइक्तीक  
तेम्नीनी। आं पबर्म इन हुल हुल लडाइ  
पाइबपुकी चाक्नीनी।

१८ गो मारदे आं कली जरमेपपाइक्नी?  
आं कली सुइम मतथु, बेक्शो नड हना,  
रिम्शो दुम वा। अय्युब ३:११; येरमीया २०:१४  
१९ गो जरमेसीन मजरमेशो नड हना,  
शाम्सीशा तुरसुम जाक्दीश्शो नड हना,  
दुम वा। २० आं ब्रोंइतीक नाक्ती शुश  
मबाक्नीम। आं कली आं कान प्रोंइयीनी।  
मिनु आं थुं इच्का नांइसीबा कों?  
२१ लेशशा मजाक्तीक रागीम लचा क्येडा  
डोंइती, थम छिडछिड नु क्येर नाक्दो  
२२ नु ग्रांग्ये माग्ये दुम्तीकेम लचा क्येडा  
डोंइती आं कली आं कान प्रोंइयीनी।  
मेकेर डा छेडछेड यो छिडछिड दुम्त”  
दे अय्युबम परमप्रभु कली देंमाक्त।

अय्युब ७:१०

## सोफारमी अय्युब कली दोस गेशो

११ मिनु नामा डा सोफारमी  
२ “मार, गो एको इश्का लोव्र  
आ पबर्म लोव्र मलेत्नुडा? मार एको  
लोव्रमाते आ लोव्र नेल्ल ठीक बाक्बा  
डा? ३ इन गेनायो मनुप्तीक लोव्रम  
मुर आन कली सिक्सी पपाइक्बा? गे  
शुक्शी पनीनु, इन कली मुने मदुम्बा?  
४ गे ‘आं शेंशो ठीक बाक्ब। परमप्रभु,  
आ डोंइती गो ग्रांग्रा मदिशो बाक्ती’  
देंनीनी। अय्युब ६:२१; अय्युब १०:७ ५ परमप्रभु  
ब्वाक्ल। मिनु इन कली लोव्र पवल दे  
आस पाइनुड। ६ मिनु मेकोमी खुइश्शो  
तुइक्तीक इन कली शेंदल। मारदे हना  
तुइक्तीक शुश बाक्नीम। परमप्रभुम इन  
मरिम्शो पशो आ पा डा तचा माल्शो  
सजाइ मगेव। इच्का ला गेप्तु।

७ मार, गे परमप्रभु आ खुइश्शोम मिम्शो  
तुइक्ने चाप्नीनी? गे नेल्ल क्येडा ठेयब  
सक्ति पाइश्शोम मार पने चाप्बा, मेको  
तुइक्ने चाप्नीनी? ८ मेको सरीड क्येडा  
यो इर बाक्ब। गे मार पने चाप्नीनी डा?  
मेको बेक्शो मुर आन बाक्तीक क्येडा  
यो लुकच लशो बाक्ब। गे मार तुइक्ने  
चाप्नीनी डा? ९ मेको पुक्शोनु रागी क्येडा  
यो लाइश्शो बाक्ब। मिनु समुन्द्र क्येडा  
यो ब्रेम्शो बाक्ब। १० मेको जाक्शा, मुर  
आन कली जेल्खानम चोक्शा, मुर आन  
कली निसाफ पचा कली खुप्ताक्व हना,  
सुम मेको कली तेक्ने चाप्बा डा? ११ सु सु  
शोर गाक्शो मुर बाक्मा, मेको परमप्रभुमी  
तुइक्ब। मेकोमी मरिम्शो पाइब आन कली  
तुइक्ब। १२ मूर्ख मुर रुब्ब दुम्ने मचाप्ब।  
मेको मो दुम्त हना, ब्वाकी डा गधा आ  
चाइक्ब मुर दुम्शा जरमेशो खोदेशो दुम्ब।

१३मो हना यो गे इन थुं परमप्रभु गे हिरनीनी, गे इन गुइ पोक्शा, मेको कली पुंडनीनी। १४मिनु गे मरिम्शो पाइन बाक्तीनी हना, मेको कली थुमीन। मिनु परमप्रभु यावे आ अरेशो मटितीक इन ताम्बुम बाक्चा मगेन। १५नोले गे थमा पा मारेइ दोस मतथु इन पिया पोक्नीनी। रिम्शो पा महिंथु बाक्नीनी। १६मिनु गे इन श्येत प्रेंनीनी। गे मेको कली शाइश्शा लशो ब्वाक्कु खोदेशो मिम्नीनी। १७इन ब्रोंइतीक नाक्त डा छेडछेड खोदेशो दुम्ब। मिनु इन श्येत डा छिडछिड सुनी डा छेडछेड खोदेशो दुम्ब। १८गे थमा सुइक्नीनी। मारदे हना मेकेर आस बाक्ब। गे कोव्रचा पुंडसीशा, महिंथु रिम्शो पा बाक्नीनी। *भजन संग्रह ४:६* १९गे सुइ आन क्येडा महिंथु इप्नीनी। मिनु शुश मुरुम इन शिशी तचा कली आस पाइनीम। २०तन्न परमप्रभु यावे आ अरेशो मटीब आन मिक्च मताइनीम। मेको आन प्रोक्तीक लां देक्ब। मिनु मेको आन आस बेक्चा बाक्ब” दे सोफारम अय्युब कली देंमाक्त। *अय्युब ८:१४*

### अय्युबम सोफार कली लोत्र पशो

**१२** मिनु अय्युबम लोत्र लेशशा २“गेपुकी थमा पा हिक्सीशो मुर बाक्नीनी। मिनु तुइक्तीके गेपुकी नु बेक्शा लाइब। गो मेको तुइक्नुड। ३तन्न इन खोदेशो रुप्तीक थुं आं के यो बाक्ब। गो यो इन खोदेशो जोक्ब तुइक्ब नड। मेको मुर नेल्लेम तुइक्नीम। ४आं वारचपुकीमी आं पबंम रित्नीम। गो परमप्रभु कली पुंडता। मिनु मेकोमी लोत्र लेत्ताक्यी। गो ठीक पाइब दोस मताइब मुर बाक्ती हना यो, आं पबंम

रित्नीम। ५श्येत मजाइब, रिम्शो पा बाक्ब मुरपुकीम हिंचा डा श्येत जाइब आन कली तशा प्रांग्रा दीनीम। गे श्येत जशा ग्रेक्चा चिक्शो कली श्येत तेम्नीनी। ६मिनु रोइक्ब आन ताम्बुम थुं नाइश्शा बाक्नीम। मिनु परमप्रभु कली गाइक्पाइक्बपुकी रिम्शो पा ब्रोंइशा बाक्नीम। मेकोपुकीम आंम सक्ति कली ठेयब सेल्नीम। *हबकुक १:११*

७मुल ब्वाकी डा जन्तु आन कली हिल्लो पने। मेकोपुकीम इन कली शेंनीम। सरीडम बेरब चिक्ब आन कली हिल्लो पने। मेकोपुकीम इन कली देंनीम। ८गे खप कली हिल्लो पने। मेकोमी इन कली शेंब। समुन्द्र डा डांइपुकीम इन कली शेंनीम। ९परमप्रभु यावेम मेको नेल्ल पशो बाक्ब, दे सुम मतुइक्नीमी डा? १०ब्रोंइशा बाक्ब नेल्ल आन ब्रोंइतीक नु मुर नेल्ल आन ब्रोंइतीक सोक्त मेको आ गुइमी बाक्ब। *गन्ती १६:२२; प्रेरित १७:२८* ११जचा थोव्रक ब्रोव्रशो नु मब्रोव्रशो लेंम तुइश्शो खोदेशो पा, पशो लोत्र रिम्शो नु मरिम्शो नोफाम मनेंबा डा? १२खाल्पा आन दातेम तुइक्तीक बाक्ब। खूशो आन दातेमी रुप्तीक बाक्ब। *अय्युब ८:८*

१३मिनु परमप्रभु नु तुइक्तीक नु सक्ति बाक्शो बाक्ब। मेको नु अर्ती गेतीके नु रुप्तीक थुं बाक्शो बाक्ब। १४मेकोमी प्रेतु हना, मेको लेंशा सेल्ले मचाप्नीम। मेकोमी मुर कली जेल्खानम चोक्तु हना, सुइमी मेको कली गुंइने मचाप्नीम। *प्रकाश ३:७* १५मेकोमी ब्वाक्कु तेक्तु हना, रू नेल्ल सोव्रनीम। मेकोमी ब्वाक्कु प्रोंइतु हना, रागी खतम पोक्ब। *१राजा १७:१,७; उत्पत्ती ७:१६-२३* १६सक्ति नु तुइक्तीक परमप्रभु नु बाक्ब। दूली पाइब नु दूली

पपाइक्ब, निम्फा आ केन बाक्नीस।  
 १ राजा १२:२८-३०; २ राजा १६:१०-३७ १७ मेकोमी  
 अर्ती गेब आन कली मुने दोक्पाइक्ब।  
 मिनु निसाफ पाइब आन कली मूर्ख सेल्ब।  
 १८ पिप आन फेक्शो वा पुइक्ब। मिनु  
 मेको आन कली क्विप्शुर क्विप्पाइक्ब।  
 १९ चढ़ेब आन कली मुने दोक्पाइश्शा  
 सोइक्ब। डोंइती रे गेय पाइब आन कली  
 गुंडब। १ सामुएल २:३०-३२; १ सामुएल २२:१८-१९  
 २० थमा सुइक्चा पुंडसीशो शेंब आन कली  
 सिक्सी पपाइक्ब। खाल्पा आन तुइक्तीक  
 लोत्र शोर गाक्शो सेल्ब। २१ हुकुम पाइब  
 आन कली शुक्शी पचा पुंडसीब सेल्ब।  
 सक्ति पाइश्शो आन कली मचाप्ब सेल्ब।  
 १ सामुएल १७:५; १ सामुएल ३१:६; २ राजा १६:३७;  
 दानीएल ४:२६,३० २२ मेकोम छिडछिड आगाम  
 बाक्शो गुंडब। मिनु थम छिडछिड कली  
 छेडछेड सेल्ब। २३ रागी रागी आन कली  
 हिक्सीशो सेल्ब। नोले मेको आन कली  
 खतम सेल्ब। रागी रागी आन कली ठेयब  
 सेल्शा, मेकेर डा मुर आन कली एर ओंथ  
 ब्रपाइक्ब। २४ रागी डा हुकुम पाइब आन  
 कली मरुप्ब सेल्ब। मिनु नोले मेको आन  
 कली लां मबाक्शो गोरशो रागीम एर ओंथ  
 हिरपाइक्ब। २५ मिनु मेकोपुकी हाम्सो  
 मबाक्तीके, छिडछिडम सुल्शा गाक्नीम।  
 मेको आन कली दुक्शो मुर खोदेशो पा  
 गोल्चा चिक्शा गाक्पाइक्ब।

### अय्युब आ लोत्र

१३ गो मेको नेल्ल ताता। गो मेको  
 नेंशा रुप्ता। २ इन तुइश्शो,  
 गो यो तुइक्नुड। गो इन क्येडा मतुइक्ब  
 मनड। ३ तन्न गो नेल्ल क्येडा ठेयब सक्ति  
 पाइश्शो आ डोंइती लोत्र पाइनुड। मिनु  
 गो परमप्रभु नु लोत्र पा, आं पबर्म हिल्लो

पाइनुड। ४ गेपुकीम चहिं इन जोल लोत्र  
 पा ठेयब सेल्सीनीनी। गे शोर गाक्शो  
 लेम्ब बाक्नीनी। ५ गेपुकी सिक्सी पा  
 बाक्शो ननी हना, तुइक्ब मुर बाक्नीनी,  
 दे तुंडस वा। हितोपदेस १७:२८ ६ मुल आं  
 लोत्र नेनीन। पचा माल्शो लोत्र इन नोफा  
 दाइश्शा नेनीन। ७ गेपुकी परमप्रभु आ  
 लोत्र पखु पाइनीनी? मोदेशो जोल लोत्र  
 कली थमा बाक्ब, दे थमा सेल्नीनी?  
 ८ मार गेपुकी परमप्रभु आ कुल कोत्रशा,  
 मेको आ पा डा पचा माल्शो लोत्र  
 देंनीनी? ९ परमप्रभुमी इन कली नाक्शा  
 कोत्रडानु, गे नेल्ल ठीक बाक्नीनी? मार,  
 मुर आन मिक्च सिल्शो खोदेशो पा, मेको  
 आ मिक्च यो सिल्लने चाप्नीनी? १० गे  
 खुइश्शोमी कुल कोत्रनीनी, परमप्रभुम  
 इन कली थमा पा हुइक्ब। ११ परमप्रभु  
 आ मान ततीकेम इन कली महिंपाइक्बा?  
 मेको आ हिंच कोइश्शोमी इन कली ग्येत्थ  
 लुक्च मसेल्बा? १२ इन आं कली देशो  
 लोत्र पुलु ला बाक्नीम। इन बोल्यो अर्ती  
 खप के बाक्नीम।

१३ सिक्सी पा बाक्कीन। मिनु गो लोत्र  
 पाइनुड। मिनु आं पबर्म मार मार दुम्बा,  
 दुम्ल। १४ गो ब्रोंइनुडा देय मब्रोंइनुडा।  
 गो बेक्नुडा कों ब्रोंइनुडा। १५ मेकोम  
 आं कली साइक्ब। गो आस मपाइनुड।  
 तन्न मुल गो आं लोत्र मेको आ डोंइती  
 वोइक्नुड। १६ परमप्रभु कली मटीब  
 मुर मेको आ डोंइती जाक्ने मचाप्नीम।  
 मेको आं कली प्रोंइतीक दुम्ब। १७ नोफा  
 दाइश्शा, आं लोत्र नेनीन। मिनु आं शेंशो  
 रिम्शो पा नेनीन। १८ गो आं देचा माल्शो  
 लोत्र ठीक पाता। मिनु नोले गो दोस  
 मताइब बाक्नुड, दे तुइक्नुड। १९ सुमी  
 आं कली कछडी बाक्शा, दोस गेने

चाप्बा? मोदेशो दुम्त हना, गो सिक्सी पा फाल्शा बाक्शा, बेक्नुड। २० परमप्रभु, गो इन कली थोव्रक निक्शी पुंडनुड। मिनु गो इन डोंइती रे मखुइक्नुड। २१ आं कली श्येत मगेयीनी। मिनु इन हिंपाइक्तीकेमी आं कली महिंपतीनी। अय्युब ६:३४ २२गे आं कली ब्रेत्तीनी। मिनु गो लोव्र लेत्नुड। डोंइती गो ब्वाक्नुड। मिनु गे आं कली लोव्र लेत्तीनी। २३ आं मरिम्शो पशो नु आ पाप गिश बाक्नीमी? आं हेंथे पशो नु आं पाप तुइक्पाइय्यीनी। २४गे मारदे इन कुल खुइक्नीनी? मिनु आं कली इन जोरी सत्रु खोदेशो पाइनीनी। अय्युब १६:११ २५गे बेरशो सफा कली यो हिंच कोइनीनी? गे सोव्रशो भूस आ नोले खोइक्नीनी? २६गे आं परबम कशो लोव्र ब्रेक्नीनी। मिनु आं ठिटा ना डा मरिम्शो पशो आ परबम सजाइ गेतीनी। भजन संग्रह २५:७ २७ आं खोइलीम ठेंडरो थोक्ताक्नी। आं लां नेल्ल कोव्रशा, वोइक्नीनी। अय्युब ३३:११ २८ मोपतीके मुर राक्शो थोव्रक खोदेशो पा जाम्नीमी। तुम्बुम खोइश्शो वा खोदेशो पा नुप्शो बाक्नीमी” दे अय्युबमी देंमाक्त।

### ब्रोंइचा नु बेक्चा आ परबम लोव्र

१४ मिनु लेंशा अय्युबमी “मीश मुर रे जरमेशो बेक्शा लाइब मुर इच्का नाक्त ब्रोंइशा, श्येत ला जाइब। २मेको फू खोदेशो पा बोइश्शा, सोल सुल बेक्ब। वांकु जाम्शो खोदेशो पा जाम्शा लाइब। भजन संग्रह ६०:३ ३गे मोदेशो कोव्रनीनी? मिनु गे आं कली निसाफ पाइनीनी? ४सुमी ग्रांग्रा दिशो रे ग्रांग्रा मदिशो सेल्ने चाप्बा? सुइमी मचाप्ब। ५मुर आ ब्रोंइतीक नाक्ती हिक्शा वोइश्शो बाक्नीम। मिनु मेको गिश महिना ब्रोंइशो

बाक्नीमी, मेको तुइक्नीनी। इन देशो नाक्त लाक्ने मचाप्नीम। भजन संग्रह ३१:१६; भजन संग्रह ३६:५ ६गे मुर आन कली मकोव्रडीन। मिनु नाक्त किंत किंत गेय पाइब मुर खोदेशो ग्येरशा बाक्चा गेन। अय्युब ७:१-२

७रवा कली आस बाक्ब। तिम्शो नोले यो कोच्चा दाप्ब। मिनु वाना वान बाक्नीम। ८मेको आ शाक्श खप आगाम चोक्ताक्व हना यो, मेको आ ठुटा खप आगाम राक्त हना यो, ९लेंशा इच्का ब्वाक्कु तवानु, वाब। मिनु ठेयब रवा खोदेशो पा राशी दाप्ब। १०तन्न बेक्शा लाइब मुर बेक्शा जाम्शा लाइनीम। मुर आ सोक्त लाइब। मिनु ते लाइबा मतुंडसीब? ११दोपा दोम्ली डा ब्वाक्कु इच्का पा सोव्रना सोव्रन लाइबा, दोपा खोला आइक्च दुम्ना दुम्न लशा सोव्रबा, १२मोपा बेक्शा लाइब मुर गोल्ब। मिनु मेको लेंशा गेनायो मबोक्ब। सरीड मक्याम्से सम्म, बेक्शो मुर लेंशा मबोक्नीम। मेको आन निन्द्रा रे मसेंसीनीम। अय्युब ७:१० १३गे आं कली बेक्शो मुर आन बाक्तीकेम खुइक्तीन। इन गाइश्शो मनाइक्तीनी सम्म आं कली खुइक्तीन। मिनु नोले आं कली फ्रुक्शा, गो नु गुम्तीक नाक्त का वोतीन। यसैया २६:२० १४मार, बेक्शो मुर लेंशा ब्रोंइनीमी डा? गो रिम्शो नाक्त कली रिम्शा बाक्नुड। आं श्येत मथुमु सम्म रिम्शा बाक्नुड। १५मिनु गे आं कली ब्रेन्नी नोले, गो इन कली लोव्र लेत्नुड। मिनु गे इन आंम गुइम सेल्शो मुर, आं कली, शिशी पाइनीनी। १६गे आं पशो नेल्ल मकोव्रनीनी। गे आं पाप हिक्शा मवोइक्नीनी। १७आं हेंथे पशो नेल्ल ब्रेक्शा, इन थैलोम वोइश्शो बाक्ब। गे

आं मरिम्शो पशो नेल्ल सुम्शा वोइश्शो बाक्नीनी। होसे १३:१२

१८मिनु डांडा ब्रेश्शा, जाम्शा लाइब। सेरथे फुल्लु मेको आ बाक्तीक रे याक्सीशो बाक्नीम। १९ब्वाक्कुम फुल्लु आन कली योल्ब। बारशो ब्वाक्कुम रागी डा खप योल्ब। मोपा गे मुर आन आस थुम्पाइक्नीनी। रोमी ५:५ २०गे मेको आन कली गेना हना यो ग्रानीनी। मिनु मुर बेक्नीम। गे मुर आन रां फाइश्शा ताइक्नीनी। २१मेको आन आल ठेयब दुम्शा मान पाइक्का पुंडसाक्म हना यो, मेकोपुकीम मतुइक्नीम। आइक्च सेल्चा पुंडसाक्म हना यो, मतुइक्नीम। २२मेकोपुकीम आन रां डा श्येत ला तुइक्नीम। मिनु आन पर्वम ला रोंका पाइनीम” दे अय्युबमी देंमाक्त।

### एलीफाजमी लोव्र पशो

१५ मिनु तेमान डा एलीफाजमी २“मार, जोक्ब तुइक्ब मुरुम ओदेशो डर ना पुं डा लोव्र पा लोव्र लेत्चा दुम्बा? मेको आ कोव्रजीम फश लोव्रमी प्रिंचा दुम्बा? ३जोक्ब तुइक्बमी इन कली शोर गाक्शो लोव्र लेत्चा दुम्बा? मारेइ रिम्शो मपाइब लोव्र लेत्चा दुम्बा? ४गे परमप्रभु कली मान पा हिंतीके तेक्नीनी। मिनु परमप्रभु कली मिम्शा पुंड्चा यो तेक्नीनी। ५इन देशो नेल्ल इन मरिम्शो पतीके रे पिशो बाक्ब। गे मिलो शिलो पशो दाक्नीनी। ६इन आंम लोव्रमी इन कली दोस ताइब सेल्ब। गो इन कली दोस मगेनुड। इन लोव्र इन पर्वम सांकछी बाक्ब।

७गे मुर आन दातेमी नेल्ल क्येडा डोंइती जरमेशो ननी? मार गे डांडा आन क्येडा

डोंइती दुम्शो ननी? ८गे परमप्रभु आ अर्ती गेतीकेमी बाक्शा नेंनी? तुइक्तीक इन के ला बाक्ब, दे मिम्नीनी? अय्युब ११:७; रोमी ११:३३ ९गो आंड मतुइश्शो गे मार तुइक्नीनी डा? गो आंड मरुप्शो गे मार रुप्नीनी डा? अय्युब १३:२ १०मिनु खाल्पा नु खूशोपुकी गो नु बाक्नीमी। इन आफ क्येडा यो खूशो मुर गोपुकी नु बाक्नीम। ११परमप्रभुम इन कली लेम्शो आइक्च मिम्नीनी? इन कली आइक्च सेंदाम रिम्शो लोव्र पशोमी इन कली मगाम्मे? १२मारदे इन थुमी इन कली दूली सेल्बा? मिनु गे मारदे गाइश्शा, मिक्च केक्शा कोव्रनी? १३मारदे गे इन गाइक्तीक परमप्रभु कली कोइनीनी? मिनु गे ओदेशो लोव्र पाइनीनी? १४बेक्शा लाइब मुर नेल्ल दोस ताइब दुम्नीम। मीश मुर रे जरमेशो सु ठीक पाइब बाक्ने चाप्बा डा? अय्युब १४:४ १५परमप्रभुम आंम आ मुर आन कली थमा मसुइक्ब। मिनु स्वर्गम बाक्ब यो मेको आ डोंइती दोस ताइब बाक्नीम। अय्युब ४:१८; अय्युब २५:५ १६मेको आन क्येडा ग्रांग्रा दिशो नु खराप दुम्शो कली दोपा थमा सुइक्बा डा? मेकोमी मरिम्शो पतीक ब्वाक्कु तूशो खोदेशो पा तूब कली दोपा थमा सुइक्बा डा?

१७मिनु गो इन कली शेंनन्नी। आं लोव्र नेनीन। गो आं तशो इन कली शेंनन्नी। १८जोक्ब तुइक्बमी आन किकी पिपी रे आन तशो नेंशो लोव्र मखुइक्तमे बाक्त। १९मेको आन कली रागी आंम के सेल्चा कली गेशो बाक्माक्त। मेको आन दातेम अर्को रागी डा मुर सुइ मबाक्मा बाक्त। २०परमप्रभु यावे आ अरेशो मटीब ब्रोंइमा सम्म श्येत जाइनीम। मरिम्शो मुर आन ब्रोंइतीक बर्स नेल्ल मोदेशो बाक्नीम।

उत्पत्ती ४:१४ २१ मेकोपुकीम हिंचा डा रेयके नेंनीमी। मेको मारेइ मारेइ गाप्शा बाक्मानु, मेको आन कली खतम सेल्ब जाक्ब। २२ मेकोपुकीमी 'छिडछिड रे लेत्ने मचाप्नीक' दे हिंनीम। मेकोपुकी तरवारम क्योरचा पुंडसीनीम। २३ मेकोपुकी जचा थोव्रक माल्शा, हिरना हिरन बाक्नीमी। मिनु आन श्येत जतीक नाक्ती जाक्चा चिक्शो बाक्ब, दे तुइक्नीमी। २४ मेकोपुकी श्येत नु हिंतीके आ पर्वम खिंखि पाइनीम। मेकोपुकीमी परमप्रभु कली लडाइ तोइनीम। लडाइ पचा चिक्शो पिप खोदेशो पा सासीशो बाक्नीम। २५ मारदे हना मेकोपुकीम परमप्रभु आ पर्वम आन गुइ क्युक्शो बाक्नीम। मिनु नेल्ल क्येडा ठेयब सक्ति पाइशो कली 'गो इन क्येडा ठेयब नकी' दे मेको कली मटीनीम। २६ मिनु ठेयब नु बोल्यो तेक्तीक शेशा परमप्रभु कली लडाइ तोचा कली बारशो बाक्नीम। २७ मारदे हना मेकोपुकी शुश जशा, दोम्शो बाक्नीम। २८ मेकोपुकी ब्रेशो सहर नु मुर मबाक्चा डा खिंम बाक्नीम। मेको खिं ब्रेशा फुल्लु देल्शो बाक्नीम। २९ मेकोपुकी शोप पाइशो मदुम्नीम। मेको आन शोप मलीब। मेको रागीम मलीनीम। ३० मेकोपुकी छिडछिड रे ब्रॉइने मचाप्नीम। मीम मेको आन ठोसा सोव्रपाइक्ब। मेको आन फु कली फशेम योल्ब। ३१ मेकोपुकीम मबाक्शो लोव्र कली थमा मसुदमेक्ल। मोपा आम आन कली मरिम्शो मसेल्मेक्ल। मारदे हना मेकोपुकीम मेको आ पा डा मारेइ मताइनीम। ३२ मेको आन नाक्त जाक्चा क्येडा डोंइतीन मेको आन मारेइ मारेइ नुक्ब। मिनु मेको आन राशी गिगी मदुम्नीम। ३३ मेकोपुकी क्येखीन हेम्शो

अडगुर बोट खोदेशो दुम्नीम। मेको फू हेम्शो तेल रवा खोदेशो दुम्नीम। ३४ मारदे हना परमप्रभु आ अरेशो मटीब नु गाक्ब शोर गाक्शो बाक्ब। घूस जाइब आन ताम्बुपुकी मीम नेक्ब। ३५ मेकोपुकीम आल कुरशो खोदेशो पा मरिम्शो मिम्तीके कुरनीम। मिनु मरिम्शो पतीके जरमेनीम। मेको आन थुंम मरिम्शो पचा कली ठीक दुम्नीम" दे एलीफाजम अय्युब कली देंमाक्त। यसेया ५६:४

### अय्युबमी लोव्र लेशो

१६ मिनु अय्युबमी २ "गो ओदेशो लोव्र शुश नेंता। गे नेल्ल मोशा लेम्बु पाइब ला बाक्नीनी। ३ मार मेको फश लोव्र गेनायो मनुप्बा? मारम इन कली ओदेशो लोव्र पपाइक्बा? ४ गे आं खोदेशो बाक्नी हना, गो यो इन खोदेशो पा लोव्र पने चबु वा। गो इन कली यो मोदेशो लोव्र पड वा। गो इन कली शुक्शी पा आं पिया हिकशा कोंइदन्नी वा। भजन संग्रह २२:८ ५ गो इन थुं बारपाइक्तीक लोव्र पड वा। मिनु आं शिशी पाइक्तीकेमी इन कली लेम्द वा।

६ गो ब्वाक्ती हना यो, आं खाइशो मसाब। गो सिक्सी पा बाक्ती हना यो, श्येत जस डा जस बाक्नुड। ७ थमा पा, परमप्रभुम आं कली थाम्पा दपाइक्ती। आं एर ओंथ डा नेल्ल आन कली खतम सेल्लु। ८ मेकोम आं कली रोम्पाइक्ती। मिनु एको आं पर्वम सांकछी दुम्शो बाक्ब। गो रुश नु कुशुल ला लीशो बाक्नुड। एको यो आं पर्वम सांकछी दुम्शो बाक्ब। ९ परमप्रभुमी आ गाइशोमी आं कली एर ओंथ फ्रशो बाक्ब। मिनु आं कली काइ मदाक्ब। मेकोम आं पर्वम आ खुइ शेप्शो

बाक्ब। आं जोरी सत्रुमी आं कली सिम्ले पा कोव्रशो बाक्नीम। १० मुरपुकीम आं कली शुक्शी पशो बाक्तेकम। मेकोपुकीम आं चोव्रचो शुश राप्शो बाक्तेकम। आं कली मरिम्शो पाइक्चा कली बुक्तेकम। ११ परमप्रभुम आं कली थमा मसुइक्ब आन गुइमी गेशो बाक्ब। मिनु परमप्रभु यावेम आं कली आ अरेशो मटीब आन गुइम ब्वारशो बाक्ब। १२ गो रिम्शो पा बाक्शो नड। तन्न मेकोमी आं कली खोइक्तु। आं शुरम ग्याइशशा चोकटा लाम्टा सेलती। मेकोम आं कली आ मिक्च आ क्रिक्बील सेलती। *बिलाप ३:१२* १३ आ लिब्रा आप्बपुकीम आं एर ओंथ नेल्ल हिरशो बाक्नीम। मेकोम आं कली शिशी मपथु, आं चिच ख्रित्ताकयी। मेकोम आं खाइल पुक्शा खपीम तोक्तु। १४ मेकोम आं कली पाक्ना पाक्न, लडाइ पाइब खोदेशो पा आं गे बारब। १५ गो आं रां सुम्चा कली भाडग्रा फेक्साकयी। गो आं पिया फुरकुम पुम्ता। *लेवी ३७:३४* १६ डाक्शा डाक्शा आं कुल लल जिशो बाक्ब। आं मिक्च आ एर ओंथ नेल्ल क्येर दुम्शो बाक्ब। १७ मो हना यो आं गुइमी मरिम्शो मपशो बाक्ती। आं पुंडशो लोव्र रिम्शो बाक्ब।

१८ ए खप, आं हुश मसुमो। आं पुंडशो लोव्र गेनायो मनाइसेक्ल। *उत्पत्ती ४:१०; इजीकीएल २४:७-८* १९ मो हना यो आं सांकछी स्वर्गम बाक्ब। आं पर्वम लोव्र पाइब इर बाक्शो बाक्ब। *अय्युब १७:३* २० आं वारचम आं कली शुक्शी पाइनीम। गो डाक्शा परमप्रभु गे कोव्रनुड। *१ सामुएल २:२५* २१ मेकोमी परमप्रभु नु आंस दातेमी निसाफ पवल। मुर नु आ वारच आन दातेमी दोपा निसाफ पाइबा, मोपा पवल।

२२ इक्का बर्स नोले गो गेनायो मलेत्वा डा पा लाइनुड” देंमाक्त। *अय्युब १०:२१*

परमप्रभु कली “वारच पने” दे पुंडशो

१७ मिनु अय्युबमी “आं थुं जिक्शो बाक्ब। आं नाक्त नुप्शा लशो बाक्नीम। आं कली तुरस ठीक दुम्शो बाक्ब। २ थमा पा, आं एर ओंथ शुक्शी पाइब बाक्नीम। मेको आन शुक्शी पशो मारेइ ममिम्नुड। *अय्युब १६:१६*

३ परमप्रभु, गे आंमा आं जाकटी दुमीन। अरु सु आं पर्वम जमानी बाक्ने चाप्बा डा? ४ गे मेको आन थुं रे रुप्तीक गुंडताक्नी। मोपतीके गे मेको आन कली ठेयब दुम्चा मगेनी। ५ सुमी आ शोप वारच आन कली कोंइशा योक्चा कली ब्रेप्बा, मेको आ आल जचा मताइनीम।

६ मेकोमी आं कली मुर नेल्ल आन दातेम कथा पतीक का सेल्लो बाक्ब। मुरपुकीमी आं डोंइती तोक्सीनीम। *अय्युब ३०:६* ७ आं मिक्च श्येत जतीके ब्रा ब्रा दुम्शो बाक्ब। आं गुइ खोइल सोव्रशो बाक्नीम। गो वांकु खोदेशो बाक्नुड। ८ रिम्शो थुं पाइशशो मुर मेको तशा, छक लाक्नीम। दोस मताइबपुकी परमप्रभु यावे आ अरेशो मटीब आन कली तशा गाइक्नीम। ९ मिनु ठीक पाइब मुर आंम लां रिम्शो पा गाक्नीम। मोदेशो मुर बोल्यो क्येडा यो बोल्यो दुम्ना दुम्न लाइनीम। १० मुल गे नेल्ल लेतीन। गो इन दातेमी निप्स पाइशशो मुर का यो मतडमी। ११ आं नाक्त नुप्तेकम। आं मिम्शो नेल्ल मोशा दुम्त। मिनु आं थुं डा मिम्शो जाम्शा लत। १२ मेको मुरपुकीम नाक्दो कली नाक्त देंनीम। मिनु सुनी दुम्मेनु “नां रिक्त” देंनीम। १३ गो आं आस पशो खिं बेक्शो

मुर आन बाक्तीक बाक्त हना, आं ब्राख्ये छिडछिडम सेलता हना यो, १४ गो तुरस कली 'गे आं आफ बाक्नीनी' मिनु लुस्पु कली 'आं ममा आं समी बाक्नीमी' देंती हना, १५ आं आस पशो ते लाक्गा? मिनु सुम आं पर्बम आस पाइबा? १६ मार एको बेक्शो मुर आन बाक्तीक आ नेक्था लाइबा? मार, गो नेल्ल उइ फुरकुम काथा लाइनया?" दे अय्युबम देंमाक्त।

### बिल्दादम लोत्र पशो

१८ मिनु शुआह डा बिल्दादमी २ "गे एको लोत्र गेना थुम्नीनी? डोंइती मिम्तीन। मिनु गो लोत्र पने चाप्नय। ३ मारदे आंइ कली बी ब्यफ खोदेशो मिम्तीनी? गे मारदे आंइ कली निप्स मपाइश्शो सुइक्नीनी? ४ गे इन गाइश्शोम आंम कली खतम सेल्सीनीनी। मार, इन पर्बम गो रागी प्रोंइनीकी? सेरथे फुल्लु आन बाक्तीक रे याक्चा?

५ थमा पा, परमप्रभु यावे आ अरेशो मटीब आन बत्ती काप्ब। मिनु मेको आन मी डा राप रे हाम्सो मयूब। *हितोपदेश १३:६* ६ मेको आन ताम्बुम छेडछेड, छिडछिड दुम्ब। मिनु मेको आन बत्ती काप्शो बाक्ब। *अय्युब २१:१७* ७ मेको आन लांमी आन खोइली ग्येत्थ लुकच पाइब। मिनु मेको आन थुंम मिम्शा पशोमी मेको आन कली खोल्ब। ८ आंम खोइलीम मेको आन कली ब्वारदम लपाइक्ब। मेको ब्वारदम गिलसीशा बिक्तीकेमी दोक्नीम। ९ मेको आन खोइली ब्रिम्सोम रेत्चा पुंइसीनीम। क्येयलम रेत्चा पुंइसीनीम। १० मेको आन पर्बम खपीम ब्वारद आ डोरी खुइश्शो बाक्ब। मोपा आन लांमी ब्वारद दाइश्शो बाक्ब। ११ शुश हिंतीकेम मेको आन

कली खिंखि पपाइक्ब। ते बाक्तेकम हना यो, मेकेर हिंतीके यो बाक्ब। *लेवी २६:३६* १२ मेकोपुकी शोत्रलु बेक्तीके सक्ति मपाइश्शो बाक्नीम। मिनु श्येत दुम्शा गोल्नीम। १३ रोइ पतीकेमी मेको आन कुशुल नेल्ल नेक्शो बाक्ब। बेक्पाइक्ब रोइमी मेको आन गुइ खोइली मदुक्ब सेल्ब। *गन्ती १२:१०-१२* १४ मेको आन ब्रोंइशा बाक्तीक रां आन पर्बम 'रिम्शो बाक्ब' दे थमा सुइश्शा, मुल रां रे गुंइचा पुंइसीनीम। मिनु हिंपाइक्ब पिप आ बाक्तीके लाइक्चा पुंइसीनीम। १५ मेको आन ताम्बुम मारेइ मलीब। मेको आन बाक्तीकेम गन्धक ब्रुइश्शो बाक्ब। १६ मेको आन शाक्श खप आगाम सोत्रनीम। मिनु आन राशी सोल सुल बेक्नीम। १७ रागी डा मुरुम मेको आन कली प्रेंनीम। मेको आन नें ममिम्नीम। १८ मेको छेडछेड रे छिडछिडम खेरचा पुंइसीनीम। मिनु रागी रे गुंइचा पुंइसीनीम। १९ मेको आन आल मबाक्नीम। आन चच युइ यो मबाक्नीम। मेको आन डोंइती डा बाक्तीकेमी सुइ ब्रोंइशा मबाक्नीम। २० पच्छिम डा मुरपुकी मेको आन श्येत जशो नेंशा हिंनीम। पूर्व डा मुरपुकी शुश हिंशा खिंखि पाइनीम। *भजन संग्रह ३७:१३* २१ थमा पा, परमप्रभु आ अरेशो मटीब मुर आन बाक्तीके मोदेशो दुम्ब। परमप्रभु कली मतुइक्ब मोदेशोन दुम्नीम" दे बिल्दादम अय्युब कली लोत्र लेत्ता बाक्त।

### अय्युबम लोत्र लेशो

१९ मिनु अय्युबमी २ "गे आं कली गेना सम्म श्येत गेनीनी? मिनु इन लोत्रमी आं कली मरिम्शो सेल्नीनी? ३ आं कली १० खेयप सम्म दोस गेतीनी।

आं कली काइ मरिम्शो लोव्र पचा मुने मपाइनीनी? ४ गो थमा पा मरिम्शो पशो बाक्ती हना यो, मेको मरिम्शो पशो आं के बाक्ब। ५ थमा पा, मे आं क्येडा ठेयब दुम्चा मिम्नीनी। मिनु आं श्येत तशा, आं कली मरिम्शो सुइक्नीनी। ६ परमप्रभुमी आं कली मोशा श्येत गेती। आं एर ओंथ नेल्ल ब्वारद दाइश्शो बाक्ब। ७ गो 'हुश ख्वाक्श पोक्तीमी' दे ग्रीती हना यो, आं कली लोव्र मलेप्ब। 'वारच पाइय्यीनी' दे पुंडता हना यो, निसाफ मताइनुड।

येरमीया २०:८; हबकुक १:२; अव्युब ३०:२०

८ मेकोमी आं लां तेक्शो बाक्ब। मिनु ग्रूशा लने मचाप्नुड। मिनु मेकोमी आं लां छिडछिडम सुम्तु। अव्युब ३:२३;

बिलाप ३:७,६ ९ मेकोमी आं मान ततीक

रोइक्ताक्यी। आं पिया रे आं सिरपेच पुइक्तु। १० मेकोम आं कली लुक्च लाइब सेलती। गो खतम दुम्ती। रवा तुल्शो खोदेशो पा आं आस नेल्ल नुप्पाइक्तु।

११ मेको आं पर्वम गाइक्ताक्व। मिनु आं कली आ जोरी सत्रु खोदेशो मिम्ताक्यी।

अव्युब १३:२४; अव्युब ३३:१० १२ मेको आ

लडाइ पाइबपुकी बुक्शा आं कली पुम्नीम। मेकोपुकीम आं ताम्बु आ एर ओंथ नेल्ल आन बाक्तीक सेल्नीम।

१३ मेकोम आं खिं डा मुर आन कली आं क्येडा डोन वोइश्शो बाक्ब। आं वारच आं कली मतुइक्ब दुम्शो बाक्नीम।

भजन संग्रह ३१:१२ १४ आं नेक्था डा मुर

नु गो नु गारब वारच आं क्येडा डोन दुम्तेक्म। भजन संग्रह ३८:१२ १५ आं खिंम

पौना दुम्शा बाक्बपुकीम प्रेंताक्यीमी। आं वाइलीमपुकीम आं कली अर्को रागी डा मुर खोदेशो पा मतुइश्शो खोदेशो पाइनीम। १६ गो आं वाइल कली

ब्रेत्नुड। तन्न मेकोम लोव्र मलेप्ब। गो मेको कली शुश लेम्शा पुंडचा माल्नुड। १७ आं सास आं मीश कली रिना नु ग्रांग्रा दिशो दुम्शो बाक्ब। गो आं खिं डा मुर आन कली ग्रांग्रा दिशो दुम्शो बाक्ती। १८ आइक्च आलपुकीमी यो आं कली तशा ग्रांग्रा दिल्नीम। मिनु आं कली तामेनु, मेकोपुकीम शुक्शी पाइनीम। १९ गो नु गारब वारच नेल्लेम आं कली ग्रांग्रा दिल्नीम। आं दाक्शो मुरपुकी आं पर्वम दूली पा बोक्शो बाक्नीम। २० आं के रुश नु कुशुल ला लीशो बाक्ब। गो बेक्चा चिक्शो बाक्ती। २१ आं वारचपुकी, आं कली शिशी पाइय्यीनी, शिशी पाइय्यीनी। मारदे हना परमप्रभुम आं कली दिप्शा, श्येत गेशो बाक्ब। २२ गेपुकीमी यो परमप्रभुमी आं कली खेदा पशो खोदेशो पा मारदे खेदा पाइनीनी? मार, आं कली मिश डा श्येत गेशा मरूनी?

२३ आं पशो लोव्र ब्रेक्शो हना, मेको किताबम ब्रेक्शो हना, रिम्शो दुम वा।

२४ मेको फलाम के याम मुशा नु सिसाम ब्रेक्शो हना, फुल्लुम गेना हना यो लीचा डा पा मुशा ब्रेक्शो हना, रिम्शो दुम वा।

२५ तन्न आं कली श्येत रे प्रोइब का बाक्ब। मेको नोले डा नाक्त रागीम जाक्शा आं सांकछी दुम्ब। मेको गो तुइक्नुड। यसैया ४१:१४; होसे १३:१४; अव्युब २६:६

२६ मिनु आं कुशुल राक्शा खतम दुम नोले, गो आं रांमी परमप्रभु कली ताइनुड।

भजन संग्रह १७:१५; भजन संग्रह ७३:२४ २७ गो

मेको कली आं मिक्चीमीन आं नेक्था ताइनुड। गो मेको तचा कली शुश रिम्ना रिम्न बाक्नुड। २८ गेपुकीम आं कली 'एको कली दोपा खेदा पचा? मारदे हना श्येत आ शाक्श एको आ आगाम बाक्ब'

देंतीनी। २६गेपुकी तरवार क्येडा हिनीन। मारदे हना गाइशो आ सजाइ तरवार रे पा जाकब। मिनु निसाफ का बाकब, दे तुइकतीन” दे अय्युबम लोत्र लेत्तीमी बाक्त।

### सोफारमी लोत्र पशो

अय्युब १५:-; १८:-

**२०** मिनु नामा डा सोफारमी २“नोफा दाइकतीन। आं मिम्शोम आं कली लोत्र लेप्पाइकब सेलती। मारदे हना गो आं थुं काइ मनुशो बाकनुड। ३गो आं कली शुक्शी पशो लोत्र नेंशो बाकनुड। आं थुं डा रुप्तीकेम आं कली लोत्र लेप्ब सेल्लो बाकब। ४गे एको माइत लोत्र तुइकनीनी? मुर रागीम बाक्मा रे एको लोत्र बाकशो बाकब। ५एको मार लोत्र बाकब देंशा हना, परमप्रभु यावे आ अरेशो मटीब आन ठेयब लेशो इच्का नाक्त ला लीब। मेको आन ग्येरसीशो याम का ला लीब। ६मेको आन ठेयब लेत्तीक सरीड खोइ लाइक्त हना यो नु मेको आन पियाम गोस्स कली थिप्तु हना यो, *भजन संग्रह ३७:३५-३६* ७मेको स्त्री खोदेंशो पा जाम्नीम। मिनु मेको आन कली ताइब नेल्लेम “मेको ते लाक्गमे, खोइ?” देंनीम। *मीका ७:१०* ८मेकोपुकी डोमु पशो खोदेंशो पा जाम्शा लाइनीम। मेको आन कली मथिंसीब। मेकोपुकी नाकदो तशो ततीक खोदेंशो पा जाम्शा लाइनीम। ९मेको आन कली तुइकबपुकीम लेंशा गेनायो मताइनीम। मिनु आन बाक्तीके रे यो जाम्शा लाइनीम। *भजन संग्रह ३७:१०* १०मेको आन आलपुकीम पुडग आन शिशी माल्नीम। मिनु मेको आन तौपुकीमी पुडग आन शोंप लाइशशा गेनीम। ११मेकोपुकी

ठिटा दुम्शा, सक्ति पाइशो बाक्तेकम हना यो, बेकशा, तुरस डा फुरकुम वोइक्चा पुंडसीनीम।

१२परमप्रभु यावे आ अरेशो मटीब आन मरिम्शो पशो मेको आन कली ब्रोवशो बाक्त हना, मेको आन लें आगाम खुइशशा वोइक्नीम। १३मेको आंम कली वोइशशा, मप्रोंइब। मेको आन शोत्रम वोइक्तेकम हना यो, १४मेको आन जचा थोत्रक आन कोत्रजम फांडसीब। मिनु मेकेर बुस्स आन बीस दुम्ब। १५मेकोपुकीम मेको आन नेकशो शोंप लेंशा मेचा माल्नीम। परमप्रभुमी मेको आन कली मेपाइकब। १६मेकोपुकीम बुस्स आ बीस युप्नीम। मिनु बीस पाइशो बुस्सुमी मेको आन कली कोक्शा साइकब। १७मेको आन के तर नु खुदो शुश बाक्त हना यो, ग्येरशा जचा तूचा मताइनीम। १८मेको आन श्येत पा चेम्शो मारेइ मारेइ मजथु लेशशा गेचा माल्नीम। मिनु आन ग्याप्शा लेयशा चेम्शो क्येट ग्येरशा जचा मताइनीम। *ब्यवस्था २८:३०-३३* १९मारदे हना मेकोपुकीमी पुडग आन कली दिष्शा श्येत गेम्तेकम। मेकोपुकीम आन मसेल्लो खिं आंम के सेल्लो बाक्नीम।

२०मेको आन शोत्रलु गेनायो मउइकब। मिनु मेको आन शोंप मलीब। २१मेकोपुकीम जामे नोले मारेइ महेक्ब। मोपा आन शोंप नेल्ल नुप्शा लाइब। २२मेको आन मिम्शो नेल्ल गाप्त हना यो, मेकोपुकी श्येत जाइनीम। मारेइ मारेइ श्येत मेको आन तार कोम्सीब। २३मेकोपुकी रूने थुम्मे नोले, परमप्रभुम आ गाइशो मेको आन तार मोइकब। दोशो जामे मोशो परमप्रभुम सजाइ गेचा पुंडसीनीम। २४मेकोपुकी फलाम के या रे

प्रोक्तेकम हना यो, कांसा के डर पाइशो ब्राम मेको आन कली खिण्वब। २५मेको ब्रा मेको आन कली खिण्वशा गूनीम। मेको ब्रा आन टल्केशो डरम मेको आन खाइल पुक्शा गुंडब। मोपा मेको शुश हिंनीम। *व्यवस्था ३२:४१* २६मेको आन शोप कली थम छिडछिडमी रिम्शा बाक्शो बाक्ब। थाम्पा ब्रशो मीम मेको आन कली दाक्ब। मिनु आन ताम्बुम लीशो मारेइ मारेइ नेक्ब। *व्यवस्था ३२:२२* २७स्वर्गम मेको आन मरिम्शो पशो नेल्ल कोइब। रागी मेको आन कली दोस गेचा कली ठीक दुम्शो बाक्ब। २८मेको आन खिं डा शोप नेल्ल योल्नीम। मेको गाइक्ता नाक्त मेको नेल्ल योल्नीम। २९मेको परमप्रभु यावे आ अरेशो मटीब आन भाग बाक्ब। परमप्रभुमी गेशो इनाम मेकोन बाक्ब” दे लोव्र लेत्ता बाक्त।

### मटीब आन पर्वम शेंशो

**२१** मिनु अय्युबमी २“इन नोफा दाइशशा, आं लोव्र नेनीन। मेको आं कली इन गेशो लेम्तीके बाक्ब। ३गो लोव्र पडानु, आं कली फाल्शा नेनीन। गो लोव्र थुमु नोले आं कली शुक्शी पने चाप्नीनी। ४मार, आं थुं मनुथु पशो लोव्र बेक्शा लाइब मुर आन कली ममाइ। मारदे गो फाल्शा बाक्चा माल्नुडा? ५आं कली कोव्रयीनी। मिनु सिक्सी पने। मारदे हना गो ग्रांग्रा दिचा डा तांइसीनुड। इन शोव्र सुम्सीन। *अय्युब ४०:४* ६गो आं कली ‘मार दुम्बा’ दे मिम्नुड। मिनु ग्रीचोक पा हिंनुड। आं रां नेल्ल थुर थुर पा खिंखि पाइब।

७परमप्रभु यावे आ अरेशो मटीब मुर मारदे ब्रोंइना ब्रोंइन बाक्नीमी? मारदे मेकोपुकी खूशो दुम्मानु यो बोल्यो नु सक्ति पाइशो दुम्नीमी? *येरमीया १२:१* ८मेको

आन तमी तौ मेकोपुकी नु बाक्नीमी। मिनु मेकोपुकीम आन चच युइ नेल्ल ताइनीम। ९मेको आन खिंम महिंथु बाक्नीम। परमप्रभुम मेको आन कली सजाइ मगेब। १०मेको आन बी ब्यफ सोशा बोशा दुम्नीम। बी नेल्ल गिक्नीमी, गेनायो मशाम्नीम। ११मेको आन आल आन कली क्यारश भेडा आन पाठा खोदेंशो पा ग्यारथ सोइक्नीम। मिनु मेको आन आइक्च आल सिल पना पन प्रेक्शो बाक्नीम। १२मेकोपुकी खैजडी नु बीना ताप्शा कुम्सो पाइनीम। मिनु बांसुरी ताप्शा ग्येरसीनीम। १३मेकोपुकीम आन नाक्त ग्येरशा सोइक्नीम। मिनु मेको आन थुं नाइशशा बेक्शो मुर आन बाक्तीक लाइनीम। १४मेकोपुकीम परमप्रभु कली आंइ रे पा डोन लन। गो इन लाम गाक्चा मदाक्नीकी, देंनीम। *अय्युब २२:१७* १५‘नेल्ल क्येडा ठेयब सक्ति पाइशो सु बाक्म? गो मारदे मेको आ गेय पचा माल्नीकी? गो मेको कली पुंडशा मार ताइनीकी डा?’ देंनीम। *प्रस्थान ५:२; २राजा १८:३५; भजन संग्रह १२:५; दानीएल ३:१५* १६परमप्रभु यावे आ अरेशो मटीब आन सोशा बोशा लशो, मेको आंम आन पतीके ममाइ। मिनु आन मिम्शो तुइशशा, गो ग्रांग्रा दीनुड। *अय्युब २२:१८*

१७परमप्रभु यावे आ अरेशो मटीब आन बत्ती गिश खेयप काम्सीबा? मेको आन पियाम गिश खेयप हिंचा डा श्येत जुक्बा? शुश खेयप मजुक्ब। परमप्रभु आ गाइशशामी मेको आन कली गिश खेयप श्येत गेबा? शुश खेयप मगेब। १८गिश खेयप फशेम बेरशो पराल खोदेंशो दुम्नीमी? मेकोपुकी गिश खेयप फश गिवारम बेरपाइशो भूस खोदेंशो दुम्नीमी? शुश खेयप मदुम्नीम। *भजन संग्रह १:४*

१६गेपुकीम 'परमप्रभुमी मेको आन मरिम्शो पतीके आन तमी तौ आन कली खेक्शा वोइक्ब' देंनीनी। मोदेशो मदुम्ल। तन्न मेकोमी मेको नेल्ल आन कली सजाइ गेवल। मिनु मेकोपुकीम तुइक्वतमेक्ल।

अय्युब २०:१०; प्रस्थान २०:५

२०मेकोपुकीम आंमा आन कली खतम दुम्तीक तामेक्ल। मेकोपुकीम नेल्ल क्येडा ठेयब सक्ति पाइश्शो आ गाइश्शो तुइक्वतमेक्ल। २१मुर आन ब्रोंइतीक नुम नोले मेको आन खिं कोवने चाप्नीमी डा? मेको आन ब्रोंइतीक नुप्व। २२मुरुम परमप्रभु कली जोक्तीक तुइक्तीक लोत्र शेंने चाप्नीमी डा? मेकोमी इर बाक्ब आन कली यो निसाफ पाइब।

उपदेसक ५:७

२३का निक्शी मुर आन माल्शो नेल्ल गाप्शा बेक्नीम। मेको काइ महिंथु रिम्शा बाक्नीम। २४मेको आन रां दोम्शो बाक्नीमी। मेको आन रुशेम मासी बाक्ना बाक्न बेक्नीम। २५का निक्शी चहिं श्येतम ब्रीशा, आन थुं कशो दुम्शा बेक्नीम। मेकोपुकीम गेनायो ग्येरचा मतामे। २६मिनु मेको नेल्ल काथा थिम्चा पुंडसीनीम। मिनु लुम्पुमी मेको आन कली सुम्नीम।

अय्युब ३:१८-१९

२७गेपुकी मार मिम्ना मिम्न बाक्नी, गो मेको रिम्शो पा तुइक्नुड। मेको आं पर्बम दूली मिम्तीक लोत्र बाक्ब, दे गो तुइक्नुड। २८गेपुकीम 'मेको सासन पाइब आ खिं ते बाक्म? मेको परमप्रभु यावे आ अरेशो मटीब मुर आन ताम्बु ते बाक्नीमी?' दे हिल्लो पाइनीनी। २९मार, गेपुकीम लां गाक्ब आन कली गेनायो हिल्लो मपनी? गे मेको आन देशो मतुइक्नीनी? ३०शुश हिंचा डा श्येत दुम्मेनु, परमप्रभु यावे आ अरेशो मटीबपुकी ब्रोंइचा ताइनीम। मिनु परमप्रभु

आ गाइक्ची नाक्त मेकोपुकी प्रोंइचा पुंडसीनीम। ३१सुइम मेको आन कली दोस मगेनीम। सुइमी मेको आन मरिम्शो पशो आ पा डा क्येक्क मलेत्नीम। ३२मिनु मेको बेक्शा, कुरशा तुरसुम लाइक्चा पुंडसीनीम। मिनु मेको आन तुरसुम खाल पाइब वोइक्नीम। ३३तुरस डा खप यो मेको आन कली रिम्शो बाक्ब। मिनु शुश मुर मेको आन नोले खोइक्नीम। मिनु हिक्ने मचाप्चा डा पा शुश मुर मेको आन क्येडा डोंइती लाम्तेक्म। ३४गेपुकी इन देशो फश लोत्रम दोपा आं कली लेम्नीनी डा?" दे अय्युबमी सोफार कली लोत्र लेत्ता बाक्त।

एलीफाजमी अय्युब कली दोस गेशो

२२ मिनु तेमान डा एलीफाजमी

२"बेक्शा लाइब मुरुम परमप्रभु कली मार पने चाप्बा डा? शुश जोक्ब तुइक्ब मुरुम यो मेको कली मार गेय पने चाप्बा डा? ३गे ठीक पाइब बाक्तीनी हना, नेल्ल क्येडा ठेयब सक्ति पाइश्शो कली मार रिम्शो दुम्बा डा? इन पशो नेल्ल दोस मततीक बाक्त हना, मेको कली मार रिम्शो दुम्बा डा?

अय्युब ३५:६-८

४इन परमप्रभु कली मान पा हिंतीके आ पर्बम इन कली महुइक्ब। मेको आ पर्बम इन कली निसाफ मपाइब। ५इन परमप्रभु यावे आ अरेशो मटितीके ठेयब बाक्ब। इन मरिम्शो पतीके गेनायो मनुप्व। ६गे मोशान इन लोक्ब आ वा जाकटी लाइक्तीनी। आन वा रोइश्शा शिशा सेल्तीनी। प्रस्थान २२:२५-२६; अय्युब २४:६-१० ७गे तूतू दाक्शा, लकचा सोव्रशो मुर आन कली ब्वाक्कु मगेनी। मिनु शोव्रलु बेक्शो मुर आन कली जचा

थोव्रक मगेनी। *अय्युब ३१:१७; मती २५:४२-४३*  
 ८ सक्ति पाइशशो मुर आन के शुश रू  
 बाक्नीम। मेको आन दाक्शो मुर आन  
 कली मेकेर बाक्चा गेनीम। ९गे आन  
 वोंइश बेक्शो मीश मुर आन कली श्येत्थ  
 गुइ सोइक्ताक्नी। मिनु रोम रोइक्च  
 आन तचा माल्शो मगेनी। *अय्युब २६:१२-१३*  
 १० मोपतीके इन गाक्तीक लां आ एर  
 ओंथ नेल्ल ब्वारद दाइशशो बाक्नीम।  
 मिनु इन कली इन मतुइक्चा डा पा शुश  
 हिंतीके जाक्ब। ११ मिनु तने मचाप्चा डा  
 छिडछिडम इन कली सुम्ब। मिनु ब्वाक्कु  
 बारशा यिशा इन कली सुम्ब।

१२ परमप्रभु इर स्वर्गम बाक्ब। सोरुल  
 आन कली कोव्रडीन। गिश इर बाक्नीमी।  
 १३ मोपतीके गे 'परमप्रभुमी मार तुइक्बा  
 डा? मेकोम गोस्स आ छिडछिड रे  
 दोपा निसाफ पाइबा डा? १४ गोस्स आ  
 छिडछिड मेको कली सुम्तीके, मेकोम  
 आंइ कली तने मचाप्ब। मिनु मेको  
 सरीडम एर ओंथ गाक्शा बाक्ब' देतीनी।  
 १५गे परमप्रभु यावे आ अरेशो मटीब आन  
 माइत लां मप्रोंइब बाक्नीनी? १६मेको  
 आन नाक्त मजाक्थु साइक्चा पुंडसाक्म।  
 मेको आन जग ब्वाक्कुम योल्ताक्व।

*अय्युब १५:३२-३३; उत्पत्ती ७:२१* १७ मेको  
 मुरपुकीम परमप्रभु कली 'आंइ रे पा  
 डोन लन। नेल्ल क्येडा सक्ति पाइशशोमी  
 आंइ कली मार पने चाप्बा डा?' देतेक्म।  
*अय्युब २१:१४* १८ मो हना यो मेकोमी, मेको  
 आन खिं रिम्शो थोव्रकमी प्रिताक्व। तन्न  
 परमप्रभु यावे आ अरेशो मटीब आन मिम्शो  
 काइ मदाक्नुड। १९ ठीक पाइबपुकी  
 मेको आन कली तशा ग्येरसीनीम। दोस  
 मताइबपुकीम मेको आन कली शुक्शी पा  
 रिन्तीम। *भजन संग्रह १०७:४२* २० मेकोपुकीमी

'थमा पा, इं जोरी सत्रु साइक्चा पुंडसाक्म।  
 मिनु मेको आन शोंप मीम नेक्तु' देनीम।

२१ परमप्रभु नु गारीन। मिनु थुं नाइक्तीन।  
 मो पाइतीनी हना इन रिम्शो दुम्तीके लेंशा  
 ताइनीनी। २२ मेको आ शेंशो पने। मिनु  
 इन थुंम वोतीन। २३गे नेल्ल क्येडा ठेयब  
 सक्ति पाइशशो गे लेतीन। मिनु डोंइती डा  
 खोदेशो दुम्नीनी। गे इन ठीक मपतीके  
 इन क्येडा डोन वोतीन। *अय्युब ८:५-७;*  
*अय्युब ११:१४-१५* २४गे सुन फुरक खोदेशो  
 मिम्ताक्नी हना, ओफीर डा सुन कली  
 खोला डा फुल्लु खोदेशो मिम्ताक्नी हना,  
 २५ नेल्ल क्येडा ठेयब सक्ति पाइशशो  
 इन शोंप दुम्ब। मेको इन सुन चांदी दुम्त  
 हना, २६ मेना नेल्ल क्येडा ठेयब सक्ति  
 पाइशशो कली मिम्शा, ग्येरशा बाक्नीनी।  
 मिनु गे इन पिया पोक्शा परमप्रभु गे  
 कोव्रनीनी। २७गे मेको कली पुंडीनु,  
 मेकोमी इन पुंडशो नेंब। मिनु गे इन जशो  
 कसम खाप्नीनी। *भजन संग्रह ५०:१४-१५* २८गे  
 मार पाइनुड, दे मिम्नीनी, मेको दुम्ब। मिनु  
 इन लांम छेडछेड दुम्ब। २९ मारदे हना  
 मेकोमी ठेयब लेशशो लोव्र पाइब आन  
 कली आइक्च सेल्ब। ब्रेम्शो मुर आन  
 कली चहिं प्रोंइब। *१ पत्रुस ५:५* ३० मेकोमी  
 दोस ताइब आन कली यो प्रोंइब। गे दोस  
 मताइब बाक्तीके मेको आन कली प्रोंइब"  
 दे एलीफाजमी अय्युब कली लोव्र लेत्ता  
 बाक्त। *भजन संग्रह १८:२१, २५; २कोरिन्थी ५:२*

### अय्युबम लोव्र पशो

२३ मिनु अय्युबमी २ "मुलाक्ती  
 आं देशो लोव्र थुं मनुचा डा  
 बाक्ब। गो हुकयी पना पन बाक्ती हना  
 यो, परमप्रभुमी आं कली श्येत गेना गेन  
 बाक्ब। ३गे मेको कली ते बाक्बा, मेको

तुइवतु हना, गो मेको आ बाक्तीके लाड वा। ४गो आं श्येत मेको आ डोंइती नेल्ल शोव्रडु वा। गो मेको कली आं देंचा माल्शो लोव्र नेल्ल देंड वा। ५मेकोमी आं कली मार लोव्र लेप्बाक्मे गो मेको तुइवतु वा। मिनु गो मेकोम आं कली मार देबाक्मे मेको रुबु वा। ६मेको आ ठेयब सक्तिमी गो नु लोव्र पाइबा डा? ममाइ, परमप्रभुमी आं कली गेनायो दोस मगेब। ७रिम्शो थुं पाइश्शो मुरपुकीमी मेको नु लोव्र पने चाप्नीम। मिनु गो आं निसाफ पाइब रे गेना हना यो प्रोंइचा पुंडसीड वा।

८गो डोंइती गे लती हना, मेको मेक मबाक्ब। गो नोले गे लेत्ती हना यो, मेको मेक मबाक्ब। ९मेकोमी पेरा गे खुइक्ताक्व हना, गो मेको कली मताइनुड। गो ग्युरा गे हिरसीडानु यो मेको कली तने मचाप्नुड। अय्युब ४२:५

१०तन्न मेकोमी आं गाक्शो लां तुइक्ब। मेकोमी आं कली नाक्शा कोव्रयीनु, गो सुन खोदेशो दुम्नुड। भजन संग्रह १७:३; भजन संग्रह १३६:२३-२४ ११गो मेको आ नोले खोइश्शो बाक्नुड। गो मेको आ लांम ला गाक्शो बाक्ती। गो ग्युरा पेरा मपड। १२गो मेको आ शेंशो पाता। मेको आ लोव्र नाक्त किंत किंत डा आं जचा थोव्रक क्येडा यो शुश मिम्ताक्ड। १३तन्न मेको आ कान बाक्ब। मिनु सुमी मेको कली तेक्ने चाप्बा डा? मेकोमी आ मिम्शो खोदेशो पाइब। १४मेकोमी आं कली मार पचा मिम्बा, मेको नेल्ल पाइब। मिनु मोदेशो शुश मिम्ब। १५मोपतीके गो मेको नु गुम्चा शुश हिंनुड। गो मेको कली मिम्शा हिंशा खिंखि पाइनुड। १६परमप्रभुम आं थुं थपाइश्शो बाक्ब। नेल्ल क्येडा ठेयब सक्ति पाइश्शोमी आं

कली हिंपाइक्ब। १७छिडछिडमी आं कली सिक्सी पपाइक्ने मचाप्ब। मेको छिडछिडमी आं कली सुम्ने मचाप्ब” दे अय्युबमी देंमाक्त।

### परमप्रभु कली मटीब

२४ मिनु अय्युबमी “नेल्ल क्येडा ठेयब सक्ति पाइश्शोमी निसाफ पतीके नाक्त मतुइक्पदा? आ नेक्था बाक्बपुकीम यो मेको आन नाक्त मारदे मतुइक्नीमी? उपदेसक ३:११; उपदेसक ८:६ २परमप्रभु यावे आ अरेशो मटीब मुरपुकीम सांद डा फुल्लु याक्नीम। मेकोपुकीम क्यारश भेडा खुइ पशा योव्रनीम। ब्यक्स्था २७:१७ ३मेकोपुकीम रोम रोइक्च आन गधा खुल्शा लाइक्नीम। मिनु वोंइश बेक्शो मीश मुर आन ब्यफ जाकटी वोंइसीनीम। ४मेकोपुकीम पुडग आन कली लां मेर चुशा थोक्शा गाक्नीम। रागी डा पुडग आन कली खुइक्पाइक्नीम। ५व्वाकी डा गधा गोरशो रागीम जचा थोव्रक माल्शा गाक्शो खोदेशो पा, पुडगपुकी जचा थोव्रक माल्शा गाक्नीम। मिनु गोरशो रागीम मेको आन तमी तौ आन कली जचा थोव्रक माल्नीम। ६पुडगपुकीम मुर आन रूम सिला माल्नीम। परमप्रभु यावे आ अरेशो मटीब मुर आन अडगुर रूम सिला पाइनीम। ७वा मबाक्तीके मेकोपुकी शिशा इप्नीम। मेको आन के ग्यूमी फक्तीक मबाक्ब। ८मेको पहाडम बाक्शा रेउम जित्नीम। फाम्सीतीके मबाक्तीके, फुल्लु आ नेक्था फाम्सीनीम।

९परमप्रभु यावे आ अरेशो मटीबपुकीम रोम रोइक्च आन कली आन ममा आ थुकु रे रोइश्शा, लाइनीम। मिनु मारेइ

मथीब मुर आन आल आन कली आन जेर आ पा डा लाइनीम। १०मेकोपुकी वा मबाक्तीके शिशा गाक्नीम। शोत्रलु बेक्शा यो, क्योत्रज चेरब आ मुठा कुरनीम।

यसैया ५८:७ ११मेकोपुकीम गारो आन दातेमी तेल खाक्नीम। अडगुर खाक्तेक्म हना यो तूतू, दाक्शो बाक्नीम। याकूब ५:४ १२सहर रे बेक्चा चिक्शो मुर आन हुकयी पशो नेंसीब। मिनु गार दुम्शो मुरुम 'वारच पाइय्यीनी' दे वाइ ब्रेण्ब। मो हना यो परमप्रभुम मेको आन पुंडशो मनेंब।

१३का निक्शी मुर छेडछेड आ पर्बम मरिम्शो लोत्र पाइनीम। मेकोपुकीम छेडछेड डा लां मतुइक्थु, मगाक्नीम। १४मुर साइक्ब मुर नां रिक्म नोले बोक्शा प्रुडग नु मारेइ मथीब आन कली साइक्ब। मिनु नाक्दो मेको खुइ खोदेशो दुम्ब। १५मुर आन मीश नु मुर आन वोंइश नु इण्ब नां रिक्चा रिम्ब। मिनु मेकोमी 'नाक्दो सुइम आं कली मतुइक्वतमेक्ल' दे आ कुल फाइक्ब। भजन संग्रह १०:११ १६खुइपुकी नाक्दो खिं प्रोल्शा ओव्रनीम। मिनु नाक्त खुंइसीनीम। मिनु मेकोपुकीम छेडछेड मतुइक्नीम। १७मारदे हना क्येर नाक्दो मेको आन कली सुनी बाक्ब। क्येर नाक्दो डा शुश हिंतीके मेको आन वारच बाक्ब।

१८मेको मोदेशो मुरपुकी व्वाक्कु आ तार डा बोग्यो खोदेशो बाक्नीम। मेको आन थेरशो रू सराप चीले तशो बाक्नीम। सुइ मुर आन अडगुर रू गे मलाइनीम। १९दोपा यशो फुं कली नां नु होशोम सोत्रपाइक्बा, मोपा बेक्शो मुर आन बाक्तीकेमी पापी आन कली साम्पाइक्ब। २०मेको आन कली जरमेब कोव्रजीम मेको आन कली प्रेंब। मिनु

लुस्पुमी 'मेको ब्रोव्रशो बाक्नीम' दे मिम्नीम। मुरुम मेको आन कली प्रेंनीमी। मोपा परमप्रभु यावे आ अरेशो मटीबपुकी दिम्शो रवा खोदेशो दुम्नीम।

२१मेकोपुकीमी आल मथीब मीश मुर आन कली श्येत गेनीम। मिनु आ वोंइश बेक्शो मीश मुर आन कली मारेइ रिम्शो मपाइनीम। २२मो हना यो परमप्रभु आ सक्तिमी मेको बोल्यो मुर आन कली ब्रोंइचा गेब। तन्न गेना बेक्नीमी मतुइक्नीम। २३परमप्रभुम मेको आन कली प्रोंइतु हना यो, मेकोमी मेको आन कली गेना हना यो कोव्रशो बाक्ब। २४याम का कली मरिम्शो पाइबपुकी ग्येत्थ क्युकचा पुंडसीनीम। मिनु नोले मेको जाम्नीम। अरु खोदेशो पा मेकोपुकी यो बेक्शा लाइनीम। मिनु मेकोपुकी चेरब पेशशो खोदेशो पा पेट्सीनीम। २५सुइमी आं कली 'गे जोल पाइब नवे' दे देंने मचाप्नीम। मिनु आं कली 'फश लोत्र पाइब' देंने मचाप्नीम" देंमाक्त।

### बिल्दादमी लोत्र पशो

**२५** मिनु शुआह डा बिल्दादमी २४"नेल्ल क्येडा ठेयब दुम्तीके नु मान पा हिंतीके परमप्रभु नु बाक्ब। मेकोमी इर स्वर्गम थुं नाइशशा बाक्तीक सेल्ब। ३मेको आ लडाइ पाइब हिकने मचाप्चा डा बाक्नीम। मेको आ छेडछेड नेल्ल आन बाक्तीके मजाक्बा डा? ४बेक्शा लाइब मुर दोपा परमप्रभु आ डोंइती ठीक पाइब दुम्ने चाप्नीमी डा? मीश मुर रे जरमेशो मुर दोपा ग्रांरा मदिचा डा दुम्ने चाप्नीमी डा? अव्युब ६:२; भजन संग्रह १४३:२ ५मेको आ डोंइती तास्लाम ठीक पा छेडछेड मगेब। सोरुल

आन छेडछेड मगारचा डा बाक्नीम।  
अय्युब १५:१५ ६मिनु लुस्पु खोदेशो मुर, दोपा  
परमप्रभु आ डोंडती ठीक दुम्ने चाप्बा  
डा?" दे बिल्दादम देंमाक्त। यसैया ४१:१४

### अय्युबमी लोत्र लेशशो

**२६** मिनु अय्युबमी २"गे दोपा  
बोल मपाइशशो मुर कली  
वारच पाइक्नी? योक्शो गुइ कली गे दोपा  
नाइक्चा गेनी? ३गे मतुइक्ब मुर कली,  
अर्ती गेतीनी। मिनु गे शुश रिम्शो लोत्र  
शेंताक्नी। ४ओदेशो लोत्र पचा कली गे ते  
शेंसीनी? मिनु तेको सोक्त रे पा ओदेशो  
लोत्र पनी?" दे अय्युबमी देंमाक्त।

५"उइ डा मुर आन वांकु खिंखि  
पाइनीम। ब्वाक्कु नु मेकेर बाक्बपुकी  
यो खिंखि पाइनीम। ६परमप्रभु आ डोंडती  
बेक्शो मुर आन बाक्तीके मखुंडसीशो  
बाक्ब। मिनु जाम्शा लतीके मसुम्सीशो  
बाक्ब। भजन संग्रह १३६:८; हितोपदेस १५:११;  
आमोस ६:२; प्रकाश ६:१ ७मेकोम श्येत्थ  
बाक्तीकेमी उत्तर डा सरीड प्राक्ब। मिनु  
रागी कली मारेइ मबाक्तीकेम क्युकब।  
८मेकोमी ब्वाक्कु कली क्येर गोस्सुम  
तेक्शा वोइक्ब। मिनु मेको गोस्स मप्रोल्ब।  
ब्वाक्कु मग्रूब। ९मेकोमी पूर्ने डा तास्ला  
कली सुम्ब। मिनु आ गोस्सपुकी मेको  
आ तारी प्राक्ब। १०मेकोमी ब्वाक्कु आ  
सुरम सांद वोइशशो बाक्ब। छिडछिड  
नु छेडछेड फ्राचा कली मो पशो बाक्ब।  
११मिनु सरीड डा थामपुकी हिम्सीनीम।  
परमप्रभु आ हुइशशोमी हिंशा सिक्सी  
पाइनीम। १२मेकोम आ सक्तिम समुन्द्र  
कली थेल्लु। मिनु आ रुप्तीकेम राहाब  
माइशशो समुन्द्र डा ठेयब जन्तु कली  
खतम सेल्लु। अय्युब ६:१३; भजन संग्रह ८६:११

१३मेको आ फश पतीकेमी सरीड  
हाक्साक्ब। मेकोम दोरशा प्रोक्ब ठेयब  
जन्तु कली साइक्तु। यसैया २७:१ १४मेको  
आ सक्ति डा आइक्च गेय ला बाक्नीम।  
मेको रे गो आइक्च सेंदा डा लोत्र ला  
नेंतक। मिनु मेको आ सक्तिम पशो बुंबु,  
सुम रुप्ने चाप्बा डा?" देंमाक्त।

### अय्युबम लोत्र पशो

**२७** मिनु लेंशा अय्युबमी  
२"परमप्रभु यावे ब्रोंडशा  
बाक्शो खोदेशो पा आं ठीक पशो आ  
पर्बम मारेइ मदे। नेल्ल क्येडा ठेयब सक्ति  
पाइशशोम आं थुं खाइक्पाइशशो बाक्ब।  
३गो आं रांम सोक्त बाक्म सम्म, परमप्रभु  
आ सोक्त आं नेम बाक्म सम्म, ४गो  
मारेइ जोल मपाइनुड। मिनु मिलो शिलो  
मपाइनुड। भजन संग्रह ३४:१४ ५गो गेपुकी  
ठीक बाक्नीनी, दे मदेनुड। गो मबेक्डा  
सम्म आं रिम्शो पतीक मप्रोंडनुड। ६गो  
आं ठीक पतीके कली गेनायो मप्रोंडनुड।  
गो मबेक्डा सम्म दोस मताइब बाक्नुड।  
प्रेरित २४:१६; १कोरिन्थी ४:४

७आं जोरी सत्रु परमप्रभु यावे आ  
अरेशो मटीब खोदेशो दुम्मल। आं कली  
मदाक्बपुकी ठीक मपाइब खोदेशो  
दुम्मल। ८परमप्रभु यावे आ अरेशो  
मटीब मुर बेक्चामेनु, परमप्रभुम मेको  
आन सोक्त लाइक्चावानु, मेको आन  
के मार आस बाक्बा डा? लूका १२:२०  
९श्येत जचा चिक्तमेनु, आन डाक्शो  
परमप्रभुमी नेंबा डा? १०मार, मेकोपुकीम  
नेल्ल क्येडा ठेयब सक्ति पाइशशो कली  
मिम्शा ग्येरसीनीमी? मेकोपुकीम गेना  
हना यो मेको कली मिम्शा पुंडनीमी डा?  
११गो इन कली परमप्रभु आ पशो आ

पर्वम शेंनुड। गो नेल्ल क्येडा ठेयब सक्ति पाइश्शो आ मिम्शो मखुइक्नुड। १२मेको गे नेल्लेम ताइतीनी। गेपुकी मारदे फश लोत्र पाइनीनी?

१३ परमप्रभु यावे आ अरेशो मटीब आन कली गेशो भाग एकोन बाक्ब। नेल्ल क्येडा ठेयब सक्ति पाइश्शोम शिशी मपाइक्ब आन कली गेशो भाग एकोन बाक्ब। *हितोपदेश १३:२२; उपदेसक २:२६* १४मेको आन तौ शुश बाक्तेक्म हना यो, मेकोपुकी तरवारम क्योरशा साइक्चा पुंडसीनीम। मिनु मेको आन चच युइ रूथ्री जचा मताइनीम। *अय्युब २१:१६* १५मिनु लीशोपुकी बेक्तीक रोइ पा बेक्शा थिम्चा पुंडसीनीम। मिनु आन मीशपुकी रोंका मपाइनीम। १६मेकोपुकीम फुरक खोदेशो पा चांदी खुप्ताक्म हना यो, खप खोदेशो पा शुश वासी तेल्तेक्म हना यो, १७मेकोपुकीम तेल्नीमी, तन्न ठीक पाइबपुकीम फेक्नीम। मिनु मेको आन चांदी दोस मताइब आन कली योक्शा गेनीम। १८मेको आन खिं ग्योत्र खोदेशो पा सेल्शो बाक्ब। अडगुर रू खाल पाइब मुर आन बाक्तीके खोदेशो दुम्ब। १९मेको शोंप पाइश्शो दुम्शा इप्नीम। तन्न मुल रे मोदेशो मदुम्नीम। मेको बोक्मानु, मेको नेल्ल लने थुम्शो बाक्ब। २०शुश हिंतीकेम मेको आन कली बारशो ब्वाक्कुम खोदेशो पा सुम्ब। मिनु नाक्दो फश गिवारमी मेको आन कली योल्ब। २१पूर्ब डा फशेमी मेको आन कली बेर पा योल्ब। मिनु मेको आन बाक्तीके योल्चा पुंडसीनीम। २२फशेमी शिशी मपथु, मेको आन कली योल्ब। मिनु मेकोपुकी मेकेर रे प्रोक्चा माल्नीम। २३मेको फशेमी मेको आन कली तशा, आन गुइ फ्रेक्नीम। मेको

आन बाक्तीकेम मेको आन कली शुक्शी पाइब” देंमाक्त।

### सोफार आ लोत्र

२८ मिनु अय्युबमी “चांदी आन खानी बाक्नीम। सुन यपाइश्शा रिम्शो सेल्तीक बाक्नीम। २फलाम दोशा खप रे गुंडनीम। फुल्लु रे तांबा यपाइश्शा गुंडनीम। ३मुरुम छिडछिड कली थुम्पाइक्नीम। मेकोपुकी रागी आगा डा छिडछिडम खानी माल्ना माल्न गाक्नीम। ४मुर आन बाक्तीक रे शुश डोन लाइनीम। मिनु मुरुम मथेक्तीक रागी लाइनीम। मेकोपुकीमी खानी आगा लतीक पोत्रला दोइनीम। मिनु मेकोपुकी सुइ मबाक्तीकेम डोरीम ग्युक्शा बिक्तीकेम गेय पाइनीम। ५मिनु अन्न रू आन आगाम खानी दोना दोन बाक्नीम। मिनु नेल्ल खल्बल सेल्नीम। खप कली मी सेल्नीम। ६मेको फुल्लु रे साफीर माइश्शो हीरा नु सुन के फुरक गुंडनीम।

७तेकोइ सिखार पाइब चिक्वीम मेकेर लतीक लां मतुइक्ब। मिनु ब्वारदे आ शुश ताइब मिक्चीमी यो मेको मतशो बाक्ब। ८ठेयब लेशशो जन्तु यो मेकेर मजाक्दील्नीम। मिनु गुप्सपुकी मेको लां रे मलाइनीम।

९मुरुम आन गुइमी सारो फुल्लु क्योरनीम। मिनु पहाड आन कली दिंम सेल्नीम। १०मेकोपुकीम रोंगुम पोत्रला मुइनीम। मिनु शुश क्येट लाइब हीरापुकी ताइनीम। ११मेकोपुकीम खोला आ बुक्तीक माल्नीम। मिनु रागीम थिम्शा वोइश्शो शोंप गुंडनीम।

१२तन्न तुइक्तीक चहिं ते थिंसीबा? मिनु रुप्तीके ते बाक्बा? १३बेक्शा लाइब

मुरपुकीम मेको आ लां मतुइक्नीम। ब्रोंइशा बाक्ब मुर आन रागीम मेको मथिंसीब। १४मिनु खप आ लुकच लशोमी 'मेको गो नु मबाक्ब' देंब। मिनु समुन्द्रमी यो 'मेको गो नु मबाक्ब' देंब। १५मुरुमी सुनमी रुप्तीके ग्याप्ने मचाप्नीम। चांदी नाक्शा यो मेको कली थाप्ने मचाप्नीम।  
 हितोपदेस ३:१३-१५ १६रुप्तीके कली ओफीर डा सुन, शुश क्येट लाइब ओनीक्स नु साफीर माइश्शो हीरामी यो ग्याप्ने मचाप्नीम। १७सुन नु सिसा आस क्येडा तुइक्तीके नु रुप्तीके ठेयब बाक्ब। क्येख सुन के गहाना नु यो मेको फाइक्ने मचाप्नीम। १८लल मूगा नु टल्केब फुल्लु आ पर्बम लोव्र पचा ममाल्ब। तुइक्तीक थुं मोती आन क्येडा यो शुश क्येट लाइब बाक्ब। भजन संग्रह १११:१०; हितोपदेस १:७, ६:१० १६एथीयोपीया रागी डा पुशपराज माइश्शो हीरा मेको नु उइक्थ दुम्ने मचाप्ब। मेको क्येख सुनम ग्याप्ने मचाप्नीम।

२०मिनु तुइक्तीक थुं ते रे जाक्बा? मिनु रुप्तीके ते बाक्बा? २१मेको ब्रोंइशा बाक्ब नेल्ल आन डोंइती रे खुइश्शो बाक्ब। मेको सरीडम बेरब चिक्ब आन क्येडा यो खुइश्शो बाक्ब। २२जाम्शा लतीके नु बेक्पाइक्बमी 'गो मेको आ पर्बम नेशो ला बाक्नस्कु' देंनीस।

२३तन्न परमप्रभुमी मेको आ लां तुइक्ब। मेको ते रे जाक्बा मेको यो तुइक्ब। हितोपदेस ८:२२-३१ २४मारदे हना मेकोमी रागी आ एर ओंथ नेल्ल ताइब। मिनु सरीड आगा डा मारेइ मारेइ नेल्ल आन कली कोव्रब। २५मेकोमी फश कली सक्ति गेप्तु। मिनु समुन्द्र आ सांद वोइक्तु। २६मेकोम 'दोशो रेउ यिचा माल्बा' मेको अरेप्तु। मिनु बुंबु कली आ

लां कोइताक्व। २७मेना मेकोम रुप्तीक नु तुइक्तीक कली तशा 'एकेर बाक्ब। मोदेशो दुम्चा माल्ब। मेको रिम्शो बाक्ब' देंमाक्त। २८मिनु मेकोमी मुर आन कली 'परमप्रभु यावे कली मान पा हिंतीके तुइक्तीक बाक्ब। मरिम्शो पतीक रे डोन बाक्चा रुप्तीके बाक्ब' देंत" दे अय्युबमी देंमाक्त। भजन संग्रह १११:१०; हितोपदेस १:७

### डोंइती डा ग्येरशा बाक्शो मिम्शो

२६ मिनु लेंशा अय्युबमी २"गो डोंइती डा खोदंशो बाक्ड हना! मेना परमप्रभुमी आं कली कोव्रशो बाक्त। ३मेना मेको आ छेडछेड आं पिया तार बाक्त। मिनु गो छिडछिडम मेको आ हाम्सोम गाक्ती। भजन संग्रह १८:२६ ४गो आं थम रिम्शो नाक्तीम परमप्रभु आं वारच दुम्शा, आं नेक्था बाक्त। भजन संग्रह २५:१४ ५मेना मेको नेल्ल क्येडा ठेयब सक्ति पाइश्शो गो नु बाक्शो बाक्त। मिनु आं तौपुकी आं एर ओंथ बाक्तेक्म। ६मेना आं लांम दूध शाइश्शो बाक्त। मिनु सेरथे फुल्लु रे तेल के खोला शाइश्शो बाक्त। ७गो आं बाक्तीके रे सहर डा ठेयब लाप्चो रे पा लाडगा आं नित्तीकेमी नित्थ लडानु, ८ठिटापुकीम आं कली तशा, लां प्रोंइशा गेतीमी। मिनु खूशोपुकी आं कली तशा मान पा राप्तेक्म। ९ठेयब मुरपुकी सिक्सी पा बाक्तेक्म। मिनु मेकोपुकीम आन गुइमी आन शोव्र सुम्तेक्म। १०सासन पाइब आन ब्वाक्चा देक्शा, सिक्सी पा बाक्तेक्म। ११आं ब्वाक्शो नेंबपुकीम आं कली ठेयब सेल्लतीमी। मिनु आं कली तशा 'रिम्शो बाक्ब' देंतेक्म। १२मारदे हना गो 'वारच पाइक्की' देंब प्रुडग आन कली वारच पा प्रोंइतामी। वारच पाइब

मबाक्शो रोम रोइक्च आन कली वारच पाइक्तामी। *अय्युब ३१:१६; प्रस्थान २२:२१-२२*  
**१३**मारेइ आस मबाक्शो मुरपुकीम आं कली आसीक गेतीमी। गो आन वोंइश बेक्शो मीश मुर आन थुं ग्येरपाइक्तामी।  
**१४**गो ठीक पतीक कली वा फेक्सीशो खोदेशो पा फेक्साक्यी। आं ठीक निसाफ पतीके आ वा नु आं फेटा खोदेशो बाक्त।  
**१५**गो मिक्च मताइब आन मिक्च दुम्ती। मिनु खोइल मदुक्ब आन खोइल दुम्ती।  
**१६**मारेइ मथीब आन कली आन आफ खोदेशो दुम्ती। गो अर्को रागी डा मुर आन कली आन मुददा कोव्रशा गेतामी।  
*अय्युब ३१:१८* **१७**गो ठीक मपाइब आन सक्ति नेल्ल खतम पोक्तामी। मिनु मेको आन रोइशशो लेप्पाइक्ता। **१८**मेना गो आं खिंम श्येत मजथु बेक्नुड, दे मिम्शो नड। मिनु गो शुश बर्स ब्रोंइनुड, दे मिम्शो नड।  
**१९**आं शाक्श बारशा ब्वाक्कु बाक्तीक गे लाम्तेक्म। मिनु आं राशीम सीत बाक्त।  
**२०**आं सक्ति गेना हना यो बाक्त। मिनु आं गुइ डा लिब्रा गेना हना आप्ने चाप्शो बाक्ती।

**२१**गो लोव्र पडानु, मुर नेल्लेमी सिक्सी पा नेंतेक्म। मिनु नोफा दाइशशा आ अर्थ नेंतेक्म। **२२**गो आं लोव्र थुमु नोले सुइमी अरु लोव्र तेम्चा ममाल्देम। आं लोव्र मेको आन थुंमी सीत खोदेशो पा जिन्ना जिन्न लत। **२३**मेकोपुकीम बर्खा डा रेउ रिम्शो खोदेशो पा आं कली रिम्ताक्यीमी। मिनु नोले डा रेउ रिम्शो खोदेशो आन शोव्र वोक् पाक्शा आं लोव्र नेंतेक्म।  
**२४**गो ज्याउ रिस्सीडानु, आन थुं बारत। आं ग्येरशो कुल तशा, मेको आन कली लेम्तीक दुम्त। **२५**गो मेको आन गाक्चा माल्शो लां योव्रशा गेतामी। मिनु गो 'ओं

पने' दे अरेतामी। गो पिप आ लडाइ पाइब आन दातेम बाक्शो खोदेशो बाक्ती। गो रोंका पाइब आन कली लेम्ब खोदेशो दुम्ती" दे अय्युबमी देंमाक्त।

### अय्युब आ थुं लुक्च लशो

**३०** मिनु अय्युबमी "मुल ठिटापुकी आं कली तशा शुक्शी पा रिस्साक्म। मेको आं क्येडा ठिटा बाक्नीम। मेको आन आफ आन कली गो आं क्यारश भेडा खाल पाइब कुचुमपुकी नु काथा वोइक्चा यो मशिरशो मिम्शो नड।  
*अय्युब १६:१८* **२**मेको आन गेय आं कली शोर गाक्शो बाक्त। मारदे हना मेको आन सक्ति ग्युम्ने थुम्शो बाक्त। **३**मेकोपुकी शुश प्रुडग नु शोव्रलु बेक्शो बाक्तेक्म। मेकोपुकी गोरशो सोव्रशो रागीम आन जचा थोव्रक माल्तेक्म। **४**मेकोपुकीम हिक्सी डाम्शो सुवा, बुटा आन सफा सेक्शा जाइनीम। मिनु मार मार आन शाक्श दोम्तेक्म। **५**मेकोपुकी मुर आन दाते रे तिल्चा पुंडसीशो बाक्तेक्म। मुरपुकीम मेको आन कली खेदा पशो खोदेशो पा ग्रीतेक्म। **६**मेकोपुकी सोव्रशो खोलामी, पुक्खी आगा नु ब्रोल्लो सेरथे फुल्लु मेर बाक्तेक्म। **७**मेकोपुकीमी बुटा आन आगामी ग्रीतेक्म। मिनु बुटा आगामी बुक्तेक्म। **८**मेको निप्स मपाइशशो, महिक्सीशो मुर बाक्तेक्म। रागी रे तिल्शा खेरचा पुंडसीशो बाक्तेक्म।

**९**मुल गो मेको आन शुक्शी पतीके कुम्सो दुम्ती। आं पर्वम शुक्शी लोव्र ला पाइनीम। *भजन संग्रह ६६:१३; बिलाप ३:६३*  
**१०**मेकोपुकीम आं कली ग्रांग्रा दिशो मिन्नीम। आं क्येडा डोन बाक्नीम। आं कुलुम तोक्चा मुने मपाइनीम। *अय्युब १७:६; मत्ती २६:६७* **११**मारदे हना परमप्रभुमी आं

लिब्रा प्राक्शा, आं कली श्येत गेतीके, मेकोपुकीम आं डोंइती 'मारेइ मारेइ पने चाप्नीक' दे मिन्नीम। १२ आं ग्युरा गे थम मरिम्शो मुर बोक्नीम। मिनु आं खोइली ग्रेक्पाइक्नीम। मिनु मेकोपुकीम आं गाक्तीक लां तेक्नीम। १३ मेकोपुकीम आं लां प्रेत्नीम। आं श्येत तेम्नीम। मिनु सुइमी मेको आन कली 'मोदेशो मपचा' दे मतेक्नीम। १४ मेकोपुकी ठेयब पोव्रलाम रिक्थ्री मरिक्थ्री पा ओव्रनीम। मेकोपुकी ब्रेशो गारो रे नेम्मुशा जाक्नीम। १५ मिनु गो शुश हिंना हिंन बाक्नुड। मेकोम आं मान ततीक फशेम खोदेशो पा हरुर पा योल्पाइक्तु। आं शोंप बाक्शा रिम्शो दुम्तीके गोस्स खोदेशो पा जाम्शा लत।

१६ मुल आं थुं बेक्ना बेक्न लशो बाक्ब। मिनु श्येत जतीक नाक्त ला लीशो बाक्नीम। १७ नाक्दो आं रुश शुश खाइक्नीम। मेको खाइक्तीके गेनायो मनाइक्ब। १८ परमप्रभुमी आ ठेयब सक्तिमी आं वा फ्रुप्ब। मिनु वाम शुरम खाइशो खोदेशो पा खाइक्ब। *अय्युब ७:५; अय्युब १६:८* १६ मेकोमी आं कली हिलोम ब्वारशो बाक्ब। मिनु गो फुरक नु पुलु खोदेशो दुम्शो बाक्नुड।

२० गो इन कली 'वारच पाइय्यीनी' दे पुंडता। तन्न गे आं कली लोव्र मलेत्तीनी। गो इन कली राप्शा रिम्शा बाक्ती। तन्न गे आं कली मकोव्रयीनी। *अय्युब १६:७; भजन संग्रह २२:३* २१ गे आं कली ठेयब श्येत गेब दुम्शो बाक्नीनी। इन ठेयब सक्तिमी आं कली खेदा पाइनीनी। २२ गे आं कली क्युकशा फश गिवारम बेरपाइक्तीनी। मिनु आं थुं लुकच लपाइक्तीनी। २३ गे आं कली साइक्नीनी, गो मेको तुइशो बाक्नुड। ब्रोंइशो नेल्ल मेको लां लाइनीम।

२४ थमा पा, मेकोमी प्रुडग आन कली श्येत मगेब। मुर श्येत जशा 'वारच पाइय्यीनी' दे ग्रीनीम। २५ मार, गो श्येत जशो मुर आन पर्वम मडाक्डा डा? मार, प्रुडग आन पर्वम आं थुं मखाइक्म डा? २६ मो हना यो गो रिम्शो दुम्तीक आस पाता। तन्न मरिम्शो कका जाक्त। छेडछेड रिम्शा बाक्ती। तन्न छिडछिड कका जाक्त। २७ आं थुं गेना हना यो ग्येत्थ लुकच दुम्ब। गो गेना हना यो श्येत जचा माल्नुड। २८ गो क्येर नाक्दोम गाक्नुड। गो युम्तीकेमी 'वारच पाइय्यीनी' दे पुंडनुड। २९ गो सिवार आन लोक्ब दुम्शो बाक्नुड। हुहुचील आन वारच दुम्शो बाक्नुड। ३० आं कुशुल क्येर दुम्शा, आं रुश नेल्ल चोइनीम। ३१ आं बीना रोंका पा ग्रीब। आं बांसुरी डाक्शो मुर आन कली ताप्शो बाक्ब" देंमाक्त।

अय्युबमी "गो ठीक पाइब नड" देशो

**३१** मिनु अय्युबमी "गो सुइ मीश आल आन कली मरिम्शो थुंम मकोव्रचा कली, आं मिक्च नु कबल पाता। *मत्ती ५:२८-२९* २ मिनु परमप्रभुमी इर रे आं कली गेबा? नेल्ल क्येडा ठेयब सक्ति पाइशोमी मार शोंप गेबा? ३ मार, ठीक मपाइब आन कली शुश हिंचा डा श्येत मदुम्बा डा? मरिम्शो पाइब आन कली खतम दुम्तीकेम मसुम्बा डा? ४ परमप्रभुम आं पशो नेल्ल तुइक्ब। मिनु आं गाक्शो नेल्ल कोव्रब। *अय्युब २३:१०*

५ गो हेंथे गाक्शो बाक्ती हना, दूली लां गाक्शो बाक्ती हना, ६ परमप्रभुमी आं कली ठीक नाक्तीकेमी नाक्तील। मिनु मेकोमी आं गेना हना यो रिम्शो पशो तुइक्ब। ७ गो ठीक लां रे ग्येत्थ लुकच

लशो बाक्ती हना, आं थुंम आं मिक्चीम दाक्शो खोदेशो पा पशो बाक्ती हना, आं गुडमी ग्रांग्रा दिशो गेय पशो बाक्ती हना, ८ आं खुम्शो अन्न अरुम जामेकल। मिनु आं शोकशो मारेइ मारेइ तुल्सीमल।

उत्पत्ती २६:१६

९ आं कली मीश मुरुम हेंथे गाकपाइक्ती हना, गो आं नेक्था डा मुर आन लाप्चोमी बाप्शा बाक्शो बाक्ती हना, १० आं मीश अरु मुर आन वाइलीम दुम्शा लल। मिनु अरु मुर मेको नु इम्मल। २सायुएल १२:३२ ११ मारदे हना मेको थम मरिम्शो गेय बाक्ब। मेको निसाफ पचा कली मरिम्शो बाक्ब। १२ मेको जम्शा लतीकेम सोइक्ब मी खोदेशो बाक्ब। मेकोमी आं बाक्शो मारेइ मारेइ खतम पोक्ब।

१३ गो आं वाइलीम वाइल आन थुं मनुशो लोव्र पाता हना, सिक्सी पपाइक्तामी। १४ परमप्रभु आं पर्बम बोक्मेनु, गो मार पाइनुडा? मेकोमी आं कली लोव्र पथ ब्रेत्ताक्व हना, गो मार लोव्र लेत्नुडा? १५ आं ममा आ कोव्रजम आं कली सेल्बम मेको आन कली यो मसेला डा? मेकोमीन आंइ कली आंइ ममा आ कोव्रजीम मसेला डा?

हितोपदेस १४:३१; मत्ती २५:४०

१६ गो पुडग आन कली आन माल्शो थोव्रक मगेशो बाक्ती हना, आन वोंइश बेक्शो मीश मुर आन कली डाकपाइश्शो बाक्ती हना, अय्युब २६:१२ १७ गो आं जचा थोव्रक आं कान जशो बाक्ती हना नु रोम रोइक्च आन कली योक्शा मगेशो बाक्ती हना, मोदेशो दुम्ल। १८ गो रोम रोइक्च आन कली आन आफोमी खोदेशो पा थुल्तामी। गो जरमेसीड रेन आन वोंइश बेक्शो मीश मुर आन कली वारच

पाइक्तामी। अय्युब २६:१६ १९ गो पुडग आन कली वा मफेक्शो ताता हना, नाक्दो फेक्तीक मबाक्शो बाक्त हना, २० मेको आन कली आं भेडा आन ऊन रे सेल्शो फेक्तीकेम महोपाइक्तीके मेकोपुकीम आं कली आसीक मगेशो बाक्तेक्म हना, २१ गो रोम रोइक्च आन कली मरिम्शो पशो बाक्ती हना, ठेयब लाप्चोम बाक्बपुकीमी 'गे ठीक पाइब बाक्नीनी' देशो बाक्तेक्म हना, २२ आं बला आं ची रे दोक्ल। आं गुइ जिक्शा दोक्ल। २३ तन्न गो परमप्रभु आ गेशो हिंचा डा श्येत तशा हिंनुड। मिनु गो मेको आ ठेयब मान ततीके फाल्ने मचबु।

२४ गो सुन कली थमा सुइश्शो नड हना, क्येख सुनमी आं कली रिम्शो ब्रोंइचा गेब, दे मिम्शो नड हना, भजन संग्रह ५२:६ २५ गो आं ठेयब शोंप तशा शुश ग्येरसीशो बाक्ती हना, आं शुश मारेइ मारेइ बाक्शो आ पर्बम आं कली रिम्शो बाक्चा गेब, दे मिम्शो नड हना, २६ गो नां गे कोव्रशा मेको कली ठेयब सेल्शो नड हना, तास्ला आ दारस कली ठेयब सेल्शो नड हना, ब्यवस्था ४:१६ २७ मेकोम आं थुं कली खुइश्शोमी हेंथे मिम्ब सेल्शो बाक्ती हना, मेको कली पुक्पु पाइक्चा कली आं गुइ क्युक्शो बाक्ती हना, २८ मेको नेल्ल सजाइ तचा डा पाप दुम वा। मारदे हना गो स्वर्गम बाक्ब परमप्रभु आ पर्बम दूली लोव्र पाइब दुम्ड वा।

२९ गो आं कली काइ मदाक्बपुकीमी श्येत जशो तशा ग्येरशो बाक्ती हना, मेको आन कली मरिम्शो दुम्तीकेम सुमानु, ग्येरसीशो बाक्ती हना, हितोपदेस २४:१७; भजन संग्रह ५:५; भजन संग्रह ३५:१३-१४ ३० गो 'मेकोपुकी बेक्मल' दे सराप चीले पा

पाप मपड। १ पत्रुस ३:६ ३१ आं गेय पाइब नेल्लेम गेनायो 'अय्युब आ भोजम मुर मरूम' मदेंम। ३२ अर्को रागी डा मुरपुकी गेनायो लांम इप्चा ममाल्म। लां गाकब आन कली गेना हना यो आं खिं डा लाप्चो रोकशो बाक्त। न्यायाधीस १६:२०-२१; १ पत्रुस ४:६; हिब्रू १३:२ ३३ अरु मुरपुकीम आन हेंथे पशो खुइक्चा माल्शो खोदेशो पा, गो आं थुंमी आं मरिम्शो पशो मखुइक्तु। ३४ मारदे हना गो हुलपुकीम मार देंनीमी, दे हिंती। मिनु खिं खिं डा आन शुक्शी पतीक रे शुश हिंती। मोपतीके गो सिक्सी पा बाक्ती। गो खिं रे मरूड।

३५ गो आं लोव्र नेंब का बाक्शो हना, नेल्ल क्येडा ठेयब सक्ति पाइश्शोमी आं लोव्र लेत्तल। आं कली दोस गेशा ब्रेक्शो ब्रेक्स ते बाक्बा? अय्युब २३:३-७ ३६ थमा पा, गो मेको आं बलाम लाम्सीड वा। गो मेको सिरपेच खोदेशो पा गुक्सीड वा। ३७ मिनु आं पशो गेय नेल्ल मेको कली शेंदु वा। गो मेको आ डोंइती ठेयब मुर कली गुमथ लशो खोदेशो पा लड वा।

३८ आं रू आं कली दोस गेशा ग्रीशो बाक्त हना, मेकेर डा खप नेल्ल डाक्शो नम हना, ३९ मेकेर वाशो मार मार मथाप्यु, जशो बाक्ती हना, मेको रू आ होव्रप कली श्येत गेशो बाक्ती हना, ४० चेरब आ पा डा चोंक चू वामल। क्योव्रज आ पा डा सुवा वामल" देंमाक्त। मोपा अय्युबमी आ लोव्र थुमा बाक्त।

### एलीहु आ लोव्र

अय्युब ३२:- अय्युब ३७:-

**३२** मिनु मेको मुर सांमी अय्युब कली लोव्र पचा प्रोन्मे बाक्त। मारदे हना अय्युबम आंम कली "गो ठीक

पाइब नड" देंस डा देंस पवा बाक्त। २ मिनु राम आ खिं डा बूज डा बाराकेल आ तौ एलीहु गाइक्ता बाक्त। मारदे हना अय्युबमी आंम कली परमप्रभु आ डोंइती शुश पाप मपाइब खोदेशो सेल्से बाक्त। उत्पत्ती २२:२१; अय्युब १३:१८; अय्युब १६:६-७; अय्युब २५:५-६ ३ अय्युब आ वारच सां आन कली तशा यो गाइक्ता बाक्ब। मारदे हना मेकोपुकीमी अय्युब कली लोव्र लेत्ने मचाप्मे बाक्त। मो हना यो मेकोपुकीम अय्युब कली दोस ताइब सेल्मे बाक्त। अय्युब १५:४; अय्युब १८:२१; अय्युब २०:२६; अय्युब २२:५ ४ मेकोपुकी अय्युब नु लोव्र पामेनु एलीहु चहिं सिक्सी पा बाक्शो बाक्माक्त। मारदे हना, मेको आन क्येडा आल बाक्माक्त। ५ मिनु मेको सांमी अय्युब कली लोव्र लेन्ने मचाप्शो तशा, एलीहु गाइक्ता बाक्त।

६ मिनु बूज डा बाराकेल आ तौ एलीहुम "गो आइक्चीन बाक्नुड। गेपुकी खाल्पा बाक्नीनी। मोपतीके इन डोंइती आं तुइश्शो मदेंड, दे सिक्सी पा बाक्ती। ७ गो 'खाल्पा मुर ब्वाक्चा माल्नीम। खूशोपुकीम आन तुइक्तीके शेंदमेक्ल' देंती। अय्युब १२:१२ ८ बेक्शा लाइब मुरपुकी नु नेल्ल क्येडा ठेयब सक्ति पाइश्शो आ सोक्त बाक्ब। मिनु मेकोमी मुर आन कली रुप्तीक थुं गेब। ९ खाल्पापुकी ला जोक्ब तुइक्ब मबाक्नीम। खूशोपुकी यो मार ठीक बाक्बा, मेको मरुप्नीम। १० मोपतीके गो आं लोव्र नेनीन। गो आं मिम्शो देंचा गेयीनी।

११ नेनीन। गो इन लोव्र नेंस डा नेंस बाक्ती। गो इन लोव्र रिम्ना रिम्न बाक्ती। इन मिम्शा पशो जोक्तीक तुइक्तीक लोव्र नोफा दाइश्शा नेंशा बाक्ती। १२ गो इन

देशो लोव्र नेना नैन बाक्ती। तन्न गेपुकीम अय्युब कली शेंने मचाप्नी। मेको आ लोव्र यो लेन्ने मचाप्नी। १३ 'गोपुकीम तुइक्तीक थुं तशो बाक्नीकी' मदेनी। 'मुरपुकीम ममाइ परमप्रभुमीन मेको कली सजाइ गेवल' मदेनी। १४ तन्न अय्युबम आं पबर्म मारेइ मदे। गो इन लोव्र खोदेशो पा मेको कली लोव्र मलेत्तु।

१५ एकोपुकी श्येतथ दुम्शो बाक्नीमी। मिनु एकोपुकीमी मारेइ लोव्र लेन्ने मचाप्नीम। १६ एकोपुकी मब्वाक्तेकम हना यो, गो रिम्शा बाक्नुडा डा? मारदे हना एकोपुकी राप्शा बाक्नीम, लोव्र चहिं मलेत्नीम। १७ मुल गो लोव्र लेत्नुड। आं मिम्शो लोव्र पाइनुड। १८ मारदे हना गो शुश लोव्र पचा माल्शो बाक्नुड। आं आगा डा सोक्तीमी आं कली लोव्र पपाइक्ब। १९ गो लोव्र पचा मताता हना, नक शांबुम ब्रीशो कुशुल के थैलो खोदेशो पा बुक्ने चाप्नुड। २० आं थुं नाइक्पाइक्चा कली गो ब्वाक्चान माल्नुड। गो लोव्र लेत्चा माल्नुड। २१ गो सुइ आन कुल कोव्रशा लोव्र मपाइनुड। गो सुइ नु मिलो शिलो मपाइनुड। २२ मारदे हना गो मिलो शिलो पस मजोक्नुड। मो पाता हना आं कली सेल्बम आं कली रीब पा खतम पोक्ब।

**३३** अय्युब, मुल आं लोव्र नेनीन। आं देशो लोव्र नेल्ल नोफा दाइशशा नेनीन। २ कोव्रडीन, गो लोव्र लेत्चा कली ठीक दुम्शो बाक्नुड। आं शोव्र लोव्रम ब्रीशो बाक्ब। ३ गो आं लोव्रमी 'गो रिम्शो थुं पाइशो मुर नड' दे कोइनुड। गो मार लोव्र देंनुडा, मेको थमा बाक्ब। ४ परमप्रभु आ सोक्तीम आं कली सेल्लती। मिनु नेल्ल क्येडा ठेयब सक्ति पाइशोमी आ ब्रोंइतीक सोक्त गेती ५गे

चाप्नीनी हना, आं लोव्र लेत्तीनी। इन देंचा माल्शो लोव्र डोंइतीन मिम्तीन। मिनु गो नु लोव्र पने। ६ परमप्रभु आ डोंइती गो यो इन खोदेशोन नड। गो यो खप केन सेल्शो नड। अय्युब १०:६ ७गे आं कली तशा महिनीन। गो इन कली श्येत मगेनुड।

८ गो इन देंचा माल्शो लोव्र नेल्ल नेंता। मिनु इन ब्वाक्शो नेंता। ९गे 'गो दोस मताइब नु हेंथे मपाइब बाक्नुड। गो मरिम्शो मपाइब, गेना हना यो रिम्शो पाइब बाक्नुड' अय्युब १६:१७; अय्युब २७:६; अय्युब ३१:१-४० १० मो हना यो 'परमप्रभुम आं दोस थिन्ना थिन्न बाक्ब। मेकोमी आं कली आ जोरी सत्रु मिम्शो बाक्ब। अय्युब १३:२६; अय्युब १६:११ ११ आं खोइलीम ठेंडरो थोक्ताक्नी। आं लां नेल्ल कोव्रशा, वोइक्नीनी' दे लोव्र पाइतीनी। अय्युब १३:२७ १२ तन्न गे दूली मिम्ब बाक्नीनी। गो इन कली लोव्र लेत्ननी। बेक्शा लाइब मुर आन क्येडा परमप्रभु ठेयब बाक्ब। १३गे मारदे परमप्रभु नु इन थुं मनुशो लोव्र पाइनीनी। मिनु गे 'मेकोम आं लोव्र काइ मलेप्ब' देंनीनी? १४ परमप्रभुमी खेयप का निकशी लोव्र पाइब। तन्न मुरपुकीम मेको मरुप्नीम। १५ डोमुमी, नाक्दो ततीकेमी, निन्द्वा पशोन, बेक्शा लाइब मुर ब्राख्येम गोल्शा इम्मानु, अय्युब ४:१२-१६ १६ परमप्रभुम मेको आन नोफा नेंब सेल्ब। मिनु मेको आन कली शेंदानु, 'परमप्रभु आ लोव्र बाक्माक्त' दे तुइक्नीम। अय्युब ३६:१० १७ मेकोमी मुर आन कली आन मरिम्शो पशो रे रिम्शो सेल्चा कली नु मेको आन ठेयब लेत्तीक तेक्चा कली लोव्र पाइब। १८ परमप्रभुम मेको कली बेक्चा रे प्रोंइचा दाक्ब। मेको आन कली तरवार रे प्रोंइचा दाक्ब। १९ मिनु मुर खाइक्स डा खाइक्स

पा आन ब्राख्येम इप्शा, सजाइ ताइनीम। मिनु आन रुश गेना हना यो खिंखि पाइनीम। २० मोपा मेकोपुकीम आन जचा थोव्रक ग्रांघ्रा दीनीम। मिनु थम ब्रोव्रशो जचा थोव्रक यो मदाक्नीम। २१ मिनु मेको आन रां गेयशा सोव्रनीम। मिनु मेको आन खुइश्शो रुश तांइसीनीम। २२ मेको आन सोक्त लचा चिकशो बाक्ब। मेको आन ब्रॉइतीक नाक्त नुप्चा चिकशो बाक्ब। २३ मो हना यो मेको मुर आन दातेमी का कली परमप्रभु आ हजार हजार स्वर्ग डा गेय पाइब कामी वारच पा, मेकोमी 'मेको रिम्शो थुं पाइश्शो मुर बाक्ब' देंत हना, २४ मिनु मेकोमी मुर कली शिशी पा 'मेको मुर कली बेक्चा रे प्रोनीन। मेको कली प्रॉइतीक थोव्रक गो नु बाक्ब' देंत हना, भजन संग्रह ४६:८-११ २५ मेको मुर आ श्ये ठिटा के खोदेंशो पा नक दुम्ब। मेको आ ठिटा ना डा खोदेंशो दुम्ब। भजन संग्रह १०३:५ २६ मिनु मेकोमी प्रार्थना पवानु, परमप्रभुमी नेंब। मेको परमप्रभु आ डोंइती बाक्शा, ग्येरसीशा कुम्सो पाइब। परमप्रभुम मेको आ ठीक पतीक लेंशा डोंइती डा खोदेंशो सेल्ब। २७ मिनु मेको मुरुम मुर आन बाक्तीक जाक्शा, मेको आन कली 'गो पाप पाता। गो ठीक पतीके कली दूली सेल्ता। गो आं तचा माल्शो सजाइ मतड। २८ मेकोमी आं सोक्त कली बेक्तीक रे प्रॉइतु। मिनु गो छेडछेड तचा कली ब्रॉइती' देंब।

२९ परमप्रभुमी एको नेल्ल बेक्शा लाइब मुर आन पर्बम पाइब। खेयप निक्शी, खेयप सां सम्म मो पाइब। ३० बेक्चा चिकशो मुर आन कली तुरसुम लचा रे लेप्पाइक्ब। मोपा ब्रॉइतीक छेडछेड लेंशा ताइनीम। भजन संग्रह ५६:१४; भजन संग्रह १०३:४;

भजन संग्रह ११६:६ ३१ नेनीन अय्युब आं लोव्र नोफा दाइश्शा नेनीन। गे सिक्सी पा बाक्कीन। गो लोव्र पाइनुड। ३२ इन देंचा माल्शो मारेइ लोव्र बाक्त हना, आं कली देनीन। गे ब्वाक्कीन। मिनु गो इन पो न बोक्नुड। ३३ तन्न इन देंचा माल्शो लोव्र मबाक्त हना, सिक्सी पा आं लोव्र नेनीन। मिनु गो इन कली रुप्तीक लोव्र शेंनुड" दे एलीहुम देंमाक्त।

“परमप्रभु ठीक पाइब बाक्ब” देंशो

३४ मिनु एलीहुमी २ “जोक्ब तुइक्ब मुरपुकी आं लोव्र नेनीन। शुश जोक्ब मुरपुकी आं लोव्र इन नोफा दाइश्शा नेनीन। अय्युब १२:१०? ३ मारदे हना दोपा नोफाम लोव्र नेंबा, मोपान लेंम जचा थोव्रक थाम्ब। ४ मोपतीके मार ठीक बाक्बा, मेको गो आंमा योव्रय। मिनु तेको लोव्र रिम्शो बाक्मे, मेको आंमा गारशा कोव्रय। ५ मारदे हना अय्युबम 'गो दोस मताइब मुर बाक्नुड। तन्न परमप्रभुम आं कली ठीक निसाफ मगेयी। अय्युब ३३:६; अय्युब २७:२ ६ गो ठीक पाइब बाक्ती हना यो, आं कली जोल पाइब सुइक्ती। गो हेंथे मपाता हना यो, आं गार मसा' देंत। अय्युब ६:१५, २०; अय्युब ६:४ ७ ब्वाक्कु तूशो खोदेंशो पा शुक्शी पाइब, अय्युब खोदेंशो अरु सुइ मबाक्नीम। ८ मेको मरिम्शो गेय पाइब नु बाक्ब। मिनु परमप्रभु यावे आ अरेशो मटीब नु गाक्ब। भजन संग्रह १:१ ९ मारदे हना मेकोमी 'परमप्रभु कली ग्येरशा टिचा, शोर गाक्शो बाक्ब' देंब। अय्युब ६:२२

१० मोपतीके मारेइ मारेइ तुइक्ब मुरपुकी आं लोव्र नेनीन। परमप्रभुम गेनायो मरिम्शो मपाइब। नेल्ल क्येडा ठेयब

सक्ति पाइशोमी गेनायो दूली मपाइब।

अय्युब ८:३; व्यवस्था ३२:४; २इतिहास १६:७

११मेकोमी मुर आन कली मेको आन पशो खोदेशो पा पाइब। मार पाइनीमी, मेकोन ताइनीमी। १२एको थमा लोत्र बाक्ब। परमप्रभुम गेनायो मरिम्शो मपाइब। नेल्ल क्येडा ठेयब सक्ति पाइशोमी दूली निसाफ मपाइब। अय्युब १६:६ १३सुम रागी मेको आ जिम्माम गेवा? सुम मेको कली रागी नेल्ल डा अधिकार गेवा? १४मेकोमी ब्रोंडचा गेब सोक्त नु आ सास लेशशा लाइक्चा मिम्ताक्व हना, १५याम कामीन सोक्त पाइशो नेल्ल बेक्नीम। मिनु मुर लेंशा फुरकुम लेशशा लाइनीम।

भजन संग्रह १०४:२६

१६गे इन के रुपतीक थुं बाक्त हना, आं देशो नेनीन। गो मार देंडा, मेको नोफा दाइशा नेनीन। १७ठीक निसाफ कली काइ मदाक्ब मुर सासन पने चाप्बा डा? मार, गे ठीक पाइब नु सक्ति पाइशो कली दोस ताइब मिम्नीनी? १८सुमी पिप कली 'हिंचा डा मरिम्शो पाइब बाक्नीनी' देंबा? मिनु ठेयब मुर आन कली 'परमप्रभु यावे आ अरेशो मटीब बाक्नीनी' देंबा? १९मेकोम पिप आ तौ आन कुल मकोवब। मेकोम शोंप पाइशो नु पुडग नेल्ल आन कली उइक्थ मिम्ब। मारदे हना मेको नेल्ल आ सेल्शो नम। २०मेकोपुकी याम कामीन बेक्शा लाइनीम। नाक्दो उइक्थ दुम्मेनु, मेकोपुकी खिंखि पा बेक्नीम। सक्ति पाइशो मुर यो सुइम मारेइ मपाइक्थु बेक्नीम।

२१मेकोमी मुर नेल्ल आन पतीके कोव्रशो बाक्ब। मिनु मेको आन गाक्शो नेल्ल कोव्रशो बाक्ब। अय्युब ३१:४; हितोपदेश ५:२१ २२मेकेर मरिम्शो पाइब

आन खुंडसीतीक छिडछिड मबाक्ब।

भजन संग्रह १३६:११-१२ २३परमप्रभुम आ

डोंइती निसाफ पुंडथ जाक्ब मुर आन कली 'एको नाक्त जाक्कीन' मदेंशो बाक्ब। २४मेकोम खुदील निदील मपथुन सक्ति पाइशो आन कली तिल्ल। मिनु मेको आन पा डा अरु आन कली वोइक्ब। २५मारदे हना मेकोम मेको आन पशो गेय नेल्ल तुइक्ब। मिनु मेको आन कली काबु नाक्दोमीन तिल्ल। मिनु मेकोपुकी खतम दुम्नीम। २६परमप्रभु यावे आ अरेशो मटिशो आ पबर्म मेको कली खतम पोक्ब। मिनु मेको मुर नेल्लेम ताइनीम। २७मारदे हना मेकोपुकी मेको आ नोले खोइक्चा प्रोंइतेक्म। मिनु आ कोंइशो लां ममिम्तेम। २८मेकोपुकीम पुडग आन डाक्शो मेको आ डोंइती जाक्दीपपाइक्तेक्म। मेकोम मारेइ मथीब आन पुंडशा ब्रेशो नेंतु। उत्पत्ती १६:११ २९तन्न मेको सिक्सी पा बाक्त हना, सुम मेको कली दोस गेने चाप्बा डा? मेकोम आ कुल खुइक्ताक्व हना, सुम मेको कली तने चाप्बा डा? रागी डा मुर नेल्ल कली नु मुर का कली मेको कान बाक्ब। ३०मिनु परमप्रभु कली मटीब मुरुम सासन मपवल। मिनु मुर आन कली श्येत गेब सासन पाइब मदुमल।

३१मिनु मेकोमी परमप्रभु कली 'गो सजाइ फाल्ता। गो मुल रे मरिम्शो गेय मपाइक्नुड। ३२आं मतुइशो आं कली शेंदीनी। गो मरिम्शो पाता हना यो, मुल रे मो मपाइनुड' देंब। ३३मार, मेकोम इन देशो खोदेशो पा इन कली पचा माल्बा डा? मारदे हना गे आ देशो मबिल्लीनी। गे इन लां योव्रचा माल्लीनी। गो मो मपाइनुड। मोपतीके इन तुइशो आं कली

शेंदीनी। ३४ निप्स पाइशो मुर नेल्लेम नु जोक्ब तुइक्ब कामी आं लोव्र नेंशा ३५ 'अय्युब मजोक्थु, लोव्र पाइब बाक्ब। आ लोव्र मरुप्चा डा बाक्ब' देंनीम।  
 अय्युब ३८:२ ३६ अय्युबम मेको क्येडा तेम्शा श्येत जवल। मारदे हना आ लोव्र परमप्रभु आ अरेशो मटीब आन लोव्र खोदेशो बाक्ब। ३७ मेकोमी आ पाप तेम्ब। आंइ दातेमी शुश हेंथे पना पन बाक्ब। मिनु मेकोमी परमप्रभु आ पर्वम मरिम्शो लोव्र शुश तेम्ब" दे एलीहुमी देंमाक्त।

### एलीहु आ लोव्र

**३५** मिनु एलीहुमी २ अय्युब कली "परमप्रभु आ डोंइती 'गो ठीक बाक्नुड' देंचा रिम्शो बाक्बा? अय्युब ३२:२ ३गे मेको कली 'गो पाप मपाता हना, मार दुम्बा डा? मिनु पाप मपथु आं कली मार रिम्शो दुम्बा डा?' देंतीनी। अय्युब ३४:६ ४गे नु इन वारच सां इन कली गो लोव्र लेत्नुड। ५इर सरीड गे कोव्रडीन। इन क्येडा इर बाक्शो गोस्स कली कोव्रडीन। ६गे पाप पाइतीनी हना, मेको कली मार दुम्बा डा? गे शुश हेंथे पाइतीनी हना यो, मेको कली मार दुम्बा डा? ७गे ठीक पाइब दुम्तीनी हना, मेको कली मार गेनीनी डा? इन गुइ रे मेकोम मार ताइबा डा? अय्युब २२:२-३; रोमी ११:३५ ८इन परमप्रभु यावे आ अरेशो मटितीके इन कली श्येत दुम्शो खोदेशो पा अरु मुर आन कली यो श्येत दुम्ब। मिनु इन ठीक पतीके रिम्शो दुम्शो खोदेशो पा अरु आन कली यो रिम्शो दुम्ब।

९शुश दिप्चा पुंइसीतीके मुरपुकी वाइ ब्रेत्नीम। मिनु सक्ति पाइशो आन पर्वम पुंइशा ग्रीनीम। १०तन्न सुइमी 'आं कली

सेल्ब परमप्रभु ते बाक्बा? नाक्दो आं कली ठेयब सेल्लतीक कुम्सो गेब, परमप्रभु ते बाक्बा? प्रेरित १६:२५ ११मेकोमी आंइ कली रागी डा जन्तु आन क्येडा शुश शेंताक्की। मिनु सरीड डा चिक्ब आन क्येडा आंइ कली जोक्ब तुइक्ब सेल्लु?' मदेंनीम। १२मिनु मुरपुकीम डाक्शा पुन्मेनु, मेको आन लोव्र मनेंब। मारदे हना मेको मरिम्शो पाइबपुकी ठेयब लेशो बाक्नीम। १३थमा पा परमप्रभुमी मेको आन हेंथे पुंइशो लोव्र मनेंब। नेल्ल क्येडा ठेयब सक्ति पाइशोमी मेको लोव्र नोफा मदाइक्ब। यूहन्ना ६:३१ १४मिनु गे 'गो मेको कली मतड' देंनीनी। इन पशो नेल्ले मेको आ डोंइती बाक्ब। मोपतीके रिम्दीन। अय्युब २३:८-९ १५परमप्रभु आ गाइशोम सजाइ मगेब। मिनु हेंथे गाक्शो मकोव्रब। उपदेसक ८:११ १६मोपतीके अय्युबम फश लोव्र ला पाप्तु। शुश फश लोव्र ला पाप्तु" देंमाक्त।

### परमप्रभु आ गेय ठेयब बाक्ब

**३६** मिनु एलीहुमी लेंशा २"गो नु फाल्शा बाक्तीनी हना, इन कली मारेइ कोइनुड। गो मुल यो परमप्रभु आ पर्वम इन कली लोव्र पचा माल्नुड। ३आं जोक्शो थुं डा लोव्र डोन रे चाक्नुड। आं कली सेल्ब ठीक पाइब बाक्ब। ४थमा पा, आं लोव्र हेंथे मबाक्ब। आं लोव्र थम पा जोक्ब तुइक्ब मुर इन डोंइती बाक्ब।

५थमा पा परमप्रभु सक्ति पाइशो बाक्ब। मेकोम सुइ आन कली आइक्च मसेल्ब। मेको आ जोक्तीक तुइक्तीक ठेयब बाक्ब। ६मेकोमी आ अरेशो मटीब आन कली ब्रोंइचा मगेब। आइक्च मुर

आन कली ठीक निसाफ पाइब। भजन संग्रह ७२:४,१२; भजन संग्रह १४६:७-९ ७मेकोम ठीक पाइब आन कली कोव्रब। मिनु मेको आन कली गेना हना यो पिप नु वोइक्ब। मिनु मेकोपुकी ठेयब सेल्चा पुंडसीनीम। भजन संग्रह ११३:७-८ ८तन्न मेको आन कली साडलोम पाइक्ताक्म हना, श्येत जाम्तेक्म हना, ९मेको आन शुश हेंथे पशो नु ठेयब लेशशो आ पर्बम परमप्रभुमी सजाइ गेशो बाक्ब। १०मेकोमी मेको आन कली श्येत गेशा रुप्ब मुर सेल्ब। मिनु मेको आन मरिम्शो पतीक रे लेप्पाइक्चा कली अरेब। अय्युब ३३:१६ ११मिनु मेकोपुकीम मेको आ लोव्र नेंतेक्म हना, मेको आ अरेशो टिशो आ गेय पाम्तेक्म हना, मेकोपुकीम आन लीशो नाक्ती रिम्शो पा बाक्चा ताइनीम। मिनु आन लीशो बर्स रिम्शो पा लाक्नीम। १२तन्न मेकोपुकीम मेको आ लोव्र मनेतेक्म हना, मारेइ मतुइक्थु, तरवारम साइक्चा पुंडसीनीम।

१३परमप्रभु कली मान मपाइब मुर गाइक्स डा गाइक्स बाक्नीम। परमप्रभु रे पा सजाइ तामेनु, यो मेकोपुकीम 'वारच पाइक्की' दे मपुंडनीम। १४मेकोपुकी ठिटा बाक्ची ना मुने दोक्शा बेक्नीम। १५परमप्रभुमी श्येत जशो आन कली आन श्येत रे प्रोइब। मोपा मेको आन श्येत तशा, रुप्ब दुम्नीम। १६मोपा इन कली यो श्येत रे गुंडब। इन कली रिम्शो बाक्तीकेमी वोइक्ब। गे लेशा ब्रोव्रशो जचा थोव्रक जचा ताइनीनी।

१७गे मुल चहिं परमप्रभु यावे आ अरेशो मटीब आन ततीक सजाइ तन तन बाक्नीनी। मोपान मेको आन दोस नु सजाइम इन कली यो ग्याइक्ब। १८होस

पा बाक्कीन। इन गाइक्तीकेम इन कली शुक्शी मपपदल। मिनु शुश घूस जतीकेमी इन कली हेंथे पाइब मसेलल। १९गे इन कली 'वारच पाइय्यीनी' दे ग्रीचा शोर गाक्शो बाक्ब। इन शुश शोप नु इन सक्तिम इन कली श्येत रे प्रोइने चाप्बा डा? २०गेना नां रिक्बा, मिनु इप्चा, दे ममिम्तीन। मारदे हना मुर आन इप्तीकेम साइक्चा पुंडसीनीम। २१मरिम्शो पतीक गे मलन। होस पा बाक्कीन। मारदे हना गे मेको आ पर्बम श्येत जाइब दुम्तीनी। २२परमप्रभु आ सक्तिम पतीके ठेयब सेल्चा पुंडसीब। मेको खोदेशो शेंब अर्को सु बाक्बा डा? भजन संग्रह २५:९ २३सुम मेको कली आ लां कोइशो बाक्बा? मिनु मेको कली 'गे दूली पाइतीनी' दे सुम देंने चाप्बा डा?

### एलीहु परमप्रभु कली ठेयब सेल्शो

२४गे मेको कली मेको आ गेय आ पर्बम ठेयब सेल्चा, मप्रेंदीन। मुरपुकीम मेको आ पर्बम कुम्सो पशो बाक्तेक्म। २५मुर नेल्लेमी आ पशो तशा कोव्रतेक्म। तन्न डोन रे ला ताम्तेक्म। २६परमप्रभु थमा पा ठेयब बाक्ब। मिनु गो मेको मतुइक्नीकी। मेको आ बर्स हिक्ने मचाम्सीब। २७मेकोम ब्वाक्कु आ तेप्का गुप्ब। मिनु आ सेल्शो गोस्सुम वोइक्ब। २८मिनु सरीड रे रेउ यीब। मेकोमी मुर आन कली शुश जिप्पाइक्ब। २९सुम गोस्स आ ब्रशो रुप्ने चाप्बा डा? आ बाक्तीक रे बुंबु पशो सुम रुप्ने चाप्बा डा? ३०मेकोमी सरीड आ एर ओंथ आ चिला सोइक्ब। मिनु मेको समुन्द्र आगा सम्म लाइब। ३१मोपा मेकोम जात जात डा मुर आन कली सासन पाइब। मिनु

मेको आन कली शुश जचा थोव्रक गोब। ३२मेको आ गुडम चिला बाक्ब। मिनु मेकोमी खपाइक्चा कली आप्ब। ३३मेको चिला आ पपाइश्शो रेयकेम मेको आ सक्ति आ पर्वम लोव्र पाइब। मेको हेंथे गाक्ब आन पर्वम रुश पा शुश गाइक्ब।

### एलीहुम लेंशा लोव्र पशो

**३७** मेको तुइश्शा आं लुडगीर थाम्पा प्रेक्ब। मेको आ बाक्तीक प्रोइशा प्रेक्ब। २नेनीन, आ सेंदाम बुंबु पशो नेनीन। मिनु मेको आ शोव्रम ब्वाक्शो ठेयब सेंदा नेनीन। ३मेकोम सरीड आ एर ओंथ आ सेंदा नेंपाइक्ब। आ चिला रागी डा सुर सम्म दाप्पाइक्ब। ४मेको आ नोले मेको आ ठेयब सेंदा नेंसीब। मेको आ मान पाइक्चा पुंइसीब सेंदा नेंसीब। मिनु मेकोम आ सेंदा नेंपाइक्ब। आ चिला पतीके मतेक्ब। ५परमप्रभु आ सेंदा बुंबु पशो खोदेशो हिंचा डा पा नेंसीब। मेकोमी गोपुकीम मरुप्चा डा पा ठेयब गेय पाइब। ६मेकोम फुं कली 'रागीम दोक्को' देंब। मिनु रेउ कली 'धारा खोदेशो पा यीवो' देंब। ७मेको मुर नेल्ल आन चिन्ड का बाक्ब। मिनु आ सेल्शो मुर नेल्लेम 'मेको परमप्रभुम पाप्तु' दे तुइक्नीम। ८मेना ब्वाकी डा जन्तु आन पुक्खी गे लाइनीम। मिनु मेकेर लशा बाक्नीम। *भजन संग्रह १०४:२१-२२* ९फश गिवार आ बाक्तीक रे गूब। मिनु फश रे पा गू जाक्ब। १०परमप्रभु आ सासमी फुं दुम्ब। मिनु ठेयब ब्वाक्कु नेल्ल रीब पा फुं दुम्नीम। ११मेकोमी ठेयब गोस्स कली ब्वाक्कु कुरपाइक्ब। मिनु गोस्सपुकीमी आ चिला तेइ तेइ फ्राइनीम। १२मेकोपुकी

आ कोइशो रागी आ एर ओंथ डा लां नेल्ल गाक्नीम। मोपा मेकोपुकीमी परमप्रभु आ देंशो मुर बाक्शो रागी आ तार नेल्ल पाइनीम। १३परमप्रभुम रागी जिप्पाइक्चा कली रेउ यिपाइक्ब। मेकोम मुर आन कली सजाइ गेचा कली नु आ रागी कली शिशी कोइचा कली रेउ यिपाइक्ब।

१४अय्युब, गे एको लोव्र नेनीन। सिक्सी पा बाक्शा परमप्रभु आ छक लाक्चा डा गेय मिम्तीन। १५परमप्रभुम गोस्स आन गेय दोपा पपाइक्बा? मिनु आ गोस्स रे दोपा चिला दाप्पाइक्बा, मेको गे तुइक्नीनी डा? १६गोस्सपुकी दोपा सरीडम ग्युक्शा बाक्नीमी? मेको आ छक लाक्चा डा गेय बाक्ब। मेको नेल्ल जोक्ब बाक्ब, दे गे मतुइक्नीनी? १७दक्खिन डा फशेम इन फेक्शो वा होश सेल्ब। रागी नेल्ल कली सिक्सी पपाइक्ब। १८मार, गे परमप्रभु खोदेशो पा कांसा के ऐना खोदेशो सारो सरीड कली प्राक्ने चाप्नीनी डा? १९मेको कली मार देंचा माल्बा, गे मेको आंइ कली शेंदीन। मारदे हना गो छिडछिडम पतीके मारेइ मिम्ने मचाप्नीकी। २०गो मार देंनुडा, मेको कली हिल्लो पचा माल्नुडा डा? सुइ मुरुम आंम कली दाक्चा पुंइसीचा मदाक्बा डा? २१हाम्सो बाक्त हना यो, गोस्सुम सुम्शो नां कली मुरुम तने मचाम्सीब। फशेमी गोस्स आन कली योल्दा नोले ला नां कली तने चाम्सीब। २२मेको उत्तर रे हो हो पा दाप्शा गूब। मेको परमप्रभु आ एर ओंथ छक लाक्चा डा छेडछेड बाक्ब। २३तन्न गो नेल्ल क्येडा ठेयब सक्ति पाइश्शो कली थिन्ने मचाप्नीकी। मेको आ नेल्ल क्येडा

सक्तिम गेय पाइब बाक्ब। मेकोमी निसाफ पशो नु ठीक पतीके गेनायो दूली मपाइब। २४ मोपतीके मुरपुकीम मेको कली तशा मान पा हिनीम। मिनु आन थुंम 'गो जोक्ब तुइक्ब नड' दे मिम्ब आन कली ठेयब ममिम्ब" दे एलीहुम देंमाक्त।

### परमप्रभुम अय्युब कली लोव्र पशो

अय्युब ३८:- ४२:-

**३८** मिनु परमप्रभु यावेमी अय्युब कली फश गिवार रे पा लोव्र लेशशा, अय्युब ३१:३५ २ "दूली लोव्र पा अर्ती गेब सु बाक्म? मारेइ मजोक्थु मार लोव्र पवा? अय्युब ३४:३५ ३गे बोल्यो मुर खोदेशो दुम्शा रपो। मिनु गो इ कली लोव्र हिल्लो पाइनुड। मिनु गे लोव्र लेत्ती।

४गो रागी आ जग वोदुनु, गे ते बाक्डे? गे रुप्नेवे हना आं कली देनो। ५मेको कली दोमो सेल्चा, दे सुम देंमे? गे तुइक्नेवे? मेको पुक्चा कली सुम डोरी कीडा। मेको गे तुइक्नेवे? हितोपदेस ३०:४ ६मेको आ जग मार तार वोदा? मेको आ सुर डा फुल्लु सुम वोदा? ७मेना सुनी डा सोरुलपुकीमी कालेम कुम्सो पाम्तेक्म। मिनु स्वर्गम बाक्ब नेल्ल ग्येरसीशा ग्रीतेक्म। भजन संग्रह १६:२; अय्युब १:६

८समुन्द्र रागी आ कोव्रज रे बुक्शा ग्रूमानु, मेको ब्वाक्कु तेक्चा कली सुम लाप्चो चोक्गा? भजन संग्रह १०४:८-९; हितोपदेस ८:२९ ९गो मेको कली गोस्स के फेक्तीक सेल्शा, क्येर नाक्दोम मेको कली गिल्शा वोइक्ता। १०मेको आ सांद वोइशशा, थरपु हिरशा, लाप्चोपुकी वोइक्ता। ११मिनु गो मेको कली 'गे ओशो सम्म ला जाक्ने चाप्नेवे। एकेर

सम्म ला जाक्नेवे। इन ठेयब छालपुकी मेक उइ देक्चा माल्नीम' दे माइक्तामी।

१२गे मुल सम्म 'सुनी दुमो' दे अरेवी? सुनी कली मेको आ बाक्तीके तुइक्पदी? १३मेकोमी रागी आ सुर सम्म हाम्सो सेल्ब। आं अरेशो मटीब आन कली खेरचा कली हिम्ब। १४दोपा खप रे मार मार सेल्सीबा, मोपा रागी फांडसीब। मेको वा कली रडम नुप्शो खोदेशो बाक्ब। १५आं अरेशो मटीबपुकीम छेडछेड मताइनीम। मिनु मेको आन पोक्शो गुड जिक्चा पुंडसीनीम।

१६गे समुन्द्र आ बुक्तीक सम्म जाक्दीने? आ नेल्ल क्येडा लुकच डा बाक्तीकेम हिरशा गाक्डे? १७बेक्पाइक्ब आ ठेयब लाप्चो इ कली कोइदमे? गे क्येर नाक्दो डा लाप्चोपुकी तवी? १८गे रागी गिश ठेयब बाक्बा, दे तुइक्नेवे? गे मेको नेल्ल तुइक्नेवे हना, आं कली देनो।

१९छेडछेड आ लतीक लां ते बाक्बा? मिनु छिडछिड आ बाक्तीक ते बाक्बा? २०गे मेको नेल्ल आन बाक्तीकेम लने चाप्नेवे? मिनु गे मेको आन बाक्तीक लतीक लां तुइक्नेवे? २१थमा पा, गे मेको नेल्ल तुइक्नेवे। मारदे हना मेना गे जरमेने थुम्शो बाक्ते। मिनु गे शुश बर्स ब्रोंइने थुम्तीवी।

२२गे शुश फुं बाक्तीकेम ओव्रडे? गे शुश मुप्स बाक्तीक तवी? यहोसु १०:११; यसेया ३०:३० २३गे मेको श्येत डा नाक्ती नु लडाइ डा नाक्त कली खेक्शा वोइक्ता। २४तेको लां रे छेडछेड ब्राइबा? मिनु पूर्व डा फश ते रे गूबा?

२५सुम ठेयब रेउ लतीक लां सेला? बुंबु पतीक आ लां सुम सेला? अय्युब २८:२६ २६मेको मुर मबाक्शो रागी नु गोरशो

रागी जिप्पाइक्चा कली बाक्ब। २७ मुर मबाक्शो रागी नु सोत्रशो रागी गिगी सेल्चा कली सुम लां सेला?

२८ मार रेड आ आफ बाक्बा? सीत कली जरमेब सु बाक्बा? २९ सुका आ कोव्रज रे फुं जरमेसे? सरीड रे दोक्ब फुरश आ ममा सु बाक्बा? ३० ब्वाक्कु फुल्लु खोदेशो सारो दुम्ब। फुरश समुन्द्र आ तार सारो दुम्ब।

३१ गे किरकिटी सोरुल आन कली पाइक्ने चाप्नेवे? गे मिर्गसीरा सोरुल कली खिक्शो डोरी आ गाठो प्राक्ने चाप्नेवे? अय्युब ६:६ ३२ मार गे सोरुल आ हुल आन कली आन गाक्शो लां रे गुंडने चाप्नेवे? सप्तबर्सी सोरुल आन हुल कली लां कोइने चाप्नेवे? ३३ मार गे स्वर्ग डा फुल्लुम मुशा ब्रेक्शो तुइक्नेवे? गे रागीम मेको मोदेशो सेल्ने चाप्नेवे? येस्मीया ३३:२५ ३४ गे गोस्स कली 'रेड यीवो' दे अरेने चाप्नेवे? मिनु मोपा आंम कली जिप्पाइक्ने चाप्नेवे? ३५ मार गे चिला कली आ लांम सोइक्ने चाप्नेवे? मार मेकोपुकीम 'गो एक बाक्तक' दे इ कली देंनीमी। ३६ सुम थुं कली तुइक्तीक गेवा? सुम थुं कली रुप्तीक गेवा? ३७ सरीड डा मारेइ मारेइ हिक्ने चाप्तीक तुइक्तीक थुं पाइश्शो सु बाक्बा? मिनु सरीड डा ब्वाक्कु वोइक्तीके रे सुम ब्वाक्कु थोक्ने चाप्बा? ३८ मोदेशो दुम्त हना, फुरक हिलो दुम्शा, खप डल्ला दुम्शा ग्याइक्मुशा बाक्नीमी।

३९ गे गुप्स कली आ सिखार माल्शा गेने चाप्नेवे? मेको आ शोत्रलु बेक्शो रूपाइक्ने चाप्नेवे? ४० मेको आन पुक्खीम बाक्नीम। खुइश्शा सिखार बाप्शो बाक्नीम। गे मेको कली रूपाइक्ने

चाप्नेवे? ४१ एर ओंथ हिरशो खद आन चाइक्बमी जचा मतथु परमप्रभु कली पुन्मे नोले सुम मेको आन कली थुल्बा?" दे परमप्रभुमी अय्युब कली देमाक्त।

भजन संग्रह १४७:६

### परमप्रभु आ हिल्लो पशो लोत्र

३६ परमप्रभुमी अय्युब कली "रोकोश गेना गिक्बा, गे तुइक्नेवे? छाउरी किश्श गिक्मेनु मेको तशो बाक्नेवे? २ मेकोपुकीम कोव्रजम चाइक्ब कुरमेनु, गे मेको आन महिना हिक्ने चाप्नेवे? गे मेको आन गिक्ची ना तुइक्नेवे? ३ मेकोपुकी गिक्चा कली बाप्नीम। मिनु आन चाइक्ब जरमेनीम। मिनु आन चाइक्ब ब्रोंइशा बाक्नीम। ४ मिनु मेको आन चाइक्ब बोल्यो दुम्नीम। ब्वाकीम कोल्नीम। काबु ब्वाकी मेर लशा, लेशशा मजाक्नीम।

५ सुम ब्वाकी डा गधा कली प्रोना। सुम मेको आ डोरी प्रुदा। ६ गो मेको आन कली 'बाक्कीन' दे गोरशो रागी गेता। मिनु हिक्सी बाक्शो रागी मेको आन कली गेता। ७ मेको सहर डा रेयके रे डोन बाक्नीम। मिनु मेकोम शारा दोरपाइक्ब आन ग्रीशो मननेनीम। ८ मेकोम डांडा मेर आन जोतीक सेल्नीम। मिनु गिगी घांस नेल्ल माल्शा नेक्नीम।

९ मार ब्वाकी डा सांढे ब्यफोम इ गेय पने बिप्बा? मार मेको इ घांस लाप्तीकेम नां सोइबा? १० गे मेको कली वाक्ने चाप्नेवे? मार मेकोमी दांदे पा इ रू दिंम सेल्बा? ११ मार गे मेको आ बोल तशा इ गेय पपाइक्नेवे? इन गेय नेल्ल पचा गेनेवे? १२ मेको इ अन्न कुरशा चाक्चा कली लेशशा जाक्ब, दे थमा सुइक्नेवे?

१३ ठेयब चिकबीम ग्येरशा आ फ्रां हाम्ब। तन्न मेको सारस खोदेशो पा बेरने मचाप्ब। १४ मेकोम आ ब्वोफु होल दे खपीम वोइक्ब। मिनु मेक उइ प्रोइब। १५ मिनु मेको कली खोइलीम दिम्नीम, दे प्रेंब। ब्वाकी डा जन्तुपुकीम दिम्ने चाप्नीम, दे ममिम्ब। १६ मेकोम आंम चाइक्ब, आ के ममाइ खोदेशो पा, आन कली शिशी मपाइब। मेको आ ब्वोफु पतीके मोशा लत हना यो, महिंब। १७ परमप्रभुमी मारदे हना मेको कली तुइक्तीक थुं मपाइश्शो सेल्शो बाक्ब। मिनु मेको कली मारेइ मरुप्ब सेल्शा प्रोइशो बाक्ब। १८ मिनु मेको दोरशा आ फ्रां प्राक्ब। मिनु शारा नु शारा डोइक्ब आन कली कोत्रशा रिप्ब।

१९ गे शारा कली मेको आ बोल गेनेवे? मेको आ शुर चांम ग्योम्नेवे? २० गे मेको कली सल्हा खोदेशो पा प्रेक्पाइक्नेवे? मेको आ ठेयब सेंदा पा ग्रीशोम नेल्ल आन कली हिंपाइक्ब। २१ मेकोम आ गेंचम प्रेक्ना प्रेक्न राप्ब। मेकोम आ बोल नेल्ल कोंइशा, लडाइ पतीकेम लाइब। २२ मेकोम हिंतीक आ पर्बम मारेइ ममिम्ब। मेको तरवार तशा मप्रोक्ब। २३ मेको आ ब्रा हुरुर पा ग्रीब। मिनु मेकेर तूतीक नु तरवार हिरनीम। २४ तन्न मेको थाम्पा आ जोंब बोक्शा, दोरशा लाइब। तुराही ताप्शो नेनानु, मेको सिक्सी पा बाक्ने मचाप्ब। २५ मेकोम तुराही ताप्शो नेंशा 'आहा' देंब। मिनु मेकोम डोन रेन लडाइ पाइब आन हुल नु लडाइ डा रिना नेंब।

२६ ब्वारदे आ फ्रां हाम्शा दक्खिन गे बेरचा कली इ रुप्तीकेमी शेंदी? २७ मार ककाकुलीम आ ग्योत्र इर रोगुम सेल्चा

कली इ अरेशो बाक्बा? २८ मेको रोगुम बास बाक्ब। मिनु आ ग्योत्र मेकेन सेल्ब। २९ मेकेर रे आ सिखार कोत्रना कोत्रन बाक्ब। मेकोमी डोन डोन नेल्ल रिम्शो पा तने चाप्ब। ३० मेको आ चाइक्बपुकीम हुश तूनीम। मेको ते ते मार मार सिखार बाक्मा, मेको मेकेर बाक्नीम" दे परमप्रभुम अय्युब कली देंमाक्त।

हबकुक १:८; मती २४:२८

### अय्युबमी परमप्रभु कली लोत्र लेशशो

४० मिनु परमप्रभु यावेमी लेंशा अय्युब कली २ "नेल्ल क्येडा सक्ति पाइश्शो, गो आं कली दोस गेबमी आं कली लोत्र लेत्चा माल्ब" देंमाक्त।

यसैया ४५:६

३ मिनु नोले अय्युबमी परमप्रभु यावे कली लोत्र लेशशा ४ "गो शोर गाक्शो मुरुम इन कली मार लोत्र लेन्ने चाप्नुडा डा? गो आं गुइम आं शोत्र सुम्नुड। उत्पत्ती ३२:६; यसैया ६:५; हितोपदेस ३०:३२ ५ गो खेयप का लोत्र पने थुम्ता। मुल लेंशा लोत्र मपाइनुड। गो खेयप निक्शी ब्वाक्ती, मुल ब्वाक्तीक लोत्र मबाक्ब" देंमाक्त।

### परमप्रभु यावेमी आ सक्ति कोंइशो

६ मिनु परमप्रभु यावेम अय्युब कली फश गिवार रे पा लोत्र लेशशा ७ "गे बोल्यो मुर खोदेशो दुम्शा रपो। मिनु गो इ कली लोत्र हिल्लो पाइनुड। मिनु गे लोत्र लेत्ती। अय्युब ३८:३ ८ गो आं कली 'दूली पाइब' देंनेवे? मिनु गे आंमा ठीक पाइब बाक्नुड देंचा कली आं कली दोस गेनेवे? ९ मार इ सक्ति परमप्रभु के खोदेशो बाक्बा? गे बंबु पशो सेंदा खोदेशो पा ग्रीने चाप्नेवे?

१० चापेवे हना, मान ततीकेम नु ठेयब दुम्तीकेम आंम कली ग्योम्सो। गे इ एर ओंथ दारस नु छेडछेड वोंडसो। ११ इ गाइक्तीक कौडो। मिनु ठेयब लेशशो मुर आन कली कोव्रशा, मेको आन कली दिप्शा आइक्च सेलो। १२ ठेयब लेशशो मुर नेल्ल आन कली कोव्रडो। मेको आन कली आइक्च सेलो। मिनु आं अरेशो लोव्र मटीब आन कली आन राप्तीकेमी दिम्दीमी। १३ मेको नेल्ल आन कली खपीम खुइक्तीमी। मिनु रागी आगाम मेको आन कुल खुइक्पाइक्मी। १४ मिनु गो 'इ ग्युरा गुडमी ग्राने चापेवाक्ते' दे थमा सुइक्नुड।

१५ गो इ कली सेल्शो खोदेशो पा बेहेमोथ माइशो ठेयब जन्तु कली सेल्ता। मेकोमी बी ब्यफ खोदेशो पा घांस व्वाइब। बेहेमोथ व्वाक्कु डा ठेयब जन्तु बाक्ब। १६ मेको आ सक्ति आ फिलाम बाक्ब। मिनु आ बोल आ कोव्रजम बाक्ब। १७ मेको आ मीलु लेबानोन डा लाइशो रवा खोदेशो खकटा बाक्ब। मेको आ फिला डा नाडी थम खांडसीशो बाक्नीम। १८ मेको आ रुश कांसा खोदेशो बाक्नीम। मिनु मेको आ खोइली फलाम खोदेशो बाक्नीम।

१९ मेको परमप्रभु आ नेल्ल क्येडा डोंडती डा ठेयब गेय बाक्ब। मो हना यो मेको कली सेल्ब तरवार शेंशा ला मेको आ नेक्था लने चापेब। २० डांडामी मेको आ जोतीक बाक्ब। व्वाकी डा जन्तु नेल्ल मेकेर ग्यारनीम। २१ मेको कमल फू आगाम इपेब। मेको बुदी मीलु नु व्वाक्कु बाक्तीक मेर खुइशो बाक्ब। २२ कमल फूमी मेको कली आ वांकु गेब। मेको आ एर ओंथ डा खोला मेर बुटा बाक्नीम।

२३ मेको खोला बारशा कुत हना यो महिंब। बारशो खोला आ गे पित हना यो दिल थिशशा इप्शा बाक्ब। २४ सुइ मुरुम मेको कली आ बोल्सीम रेतने मचापेब। सुम मेको आ मिक्च थिने चापेबा? सुम मेको कली ब्वारदम रेशशा आ नें खिन्ने चापेबा डा?" दे परमप्रभुमी अय्युब कली देंमाक्त।

### लेव्याथन आ पर्बम लोव्र

४१ परमप्रभुमी "गे लेव्याथन माइशो ठेयब जन्तु कली बोल्सीमी रेतने चापेवे? मेको आ लें डोरीम नेपे चापेवे? भजन संग्रह ७४:१४ २गे मेको आ नें खिशशा डोरी लिक्ने चापेवे? मेको आ शापे बोल्सीम ब्वेक्ने चापेवे। ३मेकोमी 'आं कली प्रोंडयी, शिशी पाइय्यीनी' दे पुंडबा? मेकोमी इ कली मिलो शिलो पाइबा डा? ४मेकोम गे नु कबल पाइबा? 'गो गेना हना यो वाइल दुम्नुड' देंबा? ५गे मेको नु चिक्ब खोदेशो पा ग्यारने चापेवे? मार, मेको कली इ मीश आल नु ग्यारचा कली पाइशशा वोइक्चा दाक्नेवे? ६मार, मेको आन पर्बम ग्यापेब लेयबपुकीम 'ओशो लाइब' देंनीमी? ग्यापेब लेयबमी आन दातेमी मेको कली भाग भाग सेल्नीमी? ७मार, गे मेको आ कुशुल कली तूतीकेम तूने चापेवे? मार, डांड साइक्तीक याम मेको आ पिया आपे चापेवे? ८गे 'गो मेको नु लडाइ पाइनुड' दे मिम्ताक्वी हना, मिनु राम्शी पाप्तीवी हना, गे मोदेशो लेंशा गेनायो मपाइक्नेवे। ९सुम मेको कली 'ग्याइक्नुड' दे मिम्बा, मेको मचापेब। सुम मेको कली ताइबा, मेको हिंशा गोल्लब। १०मेको कली पोक्ने चापेब,

सुइ मबाक्नीम। मोपा मेको आ डोंइती सु  
राप्ने चाप्बा डा? ११ गो आं कली लडाइ  
तोशा, सु ब्रोंइशा बाक्ने चाप्बा डा?  
सरीड आगा डा मारेइ मारेइ आं केन नम।

१२ गो मेको आ खोइली आ पर्बम  
लोत्र पाइनुड। मेको आ सक्ति नु मेको  
आ दारस आ पर्बम इन कली लोत्र  
पाइनुड। १३ मेको आ फेक्शो वा सुम  
पुइक्ने चाप्बा? मेको आ तेक्तीक कली  
सुम तूने चाप्बा? १४ सुम मेको आ शोत्र  
पाक्ने चाप्बा? मेको आ खुइ हिंचा डा  
बाक्नीम। १५ मेको आ ची तेक्तीकपुकीम  
सेल्सीशो बाक्ब। मेको थम नेक्था नेक्था  
पा गार पाइश्शा वोइश्शो खोदेशो बाक्ब।  
१६ मेको का आ तार अर्को पा बाक्शो  
बाक्नीम। मोपतीके फश यो मेको आगा  
ओत्रने मचाप्ब। १७ मेकोपुकी का का पा  
अर्को नु खोम्सीशा मब्राचा डा पा बाक्शो  
बाक्नीम। १८ मेकोम हाक्च पवानु, मी  
गूब। मिनु मेको आ मिक्च सुनी डा नां  
खोदेशो बाक्ब। १९ मेको आ शोत्र रे रांको  
नु मी आ फिलीडगो गूनीम। २० मेको आ  
नें रे कुन गूब। मेको शुश बुइश्शो रे गूशो  
सोलोल खोदेशो बाक्ब। २१ मेको आ  
सासमी कोइला ब्रपाइक्ब। मिनु मेको आ  
शोत्र रे हुरु पा ब्रशो मी गूब। २२ मेको  
आ शुर शुश बोल्यो बाक्ब। मेको आ एर  
ओंथ शुश हिंतीक बाक्ब। २३ मेको आ  
श्ये रोम्सीशो बाक्ब। मारेइम चिप्ताक्व  
हना यो, मेको कली मारेइ मदुम्ब।  
२४ मेको आ थुं फुल्लु खोदेशो पा खकटा  
बाक्ब। मेको यात आ आगा डा फुल्लु  
खोदेशो पा खकटा बाक्ब। २५ मेको  
बोक्शा राम्मेनु, बोल्यो नेल्ल हिंनीम।  
मेकोम लडाइ तोवानु, मेको नेल्ल नोले  
शोंइसीनीम। २६ तेकोइ तरवारमी मेको

कली साइक्ने मचाप्ब। तूतीक, ब्रा नु अरु  
आप्तीकेम मेको कली मारेइ मपाइब।  
२७ मेकोम फलाम कली पराल खोदेशो  
मिम्ब। कांसा कली राक्शो शी खोदेशो  
मिम्ब। २८ तेकोइ ब्राम मेको कली  
प्रोक्पाइक्ने मचाप्ब। हुरद डा फुल्लु मेको  
कली भूस खोदेशो बाक्ब। २९ थात्ला  
मेको कली भूस खोदेशो बाक्ब। तूतीक  
शेशा बाक्शोनु, मेकोम रिश्शा कोत्रब।  
३० मेको आ कोत्रजीम हेश्शो गम्टे  
खोदेशो बाक्ब। मेको गाक्मेनु दांदे पशो  
खोदेशो पा गाक्ब। ३१ मेकोम समुन्द्र डा  
ब्वाक्कु कली बुइश्शो खोदेशो सेल्ब।  
मिनु समुन्द्र कली ग्योंबुम मलम खाल्शो  
खोदेशो पा खाल्ब। ३२ मेको गाक्मेनु आ  
नोले टल्केशो लां प्रोंइशा गाक्ब। मेको  
लां ठेयब समुन्द्र डा बुश चां खोदेशो  
तांइसीब। ३३ रागीम मेको नु उइक्थ  
मारेइ मबाक्नीम। मेको हिंतीक मपाइश्शो  
बाक्ब। ३४ मेकोमी ठेयब लेशो नेल्ल  
आन कली आइक्च मिम्ब। मेको ठेयब  
लेशो नेल्ल आन पिप बाक्ब” देंमाक्त।

### अय्युब परमप्रभु कली तुइक्ब दुम्शो

४२ मिनु अय्युबम परमप्रभु यावे  
कली २ “गे मारेइ मारेइ पने  
चाप्नीनी, दे गो तुइक्नुड। इन मिम्शो  
मारेइ मारेइ सुइम क्याम्ने मचाप्नीम।  
३ “दूली लोत्र पा अर्ती गेब सु बाक्म?  
मारेइ मजोक्थु मार लोत्र पवा?’ देंतीनी  
गो थमा पा, आंमा मरुप्थु लोत्र पाता।  
मेको आं रुप्ने मचाप्शो थम छक  
लाक्चा डा बाक्नीम। अय्युब ३८:२ ४ मुल  
गो लोत्र पाइनुड। नेनीन। गो इन कली  
लोत्र हिल्लो पाइनुड। मिनु गे आं लोत्र  
लेत्तीनी। अय्युब ३८:४ ५ इन पर्बम नेशो ला

बाक्ती। तन्न मुल गो इन कली ताता।  
अय्युब १६:२६-२७ ६मोपतीके गो आं कली  
आइक्च मिम्ताकड। मिनु गो फुरक नु  
पुलुम बाक्शा, माफ पुंडनुड” दे अय्युबमी  
देमाक्त।

### अय्युब आ रिम्शो नाक्ती लेशशो

७मिनु परमप्रभु यावेम अय्युब नु लोव्र  
पने थुम्शा, मेकोम तेमान डा एलीफाज  
कली “गे नु इ वारच निक्शी इन कली  
तशा, गो गाइशो बाक्नुड। मारदे हना  
गे आं पर्बम थमा लोव्र मपनी। तन्न आं  
गेय पाइब अय्युबमी आं पर्बम थमा लोव्र  
पाप्तु। ८मोपतीके गे ७ ओटा ब्यफ नु  
७ ओटा सांड लाइशशा आं गेय पाइब  
अय्युब आ बाक्तीके लने। मिनु गेपुकीम  
इन पर्बम चोशा चढेतीक चढेने। मिनु  
आं गेय पाइब अय्युबमी इन पर्बम आं  
कली माफ पुंड्या माल्ब। मिनु गो मेको  
आ पुंडशो लोव्र नेंनुड। मिनु गे इन मूर्ख  
लोव्र पशो डा सजाइ मगेनन्नी। मारदे  
हना गे आं पर्बम थमा लोव्र मपनी। तन्न  
आं गेय पाइब अय्युबमी आं पर्बम थमा  
लोव्र पाप्तु” देमाक्त। १इतिहास १५:२६;  
इजीकीएल १४:१४ ६मिनु तेमान डा एलीफाज,  
शुआह डा बिल्दाद नु नामा डा सोफारमी  
परमप्रभु यावेम देशो खोदेशो पामे बाक्त।  
मिनु परमप्रभु यावेमी अय्युब आ पुंडशो  
लोव्र नेना बाक्त।

१०मोपा अय्युबमी आ वारच आन  
पर्बम पुना नोले, परमप्रभु यावेम अय्युब  
आ शोंप नेल्ल लेशशा गेवा बाक्त। मिनु  
मेको आ शोंप नेल्ल, डोंइती डा क्येडा

निक्शी खेयप शुश गेवा बाक्त। अय्युब १:२;  
अय्युब ८:७ ११मेको नोले अय्युब आ  
लोकब नेल्ले, आ समी नेल्ले नु मेको आ  
डोंइती डा तुइशशो मुर नेल्ल जाक्शा,  
मेको आ ख्विम भोज जामे बाक्त। मिनु  
मेकोपुकीमी अय्युब कली “गे परमप्रभु  
यावे आ गुइ रे शुश श्येत नु मरिम्शो  
दुम्तीके ताइतीनी” दे मेको कली थम  
रिम्शो लोव्र पामे बाक्त। मिनु नेल्लेम  
मेको कली सुन के क्येट नु सुन के औंठी  
गेमे बाक्त। अय्युब १६:१३-१४, १६ १२मिनु  
परमप्रभु यावेम अय्युब कली आ नोले  
डा ब्रोंइशो नाक्ती कली आ डोंइती डा  
ब्रोंइशो नाक्ती क्येडा शुश आसीक गेवा  
बाक्त। मिनु मेको के १४ हजार भेडा, ६  
हजार दलओठ, हजार का हाल ब्यफ  
नु हजार का गधा दुम्मा बाक्त। १३मिनु  
मेको के ७ जना तौ नु तमी सां दुम्मा  
बाक्त। अय्युब १:२ १४मेकोमी आ डोंइती  
जरमेशो तमी आ नें येमीमाह, माइली आ  
नें केसीया नु कान्छी आ नें केरेन-हाप्पुक  
वोइक्मी बाक्त। १५मिनु रागी नेल्लेम  
अय्युब आ तमी खोदेशो दारशो अरु सुइ  
मबाक्मा बाक्त। मिनु मेको आन आफोम  
मेको आन कली आन लोकबपुकी नु  
उइक्थ उइक्थ पा शोंप योक्शो गेमी  
बाक्त। गन्ती २७:८-११ १६मेको नोले अय्युब  
सहे का ४० बर्स सम्म ब्रोंइमाक्त। मेकोम  
आ तौपुकी नु ४ पाला सम्म डा चच युइ  
नेल्ल तवा बाक्त। भजन संग्रह ६०:१० १७मिनु  
नोले अय्युब आ नाक्त नेल्ल नेक्शा, शुश  
ब्रोंइशा खूशो दुम्शा बेक्माक्त। उत्पत्ती २५:८;  
उत्पत्ती ३५:२६; १इतिहास २६:२८